


Alto





5-10, 4, 8.



PAULINI A S. JOSEPHO
L U C E N S I S

Cler. Reg. Scholarum Piarum

ET

IN ARCHIGYMNASIO ROMANÆ SAPIENTIÆ

Publici Eloquentiæ Professoris

ORATIONES

Habitæ in eodem Archigymnasio.



R O M Æ

Ex Typographia Bernabò, MDCCXXVII.

SUPERIORUM PERMISSU.

THE UNIVERSITY OF CHICAGO

PHYSICS DEPARTMENT

RECEIVED

APR 10 1954

FROM

DR. J. R. OPPENHEIMER

TO

DR. L. B. LOEHLER

RE

LETTER OF APRIL 8, 1954

RECEIVED

APR 10 1954

FROM

DR. J. R. OPPENHEIMER

TO

DR. L. B. LOEHLER

RE

LETTER OF APRIL 8, 1954

Eminentissimo Principi
ANNIBALI
S.R.E. PRESBYTERO CARDINALI
ALBANO
CAMERARIO



Paulinus a S. Josepho Scholarum Piarum.



ELIBERANDUM diu
mihi non fuit, cui
præcipue hoc Ora-
tionum volumen
inscriberem, ANNIBAL Cardi-
nalis amplissime. Humanitas
a 2 illa

illa singularis, qua olim ex
his unam nomini tuo nuncu-
patam exceperas, satis mihi
certum dederat benevolentif-
simæ voluntatis tuæ testimo-
nium. Nec dubitare poteram,
te optimis artibus patrocínio
unquam defuturum, quas a
pueritia comites & in omni
fortunæ gradu dignitatis tuæ
administras habuisti. Vide-
bam præterea, te CLEMENTIS XI.
Pont. Max. immortalis memo-
riæ Principis patrui tui glo-
riam studiosius æmulari: & ad
illum non modo Ecclesiasticæ
vitæ integritate, doctrinæ stu-
dio, clementia, benignitate ce-
te-

terisque virtutibus in diem
propius accedere, sed etiam
in promovendis literarum stu-
diis ejus vestigiis diligenter in-
sistere. Qua de re ut plurima
& illustria dederis argumenta,
illud tamen præcipua laude
dignissimum puto, quod sum-
mo splendore ac regio prope
sumptu typis divulgari cura-
veris elegantissimas ejus episto-
las, quas Brevia dicunt: tum
etiam Consistoriales Orationes
& Homilias, quæ & veteris
eloquentiæ majestatem & per-
fectioris vitæ doctrinam & in-
stituta continent. Quamobrem
tibi debet plurimum perpe-
tuo-

tuoque debebit literaria Res-
publica : cum id munificentia
tua ad omnem literatorum po-
steritatem traduxerit , quod
ætatis nostræ singulare fuerat
beneficium . Quocirca aman-
tissimo patruo majorem gra-
tiam referre non poteras : nec
quæ sempiternæ illius memo-
riæ nunc excitanda curas in
Basilica Divi Petri splendidis-
simi mausolei faxa, diuturnio-
rem ei famam tribuent : quan-
doquidem sunt quoque, ut Sa-
tyricus inquit , sua fata sepul-
chris. Nulla autem ætas, nulla
temporum oblivio clarissima
obruet ejus ingenii monumen-
ta ,

ta, nec vetustas ulla literatissimi Principis memoriam conficiet. Quid vero dicam de iis, quæ Urbini, perveteri literatorum hominum municipio, ad bonarum artium decus magnifice ac liberaliter a te fieri accepimus? Haud satis tibi fuerat perficiendis Collegii scholis opem contulisse liberalissimam, ut quæ patruī tui beneficentiæ incœptum, tibi uni deberent præclari operis complementum. Vetustissimæ quoque voluisti Academiæ dignitati consulere; & quemadmodum artes omnes, ut M. Tullius ait, societate quadam inter se

se continentur, ita peramplo
unius loci ambitu singula ea-
rum studia conjungere tibi
placuit. Proinde magnificen-
tioribus ædibus a fundamento
excitatis, Gymnasium publi-
cum cum Collegio Scholarum
Piarum ita connexum atque
contiguum effecisti, ut plura
in unum Collegia quasi coale-
scant, & unum amplissimæ A-
cademiæ corpus constituent.
Nec fane minus de literis es
optime meritus ob typogra-
phiæ artem in eadem Urbe
ad veterem splendorem resti-
tutam, cujus nitoris & elegan-
tiæ quasi prægustatio sunt Ri-
tuale

tuale Romanum, Pontificale
majoris Hebdomadæ & alia
jam edita rei sacræ destinata
volumina. Quæ quidem typo-
rum præstantia quanto opti-
mis studiis futura sit ufui, tum
etiam quanto tuæ bono ac
splendori patriæ, cui benefa-
ciendi finem nullum facis, ne-
mo non videt. Hæc autem
tua ad literas amplificandas
ornandasque maxime propen-
sa voluntas omnem mihi dubi-
tandi locum eripuit, quin Ora-
tiones has meas, quæ fere o-
mnes ad studia literarum per-
tinent, benigne suscipias tuo-
que patrocinio tuearis: cum
b præ-

præsertim in tuo prope dicam
natæ atque educatæ sint solo,
in Romano scilicet Archigy-
mnasio, quod te studiorum,
suorum perpetuum vindicem
ac patronum veneratur & co-
lit. Quod si hoc meæ erga te
observantiæ argumentum ea,
qua præstas, incredibili beni-
gnitate exceperis, certe me &
collegas meos ad tuas præcla-
ras virtutes celebrandas magis
magisque excitabis.

AD

AD LECTOREM.

PRODIERANT jam in lucem aliquot ex
his Orationibus, partim summis Ro-
manis Pontificibus, partim Eminentissimis
Cardinalibus singula singulis inscriptæ.
Erga quos eadem ut perpetuo maneant of-
ficia, visum est æquum epistolæ quoque
ipsis præfigere, cum quibus primo editæ
fuerant. De illis vero, quæ in parenta-
libus Leonis X. habitæ sunt, id præmoneo,
quotannis idem argumentum apud nos vul-
gatissimum pertractari: proinde ut quid
novi videatur afferri, illud esse aliqua no-
vitatis specie convertiendum. Ceterum si
cui orationes ejusmodi, aut reliquæ minus
probentur, is per me licet, ne legat.

ADOLPHUS A S. GEORGIO

*Cler. Regul. Pauperum Matris Dei
Scholarum Piarum*

PRÆPOSITUS GENERALIS.

CUm librum, cui titulus : Orationes habitæ in Archigymnasio Romanæ Sapientiæ a P. Paulino a S. Josepho nostræ Religionis Sacerdote Professo & in eodem Archigymnasio publico Eloquentiæ Professore compositum duo ex Nostreis, quibus commissum fuit, recognoverint & approbaverint, ut typis mandetur, si iis, ad quos spectat, videbitur, facultatem in Domino concedimus. In quorum fidem &c. Datum Romæ in ædibus nostris Scholarum Piarum apud S. Pantaleonem die 22. Aprilis 1727.

Adolphus a S. Georgio Præpositus Generalis.

Loco ✕ Sigilli.

Antoninus a S. Michaelæ Secret.
Reg. fol. 251.

Im-

IMPRIMATUR,
Si videbitur Reverendissimo Patri Sacri Palatii Apostolici Magistro.

*N. Baccarius Episcopus Bojanen.
Vicesgerens.*

A P P R O B A T I O.

ORATIONES, quas P. Paulinus a S. Josepho publicus Eloquentiæ Professor habuit in Archigymnasio Romano, Reverendissimi P. F. Gregorii Selleri Sacri Apostolici Palatii Magistri jussu legi & lectas probavi, cum in iis nihil animadverterim, quod vel Orthodoxæ Religionis placitis adversetur, vel quod probatis moribus minus consentaneum videatur. Illas præterea, quæ in lucem edantur, dignas judico; quod qui non fucatam, sed sinceram eloquentiam amant & consecretantur, ex iis habent, quæ cum laude imitentur, & discant qua ratione artem Oratoriam laudabilius excolant, ut Oratio naturali exurgat pulchritudine, nulloque tumo-

more foedata , vel nugis pueriliter exculta
dignam laudem mereatur . Mecum eadem
plane sensuros arbitror omnes , quos non
lateat , quæ recte conscribendæ Orationis
laudanda ratio merito commendetur .

*Ita censeo ego F. Thomas Maria Minorelli
Ord. Præd. Sac. Theol. Mag. Bibliotheca-
rius Casanatensis e Cænobio Minervi-
tano IV. Kal. Aprilis MDCCXXVII.*

IMPRIMATUR.

**Fr. Gregorius Selleri Ordinis Prædica-
torum Sacri Palatii Apostolici Ma-
gister .**

IN-


INDEX

ORATIONUM.

- I. *De neglectu literarum Humaniorum
& earum corruptela.* pag.5
- II. *De patrocínio bonarum artium.* 43
- III. *De laudibus Leonis X. in anniver-*
sariis ejus parentalibus. 87
- IV. *De infelicitate Illiteratorum.* 134
- V. *De forensi latinitate expurganda.* 167
- VI. *De usu & necessitate Eloquentiæ in*
foro & hodiernis judiciis. 223
- VII. *In optimis Studiis lente festinan-*
dum. 259
- VIII. *De expedita discendi ratione.* 289
- IX. *De laudibus Leonis X. in anniver-*
sariis ejus parentalibus. 309
- X. *De*

X. *De ingeniorum delectu ad studia
literarum habendo .* 330

XI. *De laudibus Leonis X. in anniver-
sariis ejus parentalibus .* 353



Am-

Amplissimo & Clarissimo Juveni

D. ALEXANDRO
A L B A N O

Summi Pontificis

CLEMENTIS XI.

FRATRIS FILIO,
EQUITI HIEROSOLYMITANO

Et Magno Prioratus Armeniæ Bajulivo.

PAULINUS A S. JOSEPHO
SCHOLARUM PIARUM.



*Uæ nuper, te audiente,
in almo Urbis Archigy-
mnasio de Humanioribus
literis publice disserui; ea
sunt omnino, quæ sæpe &
graviter pro injuncti officii ratione,
tibi diligenter præ oculis habenda esse
monueram. Ex quo enim contigit ad hæc
mitioris literaturæ studia me tibi du-
cem præberi; duo fuere præsertim, quæ*

A

in



*in animo penitus tuo, qua ratione, qua
 exemplis defigere magnopere studui: ni-
 mirum literarum censum citra sudorem
 parari non posse, neque optimas discipli-
 nas consuevisse oscitantibus in ora dela-
 bi; sed imitandum nobis esse pertinacem
 indomitamque Majorum industriam, quo-
 rum eruditionem æmulamur & gloriam:
 deinde, minime sperandum esse in Hu-
 manioribus literis feliciter progredi, nisi
 discendi labor cum optima studiorum ra-
 tione conjungeretur. Ad quam licet pri-
 mo pertinere videatur tum docendi me-
 thodus, quæ ex Quintiliano neque ope-
 rosa, neque fufis præceptionibus constans
 esse debet, sed brevis & simplex; tum
 solida præceptoris doctrina, longoque usu
 subacta; tamen nihil est, quod literario
 progressui plus conferat, quam veterum
 ac politiorum auctorum lectio accurata
 & diuturna. Quemadmodum nihil per-
 niciosius magisque cavendum, quam
 libro-*

librorum prave corruptaque latinitatis frequentior usus & familiaritas. Quae quidem omnia cum tibi aliisque studiosis adolescentibus serio ac frequenter progressu non pœnitendo ingessissem: ideo demandata mihi nuper ex singulari Summi Pontificis CLEMENTIS XI. Patruī tui beneficentia, tuaque potissimum opera, Eloquentiae provincia in Romano Lyceo, argumentum hoc ipso utilius, quo publicis lectionibus præluderem, se mihi usquam non obtulit, quodque magis ad rem commode caderet. Illud vero quam pronis auribus quantaque animi voluptate exciperent quotquot aderant primæ eruditionis & dignitatis Viri, tu ipse testis, imo & præco humanissimus. Hoc itaque mihi certe fuerat satis, quin & supra vota; non tamen tibi, qui ut quamprimum oratio ipsa publici juris fieret, etiam atque etiam efflagitasti. In qua quidem re humanitati tue diutius mihi

*reluctandum non fuit, quod sperem eidem
 orationi maximum pondus accessurum esse
 ac nomen; si tu studio, industria opti-
 morumque librorum consuetudine atque
 usu, auspicato compleveris, quam susti-
 nes non vulgarem literariam expectatio-
 nem. De quo cum spem mihi certiore
 præbeant non modo egregia indoles tua,
 & supra ætatem iudicii maturitas cum
 insigni morum gravitate conjuncta; sed
 etiam singularis illa animi propensio tam
 erga literas, quam literatos, quos vehe-
 menter amas, libentissime excipis, eosque
 fovendos esse & palam dictitas; &, qua
 potes, impense curas, votis tuis ultro,
 ac libens obtempero; orationemque pu-
 blico iudicio committo, tuo tamen nomi-
 ni inscriptam; ut te ingenue & castæ
 latinitatis non tam candidatum, quam
 patronum & vindicem literaria Respu-
 blica futurum intelligat, & mecum offi-
 ciosa animi gratulatione veneretur.*

DE

DE NEGLECTU
LITERARUM HUMANIORUM
ET EARUM CORRUPTELA.

ORATIO I.

Habita VI. Nonas Maji, anno MDCCXIII.



EMINEM vestrum ignora-
re arbitror, eam semper
fuisse consuetudinem,
ut quamprimum quis-
piam ad hanc amplissi-
mam eloquentiæ sedem accederet,
solenni quadam indicta concione,
quicquid virium, aut artis in dicen-
do sibi comparasset, eo potissimum
conferret, ut in humanioribus literis
& eloquentia utilitatem maximam
cum dignitate conjunctam esse con-
tenderet. Quæ quidem consuetudo
licet

licet mihi reprehendenda minime videatur, ab hujusmodi tamen institutioni ratione & ipsamet argumenti magnitudo & summa auditorum dignitas necessario me revocat, alioque abducit. Quid enim est, quod ad optimarum artium ornamentum tam ingeniose excogitari, aut diserte dici possit, quod longe infra earum amplitudinem non jaceat, vel ab eloquentissimis viris jampridem occupatum, splendideque ex hoc ipso loco pertractatum non fuerit, aut etiam multiplici vestrae eruditioni obscurum esse censeatur? Nemo profecto, nemo vestrum, aut eorum, qui adsunt, ignorat, quantum splendoris & gloriae, quantum praesidii ac virium rebus cum privatis tum publicis conferat literarum studium & eloquentia. Omnes probe intelligunt ab illis veluti e fonte promanare, non modo
 in

in cives & Rempublicam, verum, etiam (quod certe momenti majoris est ac ponderis) in Religionem ipsam tot tantaque præsentissima commoda, ut de iisdem asserendum esse putaverim, quod præclare Tullius de amicitia, quod nempe si quis eas de medio tolleret, solem e cælo sustulisse videretur. Quocirca ne actum agere videar, aut crambem recoctam, ut ajunt, proponere; nihil de literarum dignitate, aut præstantia, nihil de necessitate eloquentiæ, vel usu in medium proferam: sed illud tantum, totis industriæ viribus contendam inquirere, quid potissimum causæ sit, quod hac nostra tempestate, in tanta scilicet ceterarum omnium artium gloria scientiarumque incremento, humaniores literæ potius in dies collabi, & ad interitum vergere videantur; cum jam fere reperiatur nemo, qui

qui nedum uberiori illa eruditionis facultate, qua majores nostros tantopere inclaruisset miramur, quodammodo sit ornatus; sed neque latini sermonis castitatem & elegantiam sibi omnino tribuere audeat. Arduum, fortasse fuerit ac periculosa plenum alex argumentum; vobis tamen, Patres Amplissimi, & iis omnibus, qui humaniores literas studio, aut amore aliquo prosequuntur, ut puto, optandum maxime; ingenuis vero adolescentibus, qui literarum earundem studiis initiati sunt, opportunum illud omnino fore confido.

Mirari plerique solent, quonam improbo literarum fato contigerit, quod tamen hoc ævo hominum ingenia nihilo, quam antiquitus, deteriora sint; imo sæpe & in multis præstantiora esse videantur; nemo tamen existat, qui cum sapientissimis illis literis
te-

terarum parentibus, qui olim florue-
 runt, de ingenio doctrinæque laude,
 contendere audeat. Nonne, inquiunt,
 in gravioribus magisque arduis disci-
 plinis solertiam veterum ingenium-
 que ætas nostra non æquavit modo,
 verum etiam longe lateque supera-
 vit? Recentiore percurrere Philoso-
 phiam: quot doctrinæ solidioris in ea
 progressus! quot novæ hypotheses li-
 matiori judicio elaboratæ, validoque
 rationis & experientiæ præsidio com-
 munitæ! quot naturæ reconditoris
 arcana, quorum causæ omnium opi-
 nione difficillimæ, imo humano inge-
 nio prorsus imperviæ esse censeban-
 tur, instituta recens philosophandi
 ratio acute penetravit, clarissimeque
 detexit! Mathematicis vero discipli-
 nis quantum splendoris atque ampli-
 tudinis ex singulis fere ætatibus, præ-
 sertim vero superiori seculo accessit?

B

Pro-

Profecto nulli veterum innotuerat Logarithmorum genesis, neque Algebrae speciosæ methodus, neque fluida Cælorum natura, aut tricorporea Saturni majestas, ac sexcenta alia rerum pulcherrimarum inventa, quibus ætas nostra se merito sapientiores esse gloriatur. Præterea juniorum solertia, cum rem medicam progressu non poenitendo ampliaverit; cumque rei militaris scientia complures memoria nostra inclaruerint duces, qui veterum gloriam fortitudine, consilio rebusque gestis facile superarunt; quæ ratione contigerit esse neminem, qui literarum fama & eruditionis laude antiquitati palmam præripere audeat; sed satis sibi gloriæ ducat, si multo sudore multisque vigiliis eo tandem pervenerit, ut ab antiquorum præstantia non longissime abesse videatur? Adeone deterior literarum conditio, ut

ut in tanta ingeniorum ubertate ceterarumque scientiarum progressu, illæ propemodum destitutæ jaceant, ac ne passum quidem progrediantur? Ego sane fatalem hujusmodi literarum calamitatem duplici causæ potissimum tribuendam esse judico; & quod studio industriæque majorum longe impares sumus, & quod longissime ab optima studiorum ratione recessimus. Cui duplici literarum infortunio, ut tempestive, si fieri possit, occurratur; constitui hodierno die, utrumque oratione persequi, & utrumque ea, qua potero, industria, studiosæ juventuti præcavere.

Et quidem ad ea semper majori animorum contentione incitamur, quæ pluris facimus, impensiusque æstimamus. Pulcherrimas res atque optimas nullo frequenter studio prosequimur, non quod illæ revera ne-

gligi dignæ sint, sed quod nobis negligendæ esse videantur. Neque enim tantum ab ipsa rerum pulchritudine ac dignitate, quantum ab earum opinione atque æstimatione movemur. Quamobrem cum literas Majores nostri in eo pretio ac dignitate semper habuerint, ut in ipsis maximum vitæ ornamentum, ac summum Reipublicæ bonum situm esse putarent, mirandum non est easdem tam singulari amore ardentique studio complecterentur. Vehementius illi plane literariæ dignitatis famam deperibant, quam ambiciosissimus quisque fasces, consulatus, imperium: parandæque sibi eruditioni acrius insudabant, quam avari homines pecuniæ fortunisque augendis. Postremo magis illi de literis, quam nos de aris focisque tutandis, solliciti. Ex quo ingenti erga literas studio fieri solebat, ut
 omni-

omnibus alijs abdicatis ex animo curis, in hanc unam incumberent, & in hanc veluti metam totos industriæ nervos intenderent. Quocirca incredibile nemini videatur, eos tantopere literarum amore succensos, ceteris sibi voluptatibus interdixisse, rei familiaris curam abjecisse, somno, cibo potuque frequentius abstinuisse, quo celerius ad earum gloriam assurgerent. Vulgare est ac tritum, summum illum dicendi magistrum Demosthenem, quo nemo unquam laboriosius, nemo per plura naturæ obstacula eloquentiæ verticem adiit, plus olei consumpsisse, quam vini, omnesque artifices antelucana industria superasse. Non ignorabant siquidem viri prudentissimi labore minime vulgari venalia esse eruditionis ac literarum præmia. Non ignorabant ad literarum studia æque illud pertinere, quod

quod de Philosophia omnium ore percrebuit, postulari videlicet totum hominem. Hinc Cicero, homo plane ad eloquentiam & eruditionem factus, cum diligentius causam requireret, cur in tantis eloquentiæ præmiis tantaque gloria, pauci tamen reperirentur, qui in ejus laude proficerent, opportune docuit, hanc esse præcipuam, quod ea studiorum genera omnem sibi animum omnemque sollicitudinem vindicarent. Omittendæ sunt, inquit, omnes voluptates, relinquenda studia delectationis, ludus, jocus, convivium, sermo etiam pene omnium familiarum deferendus.

Quæ quidem ne cui ad amplificandam literarum famam magnifice enunciata esse videantur; cogitate mecum, Auditores, quot quantaque, cælo, terra marique occurrant, quorum cognitio non levis ac perfunctoria,

ria , sed plena ac bene subacta ad eos
 necesserio pertinet , qui in ejusmodi
 disciplinis laudem aliquam assequi
 meditantur . Quanta enim fabularum
 eruditio ! Quanta Poetarum , aut car-
 minum varietas ! Quanta historiarum
 rerumque ab orbe condito gestarum
 series ! Haud parum certe negotii fa-
 cessit tot auctorum plenam solidam-
 que cognitionem consequi , & tam
 multiplex dicendi genus probe ac-
 curateque dignoscere posse , ac distin-
 guere . Alii siquidem in dicendo ro-
 busti , ac nervosi : alii molliores &
 magis ad elegantiam proni . Hic festi-
 vitatis & leporis plenus ; acrius ille
 probat , urgetque efficacius . In hoc
 phrasis tersa , facilis , non affectata ,
 maximam spirans suavitatem . Su-
 blimior in alio , succo plenior , tota-
 que ad gravitatem plane senatoriam
 composita . Præterea cum omnes ar-
 tes,

tes, ut ait præclare Tullius, quæ ad humanitatem pertinent, habeant quoddam commune vinculum, & quasi cognatione quadam inter se contineantur; dubitari minime potest, quin nulla sit scientia, aut ars liberalis, cujus cognitione aliqua tinctus esse non oporteat, qui ad literarum & eruditionis gloriam contendit. Si quis enim Dialecticam, Mathematicam, Ethicam, Politicam aliasque Philosophiæ partes, ne longe quidem a vestibulo salutaverit, non modo de tot tantisque rebus, quarum notitia ab iis fontibus haurienda est, neque unum verbum facere audebit, sed neque plene intelligere poterit poetas ipsos, oratores, aut historicos in eo disciplinarum genere præclarissimos. Quis enim Plinium, Plutarchum, Quintilianum, aut Virgilium ipsum tam multa de Physica, multa de Geographia,

phîa, ac de Astronomia multa subtiliter solideque pertractantes intelligat, qui nondum primas earundem scientiarum lineas duxerit? Necessè erit profecto in evolvendis hujusmodi libris, tanquam ad scopulos passim hæreat, vel saltem ita balbutiat, ac si sphingem aliquam offendisset, aut monstra immania enuncianda essent.

Quæ quidem omnia cum sudorem industriamque exigant & maximam & diuturnam, mirandum non est, veteres tam assiduo ac pertinaci labore in literario pulvere defudasse. Intelligebant illi plane nullam sapientiæ viam esse imperviam, si conatus accessisset ac labor, qui improbitate sua omnia vincit. Intelligebant in arduo montis domicilium habere musas; verum eo quoque industria volari posse, si aliter perveniri non possit. Cum itaque experientia didicissent

magistra id; quod Græcus ille Me-
trocles sapienter dictitabat, nimirum
res alias omnes emi posse pecunia,
litteras vero tempore; nihil erat omni-
no, quod tam accurate ac tam reli-
giose servandum esse putarent, quam
tempus. Hinc vel exiguam diei par-
ticulam per otium desidiâque tra-
ducere, impendium omnium gravif-
simum censebatur. Ac proinde ne-
momentum sibi otiose unquam ef-
flueret, quod potui, quod cibo, quod
itineri tribui necesse erat, cum aliquo
eruditionis studio conjunctum esse
volebant. Quandoquidem ex Plutar-
cho accepimus, eam fuisse majorum
consuetudinem, ut dum lectica iter
agerent, aut recitantem aliquem au-
dirent, aut nonnulla sibi ex lectione
annotarent, aut etiam non raro aliis
dictando, non tam tempus, ut poetæ
loquuntur, fallerent, quam traduce-
rent

rent fructuosissime. Hinc memoria proditum est, illum promum condum universæ eruditionis, quem nulla unquam silebit posteritas, C. Plinium severe rigideque nepotem suum objurgasse, quod illum, omissa lectica, vidisset deambulantem. Poteras, inquit, has horas non perdere. Tanti scilicet putabant studiosissimi viri, vel minimi temporis habere rationem; illud totum periisse rati, ex quo sibi aliquis sapientiæ proventus non accessisset.

At nos, (pudet me, magnopere pudet projectam temporum nostrorum ignaviam cum indomita majorum diligentia conferre) nos, inquam, quibus, ut Seneca dolebat vehementer, tempore nihil est vilius, illud partim tuendæ accuratius, quam par est, valetudini, partim somno, partim conviviis, partim etiam mulier-

cularum more, calamistris & speculo effundimus liberalissime. Ac deinde quod aulæ officiis, quod voluptatibus, quod ludis, quod avaritiæ, aut ambitioni superest tempus in literis & eruditione reponimus: Non est ergo cur miremur, majoribus nostris tanto inferiores nos esse doctrina, qui tantopere infra ipsos sumus laborandi studio. Merito ab eorum gloria tam longe aberramus, quorum non imitatur industriam: quam revera imitandam sibi unusquisque proponeret, si quod erga literas studium in nobis reliquum superesset. Sed relanguit jampridem, relanguit in plerisque hominum amor erga optimas disciplinas. Restinctus est omnino vetus ille ad honestas artes ardor animorum atque contentio. Inveteravit enim jam opinio quædam, non modo literis humanioribus perniciofa, verum etiam scien-

sciētiarum omnium ordini maxime periculosa, in hoc studiorum genere nihil gloriæ, nihil divitiarum esse sperandum. Ac proinde non sine gravissimo animi dolore, quotidie videmus adolēscētes egregia indole, ingenioque præstantes, vix delibatis Grammaticæ rudimentis, vix rudioribus subauditis ex Dialetica vocibus, statim cæco quodam impetu ad Hippocratis aphorismos, vel ad Justiniani codicem properare; illic tantum gloriæ, illic divitiarum certissimam, spem propositam esse dictitantes. O præclara sciolorum consilia! O præposteram ætatis nostræ sapientiam! Ita ne pessime rebus suis consultum esse voluerunt Bembi, Sadoleti, Cortesii, Antoniani, qui omnes in Senatum Apostolicum cooptati fuere, alii que pene innumeri strenui literarum cultores, ut ætatem omnem per summum



mum laborem in iis studiis contere-
 rent, ex quibus nulla sibi utilitas,
 nulla amplitudo, aut dignitas orire-
 tur? Sed omittamus infantissimos istos
 literarum æstimatores, quorum auda-
 ciam in iudicii severitatem vocare,
 neque locus, neque temporis angus-
 tia permittit. Contemnant modo,
 quæ citra infamiam ignorare non pos-
 sunt. Deferant musarum castra, si pla-
 cet; exeant, proficiantur. Etenim
 non desunt nobis in hac Urbe, veteri
 optimarum artium domicilio, ex tota
 Italia, imo ex tota fere Europa adole-
 scentes optimi, qui cum præstantia
 ingenii animorum ardore conjuncto,
 sapientiam impensissime amant, & in
 deliciis & amoribus habent honestis-
 simas disciplinas. Non desunt, neque
 deerunt unquam viri clarissimi de
 literaria Republica optime meriti,
 qui literas per omnem ætatis gradum
 ita

ita coluere, & colunt, ut ad eas sustentandas atque ornandas omnino nati esse videantur.

Quid tamen est, quod in tanta scholarum frequentia, in tanta ingeniorum vi studiorumque contentione, vix tamen unus, aut alter hodie reperiatur, qui ea latini sermonis integritate atque elegantia valeat, quæ olim duobus circiter ab hinc seculis, post restitutas scilicet a Summorum Pontificum, & a Mediceæ Familiæ munificentia literas, tantopere in hac Urbe, imo per Italiâ omnem effloruit? Tunc enim Angelus Politianus, tunc Hermolaus Barbarus, tunc Janus Parrhasius, Philippus Beroaldus, Romulus Amasæus, Paulus Jovius, alique sexcenti floruerunt, qui latino sermone adeo perpoliti limatique fuere, ut ad Ciceronem ipsam, Cæsarem, Livium, Cornelium Nepotem

ce-

ceterosque Romanæ linguae scriptores castigatissimos, munditia styli & elègantia visi fuerint perquam proxime accessisse. Nunc vero, qui hanc laudem optimo sibi jure omnino tribuere possit, vix aliquem esse novimus. Quæ quidem luctuosa calamitas cuinam fato præcipue sit tribuenda, non una est eademque omnium opinio. Contendunt nonnulli principem causam esse methodum, docendique rationem, quæ hodie in Grammaticæ scholis homines nostri utuntur: cum illa adeo perturbata, adeo obscura, & inanium præceptorum tricis undique implexa esse videatur, ut jam miseri adolescentes diutius Grammaticæ ambagibus, quam olim labyrintho Cretensi Theseus, immorari cogantur; ideoque meliores ætatis annos non in ipsa Romanæ linguae vi ac puriori stylo, sed in negotiosa ca-

no-

nonum minutissimorum congerie, appendicibus, scholiis, observationibus traducant: quarum diuturno & importuno tinnitu haud raro adolescentium aures & ingenia ita lassantur, ut ad ceteras disciplinas malint crudi adhuc & elingues festinare, quam in ipsis grammaticorum subfelliis turpiter consenescere. Alii vero emunctionis fortasse naris causam omnem hujusce damni esse dicunt, magistrorum optimorum inopiam: nimirum hoc ævo scholarum quidem maximam esse frequentiam, magistros vero perquam paucissimos. Vulgarem jam esse consuetudinem Grammaticæ institutiones literasque humaniores ab iis doceri, qui aliis ipsi magistris revera indigerent; atque artes illas, quas olim in scholis tradere consueverant senes primæ auctoritatis profundæque eruditionis, qui exemplo suo adole-

D

scen-

scntulos ad honestarum artium studia cohortari & quodammodo incitare, videbantur, ab imperitis modo hominibus ac novis pertractari, qui ad Orbilii ferulam non semel essent remittendi.

Quas quidem causas quanquam ego & perspicuas & gravissimas esse non dubitem; adhuc tamen gravio-rem aliam in medium asserre statui, ex qua supremum latini sermonis exitium ac pestem proficisci haud obscure intelligetis. Ad deturpandam enim latinæ linguæ castitatem nihil magis valere contendo, quam corruptæ depravatæque latinitatis libros frèquenter evolvere. Horum profecto familiaritate, horum commercio, ut in sole ambulantis evenire solet, latina oratio paulatim immutari consuevit, ac decolorari. Hinc tam multos nævos, hinc tot maculas ac sermo-

monis vitia contraximus . Cum enim
 omnis loquendi facultas necessario a
 nobis accipienda sit tum ex vocibus ,
 tum ex ea dicendi forma , quam vel
 auribus , vel lectione percipimus ; si
 legendi studio corruptas voces dicen-
 dique barbariem contraxeris , ser-
 monem quoque impositum ac semi-
 barbarum conflare necesse erit . Quid
 vero defæcatum ac purum ex lutu-
 lentis quorundam scriptorum libris
 haurire possis , in quibus præter la-
 tina aliquot vocabula , vel obsoleta &
 ab Evandri seculo repetita , vel recens
 in Latium temere immissa , nihil est
 omnino , quod Latium ipsum redo-
 lere videatur ? Et tamen tam multi
 hac nostra tempestate eo devenerunt
 amentix , ut optimis quibusque au-
 ctoribus valere iussis , semilatinos
 istos recentiores , fucis plenos , nul-
 lius succi ac sanguinis in deliciis &

amoribus habeant , libentius pervo-
 lutent , iisque solenne dicant sacra-
 mentum . Qua quidem re latino fer-
 moni fatum perniciosius esse non vi-
 deo ; præsertim vero si adolescentes ,
 quorum mentibus mollioribus , quic-
 quid ex lectione percipiunt , hæere
 solet tenacius , eo librorum lenocinio
 oblectari , atque iis diutius immorari
 consuescant . Quod enim in illis ne-
 que dictionis Tullianæ robur , neque
 Cæsaris , aut Livii perpolitam elocu-
 tionem , neque sententiarum vim ,
 leporem & elegantiam , quæ passim
 in Plauto , Terentio , Sallustio aliis-
 que compluribus nitidissimæ latinita-
 tis parentibus , minime reperirent ,
 & propterea in iisdem evolvendis
 oleum revera & operam perderent ;
 dolendum quidem esset vehementer ,
 sed tamen aliqua ratione ferendum .
 At vero cum ex ea lectione , aut bre-

vitatem hauriant sibyllinis foliis obscuriorem, aut ventosum ampullatumque dicendi genus, quod cælum ipsum audacia petit; cum tumultuariam ineptarum vocum congeriem, & desultoriam ubique orationem offendant; qua ratione fieri potest per Deum immortalem, ut tam pestiferam labem minime contrahant, neque in tam projecta latinæ linguæ corruptela periclitentur? Hinc profecto, hinc oritur affectata illa dicendi brevitats nostrorum hominum, quæ in antithetis frigidisque argutiolis tota est: hinc languida illa omnino & elumbis oratio, quæ plus æquo sententiosa videri amat: hinc comptula & fuco pigmentisque ad nauseam usque colorata eloquentiæ facies: hinc denique stylus in plerisque tam barbarus, inconditus & exoticus, ut non tam Romanam, quam Italicam dictionem foedissime oleat.

At

At fatalis hujusmodi librorum pestis ex eo mihi perniciosior esse videtur, quod homines eorum studio perinde ac Circæo poculo imbuti, a saniori judicio tam longe abeant, ut limatissimos quosque scriptores parvipendant, ac purissimæ latinitatis fucum omnino fastidiant. Quapropter ab ipsis Romanæ eloquentiæ princeps M. Tullius nimis verbosus nimique loquentiæ reprehenditur: imus ac pedester Virgilius: Florus ficcus ac jejunus; asper multisque in locis censoria virgula notandus Quintilianus. In qua quidem judicandi ratione, aut mentis omnino impotes, aut iis ægris simillimi esse videntur, quibus sapore ex ægritudine corrupto, optimus quisque cibus fastidio solet esse ac stomacho. Desipit nimirum insanis fucosæ latinitatis amatoribus nativa & inaffectedata latinæ linguæ
sim-

simplicitas . Desipit æquabile dicendi genus , gravitatem spirans & elegantiam . Desipit demum quicquid ampullis & sermonis granditate non resonat . Ac proinde Chærilos suos & Codros semper manu & ore fovent , iis impensissime oblectantur ; qua possunt , laudibus efferunt , & ubique prædicant . Quin etiam si quid virium ad scribendum , aut dicendum habeant , teterrimam illam sermonis corruptelam tam studiose minuteque affectant , ut nisi iisdem magistris suis amentiores , eorundem tamen amentiam haud parum feliciter æquasse videantur .

Quæ cum ita sint , Auditores , quis vestrum satis superque non intelligit supremum latino sermoni excidium ex depravatæ latinitatis lectione potissimum derivari ; ejusque fursuris libros tantopere perniciosos , ultra

Sau-


Sauromatas & glaciale Oceanum
 explodendos omnino esse, atque aman-
 dandos? Utinam ipsi eadem poena-
 rum severitate ex literaria Republica
 proscriberentur, qua expungi exter-
 minarique solent ex Catholico Orbe
 nequissima Novatorum volumina.
 Utinam iidem tam obvio ac facili
 publicæ lucis aditu intercluderentur.
 Nisi enim huic malo tandem tempe-
 stive occurratur, labentibus in diem
 & ad interitum vergentibus literis,
 si quæ adhuc ex latina lingua superest
 umbra, brevi ex hac Urbe prorsus
 totaque Italia evanescet.

Opem itaque vestram, Adolescen-
 tes optimi, implorat imminens lite-
 rarum calamitas & ultimum Romanæ
 linguæ discrimen. Vos veteris earun-
 dem gloriæ vindices assertoresque,
 ereptæ dignitatis estote. Vestrum sit
 studio ac labore efficere, ut exoticarum
 rum

rum dictionum pulsa barbarie , suus
 Romanæ linguæ splendor & politio-
 ribus disciplinis dignitas restituatur .
 Quod quidem nullo negotio perficie-
 tis , si ineptissimis rejectis libris , in-
 dustriam omnem studiumque in evol-
 vendis antiquis incorruptæque lati-
 nitatis auctoribus conferatis . Hos
 diligenter ac sæpissime legite : hos
 perpetuo manibus atque oculis per-
 volute , & ad verbum , si fieri possit ,
 ediscite . In horum vim , gravitatem
 & aculeos intueri maxime fructuo-
 sum . Horum sedula imitatione stylum
 elimatum , elegantiae plenum atque
 omnino latinum brevi comparabitis .
 In quo quidem imitandum vobis ob
 oculos ponite præclarissimum Urbis
 & Orbis exemplum , Pontificem Ma-
 ximum Clementem XI. , cuius sum-
 ma latini sermonis integritas & elo-
 quentia planè Romana non alios certe

redolet fontes , nisi veteres ac politissimos Romanæ linguæ scriptores . Ex diuturna horum lectione maturaque imitatione conciliavit sibi sapientissimus Princeps venustum illud , grave ac sententiosum dicendi genus , quod in eo & nos tantopere demiramur , & quandiu eloquentiæ honestisque artibus honor erit ac nomen , posteritas omnis immortalitati commendabit . Ego vero pro hoc publico eloquentiæ munere , quod mihi nuper ex singulari sua erga me beneficentia idem sanctissimus Pater demandavit , non nisi purissimum quemque latini sermonis auctorem publicis lectionibus interpretandum suscipiam ; & quantum in me erit , operam dabo , ut ingenui Adolescentes , qui huc literarum humaniorum studio conveniunt , ex assidua veterum optimorum librorum familiaritate atque usu

usu latini sermonis integritatem
 ament , eamque sedulo imitari stu-
 deant ; ut quantum fieri potest , ve-
 teri splendori Romana lingua resti-
 tuatur .



Eminentissimo Principi

ANNIBALI

S. R. E. Diacono Cardinali

ALBANO

SUMMI PONTIFICIS

CLEMENTIS XI.

FRATRIS FILIO

PAULINUS A S. JOSEPHO

Scholarum Piarum.



*Ogitanti mihi, PRINCEPS
EMINENTISSIME, cujus
sisterem patrocínio hanc,
non tam orationem meam,
quam causam bonarum
artium honestissimam, occurrit statim
Romanus Pontifex patruus tuus; cui
cum*

cum multis aliis nominibus, tum illo potissimum a me debebatur, quod cum ipse per omnem aetatem tam literatorum, quam literarum. & fuerit, & sit amantissimus Pater, iccirco hujusmodi argumento vim auctoritatemque maximam conciliasset. Sed quidam non inanis timor consilium vicit ac votum meum. Timui, ne ingratus illi ac molestus fierem, dum maxime gratus & officiosus esse contenderem. Cum enim de studiosis bonarum artium patronis tota res esset, ac nemini non esset exploratissimum, omnem illius vitam, fortunas ac dignitatem cum earundem bonarum artium studio ac tutela fuisse conjunctissimam, baud potui citra quandam communis existimationis labem de eodem in hac re omnino silere: quod tamen pro singulari sua invictaque modestia injucundum illi ac permolestum fore certo scio. Nam ipse, ut de M. Catone ait Sallustius, cum bonus esse malit, quam

quam videri, laudes omnes aversatur
 suas, iisque omnem, qua potest, aditum
 intercludit. Verum cum diu cognitum,
 mihi perspectumque esset, liberalium ar-
 tium patrocinium ad Albanam domum
 avito quodam & hereditario jure per-
 tinere, non tam difficile fore duxi alium
 quemquam ex ipsa domo humanissimum
 studiorum fautorem reperire, quam quis
 præ ceteris seligendus esset, statuere.
 Quandoquidem omnes, quotquot in ea
 sunt, viros doctos & eruditos comple-
 ti ac fovere impensissime solent, & ut
 de L. Lucullo legimus, literatorum fa-
 miliaritate magnopere delectantur. Ac
 quamobrem te aliis omnibus ex tam præ-
 clara familia præferendum esse non pu-
 tarem, Cardinalis amplissime, qui ut di-
 gnitate atque auctoritate, sic literis &
 sapientia longe ceteris antecellis? Te ita-
 que unum oratio hæc mea, seu potius opti-
 mæ artes, quarum causa instituta est, te,
 in-

inquam, unum implorant; tuoque fau-
 stissimo nomine ornari cupiunt ac pro-
 pugnari. Et sane earum causam desere-
 re non potes, nisi velis & tuam deserere;
 eas quippe omnes ita in te uno complecte-
 ris, ut cum ipsarum fortuna, qualiscun-
 que illa sit, necessario tibi conjunctio qua-
 dam ac societas intercedere videatur.
 Imo nisi id, quod revera est, dissimulare
 velis, splendidissimam illam, qua reful-
 get, Purpureæ dignitatem disciplinarum
 earundem beneficio præcipue referre de-
 bes acceptam: cum nemini obscurum sit,
 eam fuisse tibi propositam, non, ut alias,
 ex Pontificis amore, aut ipsius meritis
 impertiendam, sed tuis. Quibus vero,
 nisi optimarum artium præsidio instru-
 ctus, illam tibi judicii maturitatem &
 in rebus gerendis industriam comparas-
 ses, qua in levamen laborum ac Pontifi-
 ciæ sollicitudinis partem opportune venire
 posses, atque in Ecclesia & in Evange-
 lii

lio laborare cum Clemente? Nemini ergo mirum esse videatur, si diem, in quo tibi tandem ex Orbis totius suffragiis summaque Urbis lætitia, constitutus fuit amplissimus honor, singulari aliquo erga literas beneficio distinctum ac notatum maxime volueris. Cum enim tunc forte a transalpina Legatione Urbini commorareris, accepto vix Purpure delate nuncio, confestim te annuo censu Abbatie, quam Sanctæ Mariæ de Citria dicunt, ad annos aliquot abdicasti, ut ejusmodi liberalitatis subsidio ad nostrum Urbinate Collegium, paterna jam tum recens Clementis XI. beneficentia excitatum, ampliores scholarum sedes accederent. Qua quidem re illud aperte testatum esse voluisti, clarissimæ dignitatis accessionem te liberalibus disciplinis acceptam maxime profiteri, ac tuæ propterea voluntatis erga illas tam illustrem dedisse prærogativam. In quo id primo commendatione
di-

dignum esse putaverim, quod scilicet partem de annuo censu tibi detrabere eo ipso tempore non dubitaveris, quo intelligebas ad illud te evectum esse fastigium, quod quo magis a privati hominis fortuna recedit, eo graviores in rem familiarem ac servitium domesticum sumptus exigit necesse est. Eodem accedit, quod ea etate hoc ipsum feceris, qua nihil est, quod luculentiori Ecclesiae patrimonio magis obstarē posse videatur, quam ipsa cum Pontifice cognatio ac necessitudo. Iam enim Ecclesiastica bona, quæ ceteris quam latissime patent, iis, qui sanguine cum Pontifice conjuncti sunt, mediocritatis cujusdam lege ac terminis definiuntur. Quamobrem haud vulgare amoris tui indicium erga literarum studia tum plane exhibuisti, cum amplificandis Urbinate Collegii scholis aureorum aliquot millia liberalissime contulisti. Cujus quidem munificentiae memorem animum non

F

mo-

modo optimæ artes Collegii illius incolæ
 perpetuo habituræ sunt, sed universus
 quoque noster Scholarum Piarum Ordo
 hujusce liberalitatis memoriam tui nomi-
 nis immortalitati commendabit. Ego in-
 terim, ut tibi pro his aliisque præclaris
 erga nos meritis, ejusdem Ordinis totius
 nomine gratias agerem, exiguum hoc per-
 tenuis ingenii mei munus offerre statui.
 Quod tamen si ea, qua præditus es, hu-
 manitate exceperis, id mihi beneficii cu-
 jusdam novi instar erit; quo illud etiam
 efficies, ut majus aliquando gratæ erga
 te voluntatis meæ proferam argumentum.



DE

DE PATROCINIO BONARUM ARTIUM ORATIO II.

*Habita xv. Kalen. Novembris ,
anno MDCCXII.*



I quis vestrum fortasse
putet, Patres amplif-
simi, me hodierno die
ad dicendum iccirco
accessisse, ut intermis-
sum jampridem ac diuturna cessatio-
ne torpentem bonarum artium amo-
rem in adolescentium animis excita-
re eosque ad studiorum cursum ala-
crius instaurandum cohortari atque
inflammare contenderem, is certe fal-
litur, & ab instituti mei ratione lon-
gissime aberrat. Satis enim intelligo,
F 2 quæ

quæ ac quanta sit eorundem erga optimas disciplinas alacritas, quanta ingeniorum contentio ac doctrinæ cupiditas; cujus adipiscendæ studio partim patriam, qua nihil solet esse jucundius, partim fratres, aut parentes charissimos, partim ampla paternæ domus commoda, omnes profecto vacuæ dulcissimæque vitæ otium fortiter devoverunt. Quid igitur a me tam sapienter excogitari, aut pro scientiarum amplitudine tam diserte dici valeat, quod ipsos in anniversaria hac studiorum instauratione ad hujusmodi laudem magis incitare possit, & calcaria, ut ajunt, sponte currentibus addere? Id mecum cum ipse diu reputarem, illud tandem sese obtulit animo, me nihil ad rem opportunius, quodque magis bonarum artium dignitatem augeret, posse suscipere, quam si perantiqua illa disci-

sci-

disciplinarum laudatione prætermiſſa,
 pernicioſis quorundam hominum opi-
 nionibus occurrerem, quibus haud
 raro juvenes ab incoepto ſtudiorum
 curſu deduci ſolent, aut ſaltem ma-
 xime retardari. Percrebuit enim non
 modo Romæ, ſed & apud exteras na-
 tiones, literatorum quorundam ſer-
 mo, ſcientias hac noſtra tempeſtate,
 eam ob cauſſam nequaquam, ut olim,
 priſtina dignitate ac gloria vigere,
 quod nunc veteres illi optimarum
 artium Mecænates minime reperian-
 tur; ac proinde quod illæ plerunque
 intra mediocritatem conſiſtant, quod
 multis in locis aut miſere jaceant, aut
 in dies collabi videantur; id neque
 ſeneſcenti earundem artium ætati, ne-
 que effoetis ingeniorum viribus, ſed
 rei literariæ faventium paucitati o-
 mnino eſſe tribuendum. Quæ quidem
 opinio cum non ſolum fautores ipſos
 li-

literarum beneficentissimos , qui re-
 vera nunc sunt , haud mediocri inju-
 ria afficere , sed etiam in scientiarum
 existimationem infamiam quandam
 ac labem inducere videatur : rem to-
 tam diligentius examinare constitui ,
 & quoquomodo oculis consilioque
 vestro subicere ; ut illud tandem de
 re gravissima judicium feratis , quod
 contumelia propugnatoribus bona-
 rum artium illata, quod ingenuis inu-
 sta disciplinis infamiæ nota , quod de-
 nique sapientia vestra postulare vide-
 bitur . Illud itaque primo mature ac-
 curateque video mihi esse inquiren-
 dum , an revera patrociniæ penuriæ
 debeat æquo jure tribui vulgaris ea-
 studiorum ratio doctrinæque medio-
 critas , quam in multis nostrorum ho-
 minum esse conspiciamus ; cum tamen
 ipsi ea ingenii facultate sint præditi ,
 ut primum eruditionis locum sibi vin-
 di-

dicare potuissent . Deinde omnes industriæ vires eo conferam , ut planum faciam , unumquemque literatorum , posse , si velit , sibi studiisque suis amplam conciliare fortunam . Quod quidem argumentum cum sit hujusmodi , ut non modo ad amplificandam bonarum artium dignitatem accommodatum esse videatur , verum , etiam commodum maximeque idoneum incitandis juvenum animis præmiorum spe ad earundem bonarum artium studia diligentius repetenda : profecto dubitari non potest , quin & illud clarissimis istis disciplinarum magistris summopere probeatur ; tum etiam vobis futurum sit jucundissimum , amplissimi Patres , qui ad sustinendam Romani hujusce Archigymnasii existimationem & nos per omnia humanitatis officia profequi consuevistis , & quantum in vobis

bis est, in id enixe incumbitis, ut in dies bonarum artium splendor augeatur.

Acerba quidem ac permolesta, semper fuit eorum querela, qui in Mecænatum paucitatem mediocritatem bonarum artium omnino rejiciunt. Quorum inveterata opinio ne videatur, quasi indicta causa, a nobis velle damnari, eam vobis quam brevissime potero, in hoc ipso orationis aditu exponam. Quot sunt, dictitant, hac nostra ætate præstantissimi ingenio viri, qui prope summum scientiarum verticem attigissent, si studiosum ac beneficum ducem hortatoremque sibi æqua obtulisset fortuna? Essent nimirum nostra quoque hac tempestate, qui cum ipso Romanæ eloquentiæ antesignano de doctrinæ principatu dicendique facultate contenderent. Neque hodie deessent nobis

bis, qui summis illis Poetarum magistris Terentio, Virgilio & Horatio diem indicerent, eosque quasi verbo Prætoris de veteri gloriæ possessione deturbarent. Enim verò ubi nunc principes illi viri, bonarum artium firmamenta doctrinæque præsidium, qui ad alendos sustentandosque literarum cultores ab ipsis propemodum Gratiarum manibus facti esse videbantur? Innumeris quidem clarissimis ac veluti primæ magnitudinis luminibus literaria careret Respublica, nisi summo scientiarum bono superiores ætates patronos musarum munificentissimos attulissent. Nam neque Euripidem, aut Pindarum poetica, neque eloquentia Demosthenem, aut Socratem philosophia tantopere prædicaret, cum ii omnes tum propter infimum fortunæ gradum, tum propter rei familiaris angustiam ad artem po-

G

tius

tius aliquam facitandam, quam ad
 literarum otium nati esse viderentur.
 Memoria quippe proditum est Euri-
 pidis matrem vitam vendendis oleris
 bus tolerasse; & quemadmodum tibi-
 cinis filium fuisse Pindarum, ita Socra-
 tem ex tenuissima obstetrice procrea-
 tum accepimus. Quid vero de De-
 mosthene, qui fabrilis genere ortus in
 obscura ferramentorum officina a pa-
 rentibus susceptus fuit atque educa-
 tus? Quamobrem quæ divinis adeo
 ingeniis otia studiorumque rationes
 pertenuis fortunæ paternæ census de-
 negaverat, iis cumulatissima ac planè
 regia donavit Mecænatum beneficen-
 tia. Etenim Macedoniæ Rex Arche-
 laus Euripidem, Pindarum vero Hie-
 ron Syracusanus aluit summaque
 liberalitate complexus fuit; ac sicuti
 divinum quoddam tutelæ numen in
 præclarissimo Græcorum Imperato-
 re

re Alcibiade invenit Socrates, ita singulos Reipublicæ Atheniensis cives Statorem quasi Jovem Demostheni fuisse non ignoramus.

Et quidem rei literariæ hostem, importunum, feralem acerbissimumque, domesticam egestatem esse non putet, qui minime videt, quot præclara ingenia in dies conficiat exterminetque publicæ, aut privatæ inopiæ calamitas. Quis enim, cui res domi angustior sit; magnopere curet purioris latinitatis elegantias ex Plauto, vel Terentio feligere, aut Aequi-ponderantium leges cum Archimede, aut sectionum Conicarum acumina cum Apollonio contemplari, aut denique Democriti, seu Aristotelis opiniones inquirere? Acrior illi profecto inest sollicitudo de minuenda rei familiaris difficultate, quam de excolenda augendaque eruditione; studium-

que ponet vehementius in nova aliqua victus sibi comparandi ratione, quam in perscrutando ex antiquitatum ruderibus, quænam fuerint Græcorum leges & instituta, quinam vetustissimi Urbis hujusce ritus, mores atque consuetudines. Quotidiana siquidem ac permolesta alendæ vitæ cura, præterquam quod meliorem diei partem de literaria contemplatione detrahit, illud etiam affert haud vulgaris incommodi, quod virum honesto loco natum ita commovet ac perturbat, ut deinceps optimarum artium studio imparem se omnino sentiat minimeque idoneum. Quod quidem malo didicit suo officina illa leporum atque elegantiarum Ovidius, quem promptiori ad carmina ingenio, quam unumquemque nostrum ad verba adeo fuisse legimus, ut vel ejus ore musæ, vel ipse musarum ore

orē loqui putaretur. Is enim ubi primum amandatus in Pontum egestatem afflictaeque domus praesensit calamitatem, se statim non tam Diis penatibus, fortunis, conjuge liberisque destitutum, quam ingenio ac divina illa mentis ubertate exhaustum confectumque ingemuit; cum ne meditatione quidem diuturnoque studio ea consequi posset, quae antea sponte sua ac propemodum ipso invito effluere videbantur. Quod sane admiratio-
 ni tantum iis esse poterit, qui non intelligant, eam esse studiorum naturam, ut animum sibi ab omni perturbatione vacuum maximeque tranquil-
 lum postulent. Neque alia de causa crediderim veteres in edito monte musis domicilium posuisse, quam quo clarius significarent, supra omnem curarum aleam illos esse oportere, qui optimis disciplinis solenne
 dixif-

dixissent sacramentum . Quo pacto igitur studiis præstantioribus ii operam navent , qui perpetuis curarum jactantur fluctibus , neque ullam habent , in quam se recipiant , quietis ac tranquillitatis stationem ? Qua ratione ea ipsa studia , quæ primis veluti lineamentis ac rudi penicillo leviter adumbraverant , aliquando absolvant atque perficiant , nisi possint horam exiguam per honestissimum otium traducere ?

At vero dubia hic vestrum ora haud obscure illud indicare videntur : esse nimirum in hac Urbe totaque Italia innumeros pene viros , qui cum non minus præstantissimum a natura ingenium , quam opulentas a majoribus suis facultates otiumque acceperint , singularis tamen doctrinæ laude supra vulgus haudquaquam excellent . Præterea plura hodie in tot religiosis
fa-

familiis , quam olim Athenis , scientiarum patere lycea , quæ hominibus ingenio pollentibus literarum otium solitudinemque præbeant abundantissime . Immerito igitur domesticæ difficultati , aut Mecænatum penuriæ vertitur , si plerique eorum , qui primos in literis ordines ducere potuissent , gregarios inter milites agant . Ac propterea quod illi mediocriter eruditi , quod semidocti in litteratorum plebe numerentur , eorum profecto vitio dandum , quod ad alta nati humi repere malint , & excellentius quicquam audere cum possint , minime curent . Quid ? minime curent ? Equidem curarent , opinor , si propositis præmiis , ac veluti sublato ad meliora sperandum signo , cohortarentur & ad studia sua diligentius expolienda , ac magis accurate cogitateque limanda inflammarentur . Quemadmodum
enim

enim Miltiadis Imperatoris trophæa Themistoclem ad præclara facinora e somno excitarunt; ita innumeros fere homines per hosce dies videremus, qui veterno excusso, pro aris focisque decertaturi in arenam summa literarum gloria descenderent. Verum si quis forte in ea opinione versetur, quod ad promovendam doctrinæ laudem satis superque sit hominibus ingenii vim, quietem otiumque suppetere, præmiorumque spe nulla optimas disciplinas ali posse atque augeri; is plane studiorum indolem doctrinæque naturam minime novit. Neque enim scientiarum iter tam planum; aut ita violis rosisque consitum esse, quisquam prudens existimaverit, ut illud percurrentibus nulla reluctetur difficultas nullusque labor. Quocirca vos, Patres amplissimi, & quotquot hic adestis bonarum artium aut asse-

clæ,

clæ , aut professores , testes appello .
 Vos quippe diuturno didicistis ex-
 perimento , quam negotiosam gra-
 vissimamque provinciam is subeat ,
 cui in liberali aliqua facultate prin-
 cipatus tenendi cupiditas innascitur .
 Prætereo siquidem omittendas esse ,
 ut admonet disertè M. Tullius , volu-
 ptates omnes ; & non modo ludum ,
 jocum atque convivium , verum
 etiam sermonem ipsum omnium pe-
 ne familiarium deferendum . Præte-
 reo illa eadem delectationis studia
 relinqui oportere , quæ cum natura-
 lem quandam cum ingenio cognatio-
 nem atque affinitatem habeant , si de-
 ferantur , maximum & incredibile
 sui creant desiderium . Mitto , inquam ,
 hæc omnia tanquam nullius , aut per-
 exigui putarentur esse momenti . At
 quis non intelligat , quot annos ad
 primas doctrinæ laudes consequen-

H das

das in literario pulvere vehementer enixeque sit desudandum? Quot labores molesti ac difficiles ineundi? Quot dies noctesque permagno valetudinis incommodo summoque etiam nonnunquam vitæ discrimine libris rerumque contemplationi inhærendum? Nam quæ tam firma corporis valetudo, aut tantus animi vigor, quem pertinax studiorum contentio paulatim infringere non soleat atque omnino labefactare? Dubitari plane non potest, quin ex ipsa studiorum assiduitate importuni sæpe ac maxime periculosi procreentur morbi, qui aut vitæ curriculum intercipient, aut vires tam graviter conficiant, ut cum iisdem ad extremum usque spiritum necesse sit misere colluctari. Quod igitur non solum maximis laboribus, sed etiam dura corporis afflictatione summoque capitis periculo comparari debet,

bet, tametsi in eo honestas sit plurima, raro homines, præmio nullo proposito, persequuntur. Quinimo plerique ab ipso prorsus abhorrent, quod scilicet vitam, qua mortalibus nihil potest esse jucundius, ea vivendi consuetudine perditum iri intelligant.

Satis igitur opportune Romana Respublica tot tantisque honoribus amplissimisque præmiis rei militaris studium cumulavit, ut in illis summatim & quasi compendio recensendis Alexander ab Alexandro, Rosinus, Lipsius, Grævius alique complures integra pene volumina confecerint. Noverant quippe sapientissimi viri ad ejusmodi vitæ genus laboris maxime plenum ac periculi nisi homines præmiorum novitate ac magnitudine allicerentur, perpaucos fore, qui tam gravem ac periculofam vivendi rationem pro salute civium, aut

sola gloriæ cupiditate susciperent . Cum itaque literarum studia diuturnitate laborum militarem disciplinam facile superent ; neque minus ex hac domestica & umbratili studiorum , exercitatione ac pugna , quam ex hostium medio agmine sit capite periclitandum , mirum non est , si fere nemo reperiatur , qui sola gloriæ spe nulloque præmio ductus tam difficilem ac plenam alex provinciam subeat . Fuit , fuit quondam ista in literaria Republica virtus , ut pro literis homines non modo bona , fortunas ac patriam , sed ipsam quoque vitam , si opus esset , constantissime offerrent ; neque aliud præmium , quam doctrinæ laudem , aut præclaram quampiam veritatis notitiam quærerent . At relanguit jampridem vetus ille studiorum ardor gloriæque cupiditas , quam nisi tempestive Mecænatum benefi-

cen-

centia excitet atque inflammet, de literis actum erit omnino. Quapropter quod ipsæ nunc apud exteras nationes, ubi olim in sordibus situque jacuerant, potissimum vigeant, quod mirum in modum efflorescant, id sane singularis munificentia præstitit potentissimorum Principum, qui vel inter diuturnos bellorum strepitus & quotidianas armorum sollicitudines optimas disciplinas ali ac foveri posse raro quodam liberalitatis exemplo demonstrarunt. Quamobrem nisi vetèrem Italiæ gloriam cum exteris gentibus in contentionem literariæ existimationis vocare iniquum esse videretur, aut me hominem in Italia natum eas ipsis doctrinæ primas, quas illæ sibi arrogantius fortasse tribuunt, ultro velle permittere; hic jam in medio proponerem, quousque apud illas regiæ beneficentiæ cumulus bonarum

ar-

artium fortunam amplificaverit, & ad summum prope honoris gradum evexerit. Nullam quidem ex ingenuis artibus scientiarumque ordine esse videretis, quæ nova aliqua gloriæ accessione non prodiret ornatior longeque illustrior. Videretis Ecclesiasticam historiam antiquis expiatam anacronismis dubiisque locorum anfractibus expeditam ad exactissimas Chronologiæ leges ac Geographiæ normam, optime restitutam. Videretis Theologiæ majestatem jam inanum quarundam quæstionum labe vindicaram ac Sanctorum Patrum præsidio ita communitam, ut deinceps bacchanti hostium audaciæ non sophistarum nugæ, sed sanctissimorum hominum religionem, non levium syllogismorum ratiunculas, sed solidam Catholiciæ veritatis doctrinam opponat. Quid vero Geometriam, quid Analy-

lyticam, Mechanicam, Astronomiam
 ceterasque Mathematicas disciplinas,
 quas omnes eo amplitudinis evectas
 esse prospiceretis, ut audeant jam ad
 veterem Græciæ gloriam provocare?
 Quid multijugem Romanarum Græ-
 carumque antiquitatum eruditionem,
 Critices studium ac pene omnium
 notionem linguarum? Et quidem ea-
 rundem omnium bonarum artium
 hanc unam esse vocem audiretis ora-
 tionemque communem: Quod nos,
 vetustatis squalore posito, splendi-
 diorem faciem vividiorumque conse-
 quutæ simus, quod tot tantisque au-
 ctæ ornamentis ad maximum & vix
 optandum dignitatis fastigium per-
 venerimus; id non tam cedit in lau-
 dem doctissimorum hominum, qui
 nos multo labore multisque suis vi-
 giliis expolire & elegantius ornare
 conati sunt, quam singularis benefi-
 cen-

centiæ nostrorum Principum , qui amplissima dona in literatorum sinum largiori manu effuderunt . Horum sane liberalitas clarissimos undique, professores excivit , qui nos jacentes erigerent erectasque magnificentius exornarent . Horum beneficio acceptum referimus domicilium , quo nos extorres egentesque perbenigne receptæ sumus . Horum largitati opes, fortunas, honores: horum studio . Sed satis , jam satis . Haftenus enim, Auditores , non tam mea , quam eorum, qui bonarum artium mediocritatem Mecænatum crimini vertunt , vetus ac permolesta fuit oratio . Quæ cum meliorem partem temporis ejus, quod mihi definitum fuerat ad dicendum, surripuerit ; video jam me iis premi angustis , ut , ne diutius abuti videar patientia vestra , eorum , quæ initio dicenda mihi proposueram, necessario

com-

compendium faciam? Illud itaque primum contendo in hac Urbe, præcipua bonarum artium sede, hujusmodi querimoniam locum nequaquam posse patere. Si quis enim ea esset audacia, ut assereret, ullo unquam tempore in Urbe Roma defuisse certissimos munificentissimosque literarum fautores, hunc impudentiam ac mendacii graviter coarguerent hæc ipsa faxa ac parietes, qui summam Leonis X. beneficentiam erga optimas disciplinas testatam maxime faciunt; atque omni posteritatis memoriam prædicant, Leonem X. ad perpetuum literarum ornamentum Romanum hoc Archigymnasium instaurasse, ac bonarum artium magistris perampla decrevisse stipendia. Deinde etiam, reliquorum Summorum Pontificum serie ducta, nullo negotio demonstraretur, Romæ literas potius deesse potuisse, quam

literis patrocinia . Quis enim , ut antiquiores ætates missas faciam , Gregorios , Urbanos , Alexandros , Clementes , Innocentios Pontifices Maximos memoria repetat , qui in illis præsidium ac firmissimum propugnaculum literas habuisse non videat ? Quid vero nunc de Clemente XI. Pontifice sapientissimo ac bonarum omnium artium amanti-
 tissimo ? De quo in hac re præsertim tametsi , ut de Carthagine ait Sallustius , tacere satius sit , quam pauca dicere , nemini tamen vestrum obscurum esse arbitror , illum tam bene de optimis disciplinis jam esse meritum , ut quas aliorum Summorum Pontificum immortalitati statuas , signa ac monumenta in Capitolio ceterisque publicis in locis Senatus Populusque Romanus posuit ; vel quod illi elegantiorē Urbis formam induxerint atque ampliorē , vel quod veteres obeliscos , aut
 mar-

marmoreas columnas ad eam ornam-
dam erexerint, vel tandem quod uber-
rimis aliunde derivatis aquis, non
tam fontes, quam flumina in Urbem
commode invexerint; eæ omnes Cle-
menti XI. cum iis nominibus, tum-
maxime literarum titulo, tanquam
literarum earundem literatorumque,
parenti beneficentissimo excitandæ esse
videantur: Etenim quænam opes, qui
honores, qui magistratus, aut quæ di-
gnitas in Urbe fuit, quam a studio-
sissimo literarum Principe consequi
non potuerit qualiscunque honestissi-
mam bonarum artium commendatio-
nem cum integritate morum conjun-
ctam præferret, etiamsi homo exte-
rus ac transalpinus hospes Romam
advenisset? Quocirca illud satis sit di-
cere, quod Purpuram ipsam, maxi-
mum ac singulare Pontificiæ amplitu-
dinis præmium, eloquentiæ ac doctri-

næ venalem fuisse expositam vidimus.

Quæ cum ita sint, Auditores, superest jam, ut eo, quo altera orationis pars sponte sua vergere videtur, animum intendatis, dum brevissime doceam quonam pacto unusquisque litteratorum sibimet studiorum suorum comparare possit vindicem ac patrum. Quod quidem statuo nemini fore difficile, si labore industriaque conetur doctrina ac literis inter ceteros eminere. Sit enim quispiam latini sermonis elegantia politus, aut singulari dicendi facultate ornatus, seu mathematico in pulvere egregie versatus, hunc procul dubio principes viri honore prosequi, hunc civitates publica quasi legatione accersere, hunc reges maximis præmiis ad se pertrahere, summo studio ac voluntate certabunt. Quod sane argumentum non modo antiquioribus repetitis exemplis, verum
etiam

etiam recentissimis rebûs planum,
 omnino facere possem, nisi aut doctif-
 simorum hominum amicitia nimis
 tribuere, aut eorum existimationi de
 industria blandiri velle viderer. At
 quos tandem quæso literatorum præ-
 ceteris majores nostri fovere summo-
 que loco habere consueverunt, nisi eos
 tantum, qui ingenio doctrinaque ma-
 gnopere excellerent? Platonem qui-
 dem tantam a Dionysio Syracusano
 gratiam iniisse compertum est, ut ei
 Syracusas advenienti non solum Rex
 idem obviam ierit, sed etiam regali
 rheda, cujus Rex ipse moderabatur
 habenas, exceperit, ac triumphali
 plausu ingentique populi acclamatio-
 ne in urbem advexerit. An Clinia,
 an Tymæo, aut Philolao aliisque
 sexcentis, qui per illud tempus in
 maxima frequentia erant philosophi,
 obvium se dedit Dionysius, curru re-

ce-

cepit suo , & ad ampliorem triumphī
 celebritatem idem ipse regio paluda-
 mento ornatus aurigam egit? Tanta
 profecto honoris amplitudo nequa-
 quam iis defertur , qui philosophan-
 tur in triviis , aut barba tenus philo-
 sophi, ut ait M. Tullius, existimantur;
 sed illis sine controversia debetur , qui
 optimarum rerum cognitione atque
 exercitatione philosophi personam
 gravissime sustinent . Unus itaque Pla-
 to honorificentissime excipitur , unus
 opibus fortunisque a Syracusano Re-
 ge cumulatur , quod unus inter cete-
 ros præstantiori doctrina caput extol-
 lat , quod unus ingenii ac philoso-
 phiæ princeps , quod denique unus
 tantam sibi apud omnes conciliaverit
 auctoritatem , ut ipse Romanus orator
 cum Platone errare , quam cum aliis
 philosophis vera sentire maluisset . At
 fortasse id temere factum , & ad Pla-
 to-

tonis fortunam plus habuit momenti
 libido Principis & arbitrium, quam
 sapientiæ singularis prærogativa. Ac
 proinde quod quispiam, quemadmo-
 dum Plato, aliquem studiorum suo-
 rum vindicem habeat liberalissimum,
 id non tam doctrinæ conditioni, quam
 præclaro fortunæ beneficio tribuat ne-
 cesse est. Ita ne verò? At Reipublicæ
 literariæ annales diligentius evolvant,
 qui hoc modo ratiocinantur. Id unum
 ætatum omnium consensu atque au-
 ctoritate firmatum invenient, eos vi-
 delicet tantum gratia ac liberalitate,
 Principum floruisse, qui non litus le-
 gere, sed in altum disciplinarum pro-
 vehi minime dubitaverint. Heroicis
 enim illis bonarum artium temporibus,
 in quibus cum cædem insigniter
 vigerent, tanta quoque erat philoso-
 phorum poetarumque copia, ut si-
 cuti exercitus in legiones & cohortes,
 ita

ita illi in sectas ordineque dividerentur, eos duntaxat apud primarios viros omni humanitatis officio receptos fuisse accepimus, qui earundem bonarum artium haberentur instar imperatorum. Patebat quidem Cæsaris Augusti domus clarissimis poetarum ducibus Publ. Virgilio & Q. Horatio, quam tamen Chærilis & Cluvienis aliisque ejus notæ versificatoribus patuisse non legimus. Cum illis scilicet, quod & acumine ingenii & elegantia styli ceteris palmam eripuissent, humanissimi Principis familiaritas omnis erat atque conjunctio; eorum aspectu, sermone atque consuetudine frequentissime recreabatur.

At piget me tandiu exemplis hujusmodi esse immoratum, qui rem ipsam statim oculis subjicere quodammodo potuissem. Quid quæso est, Auditores, quod ex popularibus hisce artibus

tibus ea ipsa , quæ aliis fructus insignes contulit , eadem aliis decoquere soleat nulloque esse adjumento ? Nam quotidie videmus nonnullos cælandi , aut pingendi studio haud mediocres sibi fortunas comparasse , quibus artibus alii vix tantum pecuniæ trahant , quantum tolerandæ quoquomodo vitæ sit satis . Nonne discrimen hoc ex eo potissimum ducitur , quod cum illi præclari castigatique opifices , hi contra mediocriter in ea facultate versati esse existimentur , si quod affabre accurateque elaborandum sit opus , rejiciuntur hi , invitantur illi , ac per honorifica mercede proposita conducuntur ? Studiosos itaque sui ac pene dixerim Mecænates habent cælandi , aut pingendi artes , modo eæ vulgares nequaquam esse censeantur . Utilitatis afferunt plurimum , non inficior ; sed iis tamen , qui ingenio industriaque

K

ad

ad earundem artium principes propius accesserint . Præterea florentissimæ illæ duæ artes , Medicina ac Jurisprudentia , in quibus præ ceteris omnibus , ut sermo communis invaluit , opes maximas atque honores fortuna collocasse creditur , an tales sunt , ut earum præsidio homines honori opibusque feliciter velificentur tametsi iisdem leviter tincti nullum sibi nomen existimationemque confecerint ? Fautores certe non habent plurimos , qui ægrotos medicaminibus , aut qui legum formulis jugulant patrimonialia . Verum qui in istiusmodi facultatibus præstantissimi recensentur , eos gratiam inire auctoritatemque apud optimates sibi conciliare videmus , eosque ad amplificandas fortunæ copias , aut ad honores maximos consequendos viam sibi munire expeditissimam . In quo quidem orationi
 meæ

meæ firmiorem , quàm opus sit , si-
dem complures , quos hic video esse ,
viri clarissimi exemplo suo satis com-
mode faciunt . Quemadmodum igitur
quod ejus generis artes nonnullis fru-
ctuosæ non sint , imo potius jacentes
ac steriles , impudentia singularis esset ,
id non tam professorum mediocritati ,
quam earundem artium vitio , aut ini-
quissimæ temporum conditioni tri-
buere ; ita fere intolerabilis videtur
esse eorum audacia , qui ex levi qua-
dam literarum umbra cum neque
opes , neque fortunas trahere potue-
rint , literas ipsas jacere clamitant ,
nullosque per hosce dies inveniri bo-
narum artium patronos , nulla super-
esse studiorum præmia . At desinant
tandem aliquando desinant per Deum
immortalem tam impudenter ac stul-
te conqueri . Ipsi profecto jacent , non
artes . Iphis utpote feriatis remissis-

que ingeniis defunt semperque deerunt patrocinia, nunquam vero strenuis literarum cultoribus. Præmia nulla extant; sed ipsis mehercule nulla, qui oscitantes ea consequi neque labore, neque industria conantur. Excellendum est itaque præstantiori disciplinarum studio, excellendum: tum vero deesse non poterunt præmia, neque fautores munificentissimi; cum minime defuerint in hac urbe; ut recentiores consulto præteream, Francisco Philelpho, Pomponio Læto, Jano Parrhasio, M. Antonio Mureto sexcentisque aliis primariæ eruditionis viris, qui egregia quapiam doctrinæ laude floruisse; cum memoriæ traditum sit eundem Muretum Romæ ad politioris literaturæ & eloquentiæ ornamentum annuo fuisse mille aureorum stipendio Gregorii XIII. liberalitate donatum. Non defuerunt,

in-

inquam, non solum ingētes opes, sed etiam amplissimæ dignitatis splendor Petro Bembo, Jacobo Sadoletto, Guilielmo Sirleto, Cæsari Baronio, Roberto Bellarmino aliisque quamplurimis; qui quandoquidem eruditionis ac doctrinæ præstantia se supra ceteros extulissent, Summorum Pontificum providentia, sedula semper meritum indagatrix, fecit, ut dignitatis quoque amplitudine ac purpura supra ceteros emerent.

Quæ cum ita se habeant, vos jam probe intelligitis, Adolescentes optimi, quousque vestra ducenda sint studia, quo ætatis, quo industriæ nervos intendere oporteat, ut studiorum fructus feratis locupletissimos atque pulcherrimos. Non vulgaris doctrinæ ratio, non popularis quædam mediocritas, sed summus scientiarum apex fortiter est attentandus, si optimas disci-

sci-

ſciplinās maximo vobis uſui & orna-
 mento eſſe velitis. Quamobrem ne,
 patiamini ab ſuſcepto ſtudioꝝ cur-
 ſu deduci, aut ſaltem induſtꝛiam ve-
 ſtꝛam retardari ex pernicioſis eozum,
 ſermonibus, qui vulgato quaſi pro-
 verbio dictitant, jam bonarum artium
 ſtudia proſtigata eſſe ac prope depoſi-
 ta, quod neque ſint hac noſtra ætate
 literarum præſidia, neque ulla ut olim
 propoſita muſis præmia. Contemni-
 te, obſecro, ac pro nihilo ducite,
 querelas ejuſmodi inaneſque clamores.
 Sunt equidem Romæ, ſunt maxima
 literarum præmia, ſunt ſtudioꝝ
 fautores propugnatoꝛeſque graviffimi,
 neque defuerunt unquam: & ſi antea
 deſuiſſent, certe Clemente XI. Pont.
 Max. non deerunt; qui cum ſit & omni
 doctꝛinæ genere cumulatiſſimus, &
 tot jam tantique argumentis volun-
 tatem ſuam in bonarum artium ſtudia
 ſi-

significaverit , omnem vobis profecto dubitandi locum eripuit, quin Romæ ad opes, ad magistratus, ad imperia, ad purpuram etiam ipsam innocentia vitæ ac doctrinæ nobilitate assequendam aditus universis pateat amplissimus. Cum igitur tam liberum unicuique vestrum sit beneficentissimi Principis animum promereri, quam literis & eruditione excellere; jam plane cognoscitis Mecænates vobis minime defuturos, nisi per otium inertiamque vobis vos ipsi defueritis. Quod quidem eo gravius esset reprehendendum, quo major est horum clarissimorum diligentia professorum quorum labores in hoc Romano lyceo utilitati vestræ serviunt, quorum conatus omnes, vigilæ ac studia ad vos ornandos erudiendosque maxime referuntur. Vestrum igitur sit pari animi cura ac diligentia efficere, ut
eo-

eorundem labori industriæque maximus in vobis uberrimusque fructus respondeat ; atque hinc ea consequi possitis dignissima præmia , quæ vobis non minus Romani Pontificis beneficentia, quam doctrinæ amplitudo ac præstantia pollicentur .



San-

Sanctissimo Domino Nostro
CLEMENTI XI.
PONT. OPT. MAX.

Paulinus a S. Iosepho Scholarum Piarum.



TANTUM abest, ut conqui-
rendæ sint causæ, cur tuo
potissimum nomini, CLE-
MENS Pontifex Maxime,
hanc Orationem inscri-
bam, ut potius sive argumenti magnitu-
do, sive loci, ubi habita est, dignitas
spectetur, ea jure suo omnino ad te perti-
nere videatur. Beneficentiam quippe il-
lam & amorem erga bonarum artium
studia plane singularem, quem in Leo-
ne X. suspeximus & admirati sumus, ec-
quis in te pariter maximum & flagantis-
simum

L

simum

simum esse non videat? Neminem profecto latet optimas disciplinas per omnem tibi ætatem usque eo a prima pueritia in deliciis fuisse & amoribus, ut deinde in omni fortune gradu iis magis semper quam tibi met vixisse videaris. Itaque non est, cur miremur, quod hoc ipsum Romanum Archigymnasium, per antiquum bonarum artium domicilium, tam sapienter splendideque a Leone X. instauratum, a te eximie diligere tibi que præcipue cordi esse intelligimus. Quinetiam, si per summam turbulentissimorum temporum difficultatem id licuerit, aliquando fore speramus, ut quam olim in amplissimo hoc loco sub Leone consecuta fuerunt optimæ artes celebritatem, ea, te Pontifice, deesse nullo modo possit. Quod plane efficit, si ea ipsa, quæ ad sempiternam Academiæ hujus dignitatem præsidiumque Leo sapientissime decrevit, quæque jam nonnihil temporum vicissitudo immu-

tauit, pristino juri restituas. Hinc enim erit, ut quæ per Orbem univversum latissime Archigymnasii hujus pervagata est fama, sub literatissimo Principe maxime vigeat; neque sit, cur Leonis ætati, quæ aurea literarum ætas fuisse dicitur, nostris hisce temporibus quisquam invidet. Quod profecto si semel eveniat, quibus tum laudibus nomen tuum ad cælum efferemus? Quas immortales gratias hæc tibi nostra Academia publica auctoritate quotannis persolvendas statuet? Sed ut ut hæc sint, ego is plane non sum, qui ventura tempora recentioresque causas consecrari debeam, propter quas me tibi quam maxime obstrictum esse profitear. Tot jam præclara in me meritorum tuorum suppetunt argumenta, ut ingratus omnino essem atque immemor, nisi ea, quæ acceperim, quanti a me faciendæ sint, satis agnoscerem, idque aliqua saltem significatione testarer. Quorum vero

*præcipue beneficiorum nomine? Eorumne,
 quibus nostrum Scholarum Piarum Ordinem
 tam liberaliter cumulasti, tot præsertim
 Seminariis, aut Collegiis, Albæ, Cortonæ,
 Rheate, Amalphi, Urbini beneficentia tua
 insigniter amplificatum? Magna quidem
 sunt hæc ac sane digna, ut noster ipse
 Scholarum Piarum Ordo universus te
 parentem beneficentissimum perpetuo &
 agnoscat & colat & veneretur. Cum
 tamen mihi cum nostratibus omnibus
 communia ea sint, non tam privati unius
 hominis, quam commune omnium exigunt
 grati animi monumentum. An igitur
 beneficii ejus, quod proprium est, nomine
 gratias agam, quod videlicet perhonorificam
 mihi eloquentiæ in hoc Romano Archigymnasio
 provinciam dederis, ac me nominis prope
 nullius hominem ad summam hujusce loci
 celebritatem evexeris? Id certe, si ve
 ingenii mei mediocritas, si ve loci hujus,
 qui*

qui eloquentissimo cuique semper patuit,
 amplitudo spectetur, majus est, quam
 tibi unquam pares pro beneficio gratias
 agere possim. Longe tamen majus est ali-
 quid, quod splendore suo cetera obruit;
 & quod mihi maximi ac præcipui benefi-
 cii loco semper erit, diligentiae scilicet in-
 dustriæque meæ demandasse ornatissimum
 & ad virtutis indolem plane factum ju-
 venem fratris tui filium ALEXANDRUM,
 ut in bonarum artium studio ei quasi ma-
 nu facem præferrem, & commostrarem
 viam, qua per summa quæque virtutis
 majorum suorum vestigiis insisteret. Id
 certe tanti apud me est, ut ceteris omni-
 bus, quæcunque illa sint, beneficiis tuis
 silentio prætermittis, hoc unum potissi-
 mum esse censeam, atque hoc tantum uno
 me gratum ac memorem esse maxime cu-
 piam. Etenim cum non deessent homines
 ingenii & eruditionis fama præstantes,
 qui ad hoc munus obeundum impense stu-
 dium

dium atque operam profitebantur suam, ea tamen fuit tua humanitas, ut me militem quasi gregarium iis præferri velles, qui primos in literis ordines ducere videbantur. Quanvis autem non ita me ignorem, ut id mihi tribuam, & non tue potius humanitati, quam tenuitati meæ acceptum ferendum esse videam; malui tamen tam præclari commemoratione beneficii modestiam meam in suspicionem vocari, quam ingrati animi notam mihi ejus silentio inuri. Quia vero id satis esse nullo modo potest, ut aliqua saltem ex parte hujusmodi beneficentiæ respondeam, si nulla alia re, at certe industria ac diligentia operam dabo, ut studiorum cursum multa jam cum laude susceptum clarissimus idem Iuvenis ita aliquando absolvat perficiatque, ut tua de me judicia sustineat; atque ipse perpetuum extet tibi memoris gratique animi mei monumentum.

DE

DE LAUDIBUS LEONIS X.

In anniverfariis ejus parentalibus

ORATIO III.

Habita VII. Idus Februarii, anno

MDCCXIV.



I ullo unquam tempore
 Urbem hanc ingenti
 luctu ac mœrore pro-
 pmodum incredibili
 concidisse putaverim,
 ut plangor in tectis, in templis æta-
 tum omnium concursus, silentium
 in curia, vastitas & solitudo in foro,
 ubique mœstissima rerum facies ob-
 versaretur; tunc, opinor, fuit, cum
 importunus & universo populo Ro-
 mano gravissimus rumor percrebuit,
 Leonem X. Pontificem Optimum Ma-
 xi-

ximum bonorum omnium votis ac publicæ incolumitati repente immatureque fuisse præreptum. O diem, bonis omnibus funestissimum! (is, puto, unus omnium erat gemitus ac comploratio) O acerbissimam & vix plane ferendam calamitatem! O nos miserrimos, qui pastorem vigilantissimum, qui liberalissimum Principem, qui parentem optimum amisimus, qualem neque nostra, aut parentum ætas tulit, neque literarum monumentis ulla unquam effinxit antiquitas. Quid enim excogitari poterat in terris tanti Principis majestate, augustius, quid magnificentius, quid ad gloriam laudemque optabilius? Quanquam non ætas, non sexus, non ordo ullus est, qui lacrymas possit ac doloris impetum coercere, frustra tamen immensum publici parentis desiderium atque enormis jacturæ casum,

sum doloris magnitudine exæquari
 posse speramus, cum hoc uno in fu-
 nere non modo Europæ lumen ingens,
 sed universæ Christianæ Reipublicæ
 splendor quam maximus fuerit extin-
 ctus. At vero in tanto tum privato
 tum publico populi Romani luctu
 qualis, aut quanta esset lamentatio
 fletusque bonarum artium, cogitatione
 potius percipi potest, quam satis ver-
 bis & oratione comprehendere. Quem-
 admodum enim liberalissimi Pontifi-
 cis beneficentia etsi erga omnes ma-
 xima, in optimas tamen disciplinas
 singularis prope fuerat atque incredi-
 bilis; ita nihil illis contingere po-
 tuisset acerbius ac majori lacryma-
 rum contentione deflendum, quam
 inopinato importuneque eodem ipso
 Principe orbari, quem unum sibi met
 ab interitu vindicandis revocandis-
 que ad pristinum gloriæ fastigium.

i. a. a.

M

qua-

quasi cœlitus demissum acceperant
 ac venerabantur . Quamobrem sin-
 gulæ mutata veste , squalore fordi-
 busque mærentes , communis Paren-
 tis exequias prosequutæ , diu mul-
 tumque flere . Quid , inquam ,
 flere ? Imo adhuc hodierno die so-
 lenni funeris hujus instauratione de-
 flent jacturam Principis immortalita-
 te dignissimi ; institutaque quotannis
 funebri laudatione amplissimas ejus
 laudes beneficiorumque magnitudi-
 nem ad gratam posterorum memo-
 riam traducere summo studio ac vo-
 luntate contendunt . Cui quidem gra-
 vissimo muneri cum sæpe alias robu-
 stioris eloquentiæ viri sese impares
 experti fuerint ; quid ego consilii ca-
 piam , qui nunc potissimum de ipsis
 Leonis X. laudibus ad dicendum sur-
 rexerim , cum neque ætate , neque
 ingenio , neque auctoritate sim cum
 his

his, qui sedeant; ullo pacto comparandus? Verum cum in hac semper opinione fuisset, inter tot tantasque ipsius Leonis virtutes nullam omnino reperiri, quæ sublimi eloquentiæ apparatu indigeret ornari, sed satis superque esse, ut earum magnitudo in sui admirationem omnium erigeret animos, illas quasi nudas in medio proponere; hinc est, ut minus necessariam, aut idoneam hac in re eloquentiam futuram esse putaverim, cum Geometria potius ad ipsarum magnitudinem rerum dimetiendam accommodatior esse videretur. Veniam itaque dabitis, Auditores, si cum ea ipsa, quæ necessario mihi sustinenda est oratoris persona, geometræ quoque partes suscepero. Ad hoc enim me, non tam ea, quam mihi ab ineunte ætate Geometriæ ipsius studium attulit, delectatio impellit, quam

nova quædam & inusitata magnitudo virtutum, quæ specie plane insolita vim omnem superant eloquentiæ. Hæc vero tametsi in Leone plurimæ sint, & omnes de principatu inter se certare videantur, illud tamen, de quo nos præcipue hujus amplitudo loci & communis officii ratio opportune admonent, & quod, nobis tacentibus, hæc ipsa saxa ac parietes quodammodo prædicant, illud, inquam, est Romani hujusce Archigymnasii egregium ac prope divinum opus. Quo quidem sapientissimus Pontifex non modo apud populum Romanum, sed apud exteras quoque nationes sibi nominis immortalitatem comparavit. Ad hoc igitur unum tam præclarum, ac maximum Leonis X. beneficium, quantum & angustia temporis & ingenii mediocritas patitur, accurate designandum & quasi per partes explicandum.

plicandum aggrediar. Cujus, ut tota quanta est, luculentius magnitudo dignoscatur, longitudinem in eo, latitudinem ac profundum perscrutari & quodammodo dimetiri conabor. Ut nimirum celeberrima hac triplici Geometriæ dimensione, ex qua rei cujuslibet magnitudo desumitur, tum vos, Patres amplissimi, tum populus Romanus, tum exteræ gentes intelligant, quam magnum ex omni parte illud sit, quod a Leone X. in hoc uno beneficio acceperint, & quantum pro hoc ipso ab omnibus ei potissimum debeatur.

Nemo tamen sit, qui in præceptis institutisque Philosophiæ adeo me novum putet ac rudem, ut nondum satis perceperim, quid intercedat discriminis inter magnitudinem molis atque virtutis. Quamobrem temere & inani quodam conatu ad Geometriæ
nor-

normam & regulam ea dirigere velim, quæ cum partibus dimetiendis revera careant, in longum, latum, aut profundum magna esse, aut dici minime possunt. Novi profecto, novi aliam esse virtutis mensuram; neque unquam ex circini ratione clarissimorum hominum magnitudinem desumendam esse putavi. Quia vero habet quoque sua spatia virtus; & nonnunquam rerum gestarum magnitudine, ita excrescit, atque in amplitudinem extenditur, ut longitudinis, latitudinis ac profundi aliquod præferat argumentum: cui alienum & virtutis ipsius naturæ parum consentaneum, esse videatur, ad geometricam normam eam, quam nobis exhibet virtus, magnitudinem quodammodo revocare? Magnum itaque sive in longum, sive in latum, sive in profundum illud contemplari libeat, fuisse, dico, Leonis

nis X. beneficium , Romano hoc Archigymnasio tam sapienter splendide-
que restituto . Ab eo tamen , quod
geometrico more postremo loco de-
beret inquiri , exordium video neces-
sario mihi esse ducendum . Non enim
tam facile de reliqua tanti operis ma-
gnitudine dijudicari posset, nisi primo
quod quantumque in eo sit profun-
dum, liquido appareat . Profecto non-
nullis , qui per hos dies hoc ipsum
Archigymnasium extrinsecus longe-
que circumspiciunt , illud evenire,
solet , quod pueris , tum etiam im-
peritis hominibus , dum oculos in so-
lem , aut sidera conjiciunt , quotidie
evenit . Cum enim neque sensu , ne-
que scientia percipiant , quam vastum
ac profundum illud sit spatium , quo
clarissima eadem cæli lumina a nobis
longissime distant, inepte prorsus stul-
teque de eorum magnitudine ac mole

ra-

ratiocinantur . Neque enim in ani-
 mum sibi inducere ullo pacto possunt,
 compluribus stellarum globis terræ
 magnitudinem vinci; aut plusquam
 millies & septingenties, imo plus-
 quam vigintisepties millies solem esse
 terra maiorem . Quod tamen ex accu-
 ratiori recentissimorum astronomo-
 rum industria ac calculo satis liquido
 constat . Haud dissimili fere ratione,
 non desunt, qui tam præclari operis
 magnitudinem capere, aut complecti
 animo nequeunt: imo vero de illo im-
 pudenter ac temere differunt, quod
 quam profundum fuerit huiusce rei
 institutum, minime intelligant. Quod
 certe intelligerent, si eorum tempore,
 non tam annalibus, quam lu-
 etuosa malorum, quæ tunc nobis im-
 minebant, iliade sibi proposita, ani-
 madverterent, in qua rerum fortuna
 clarissimi huius imperii dignitas, Ro-
 ma-

manæ Ecclesiæ jura ac Christianæ totius Reipublicæ salus versaretur. Viderent scilicet tristissimam Italiæ faciem undequaque fulgore armorum, ac strepitu perturbatam. Viderent disseminatas multis in locis perditissimorum hominum opiniones, provincias ab auctoritate Romani Pontificis improbe discedentes, surgentes undique ac per omnia propemodum Christiani nominis regna pervadentes impiorum dogmatum pestes; unoque verbo, res nostras in illud adductas fuisse discrimen, ut non jam de proferendis imperii finibus, sed de Italiæ ipsius possessione, de nostris hisce aris focisque certaretur. Quid igitur consilii Leo X. capiendum sibi esse duceret, qui in maximis ejusmodi turbini- bus ac periculosis fluctibus Ecclesiæ navim gubernaret? Quam salubriorem, aut probatam magis tam mul-

N

tis

tis gravissimisque vulneribus medicinam afferret? Nulla profecto visa fuit opportunior, quam bonas artes ubique tunc fere jacentes erigere. Hanc unam proximam & quasi compendiariam censuit fore viam ad tuendam templorum religionem & Ecclesiæ dignitatem vindicandam: his telis atque armis improborum hominum conatus ac vim nefariam infringi posse ac repelli.

Et quidem non modo vetus est & sapientum omnium firmata judicio; sed cum ipsis pene literis nata opinio, maximam esse in Republica vim literarum; neque aliud quicquam præter literas ad tuendam populorum felicitatem plus habere momenti. Quod præclare olim cum Mitylenæi intelligerent, eas, quas semel armis subegissent gentes, nulla alia, ut auctor est Ælianus, mulctabant poena, nisi

nisi ut liberos suos omnino arcērent a literis: omne illis præsidium se sustulisse rati, ubi tantum literas sustulissent. Quorum consilio certe haud minus improbe ac malitiose fecit nefarius ille Christiani nominis proditor atque desertor infestissimus Julianus Imperator, qui quo certiores sibi ad Christianam religionem funditus evertendam muniret viam, iis, qui Christianæ eidem religioni sacramentum dixissent, literarum studia gravissimorum suppliciorum metu interdixit. Noverat quippe homo apprime callidus ac vafer in optimis disciplinis situm esse firmamentum religionis ac Christianæ rei propugnaculum: quandiu vero ea studia flourerent, religionem ipsam oppugnari minime posse, aut labefactari. Ex quo jam probe intelligitis, Auditores, quid sibi proposuerit sapientissimeque cogitaverit

Leo X. , cum in maxima ejusmodi perturbatione summoque Christianæ Reipublicæ tempore bonarum artium studia jam tum profligata ac prope deposita ab interitu vindicare atque illis sedem & domicilium in hac Urbe potissimum restituere aggressus fuit. Non inane aut vulgare aliquod, sed gravissimum suscepit negotium, cum de inferendo nefariis hominibus acri ac perpetuo bello, cum de tuenda Romanæ Sedis auctoritate, de propugnanda sacrorum religione negotium suscepit. Quæ quidem omnia cum bonarum artium studio ac dignitate cum maxime conjuncta esse intelligeret, ea se satis feliciter consequuturum speravit; ubi ipsamet studia in hanc amplissimam imperii sedem atque Urbem omnium principem revocasset. Ne cui vero hæc ad augendam bonarum artium existimationem de indu-

stria

ſcripſa a me dicta eſſe videantur ; cogi-
 tate mecum, Auditores , qui tum Ro-
 manæ Sedis hoſtes, & quibus præcipue
 armis nefarium Eccleſiæ bellum intu-
 liſſent : homines ſcilicet , qui in Græ-
 cis, Hebraicis Latinisque literis ma-
 xime verſati atque omni eruditionis
 genere ſummopere inſtructi , non mi-
 nus ipſis bonis artibus , quam auda-
 cia ac furore armati , ad omnia tum
 humana , tum divina ſuſum deorſum
 pro libidine pertrahenda impudentia
 plane ſingulari abutebantur . Quorum
 partim cum perverſis diſtortisque ſen-
 tentiis ſacrarum literarum ſenſum au-
 ctoritatemque perturbarent ; partim
 peſtilentiſſimis editis commentariis
 populorum animis pernicioſas infere-
 rent opiniones ; partim denique con-
 cionum impudentiſſimarum vi & fre-
 quentia urbes ac provincias ab ipſius
 Romanæ Eccleſiæ ſinu complexuque di-

divellere conarentur : unus tamen omnium erat furor , eoque communis spectabat improbitas , ut subdole exteris gentibus persuaderent , Urbem Romanam , Catholicæ olim veritatis magistratam , in summa nunc literarum ignoratione versari , atque ibi omnia jam pro avaritia ac libidine , non æquo jure ac doctrina ut olim consuevisse tractari . Ac proinde , Urbe ipsa jam omnino relicta , ad exteras nationes germanam ac veram commigrasse pietatem & religionem ; seque unos tum divinitus fuisse oblatos sacrarum literarum magistros ac duces , qui in literarum ipsarum studio fere omnem traduxissent ætatem , qui sapientia ac multiplici eruditione florerent , qui denique omnium prope linguarum notitia maxime excellerent .

Ut igitur impudentissima istiusmodi ora occluderet Leo , atque iisdem

dem armis , quibus in Apostolicæ Sedis exultationem ac dignitatem nequissimi hostes impetum fecerant , incertamen descenderet , eosque quasi proprio ipsorum ense jugularet ; non modo suum esse duxit , tales sibi deligere viros , qui doctrinæ & eloquentiæ partes pro ejusdem Sedis Apostolicæ majestate gravissime sustinerent , sed clarissimis quoque undique accitis bonarum artium professoribus , arcem hanc disciplinarum munitissimam excitavit . In his itaque castris stipendia mereri voluit gubernatricem vitæ ac ducem Philosophiam , qua , ut præclare Tullius , vir bonus & fortis efficitur , quaque Plato nihil præstantius hominum generi a Diis immortalibus dari potuisse censebat . Hic firmissimum illud Catholicæ religionis propugnaculum posuit Theologiam , qua nihil præclarius , nihil divinius :

Hic

Hic sacrarum literarum historiam, utriusque juris doctrinam, linguarum fere omnium studium. Quoniam vero eventu, quo auditorum numero, aut quanta bonarum artium gloria, illud satis sit dicere, optimas disciplinas tantam hic brevi assequutas fuisse celebritatem, ut, teste Paulo Jovio, Romanum hoc ipsum Gymnasium, neque Bononienti, neque Patavino, vel doctorum præstantia, vel auditorum concursu concederet.

Quantum vero laudis Leoni X. apud omnes hinc accessisse putamus, quod scilicet tam sapienti consilio pervulgatos improbissimorum hominum sermones abruptisset, constitutisque in hac Urbe optimis disciplinis, dignitatem Romanæ Sedis, sacrarumque scripturarum auctoritatem non propugnasset modo, sed etiam quodammodo restituisset? Profecto propter
 unam

unam hanc ipsam studiorum instaurationem communi omnium opinione usque adeo de hac Urbe, de his templis atque aris fuit optime meritus, ut plurimi & gravissimi viri in ea sententia fuerint, illum iis omnibus præferendum esse Romanis Pontificibus, qui multis ante annis tuendæ amplificandæque religionis gloria magnopere claruissent. Quod enim alii sanctissimas statuerint leges ad improborum frenandam audaciam, sive ad populorum utilitatem promovendam; alii vero, ut rem Catholicam, si qua in parte nutaret, tempestivè stabilirent, aut stantem erectamque opportune firmarent, universorum Patrum concilium advocaverint, in eoque multa sapienter ac divinitus instituerint; quod denique alii propugnandæ Christianæ Reipublicæ studio paraverint classes, copias instruxerint, ac sese in

O

Prin-

Principum Regumque foedera adjun-
 xerint, magnam revera & sapientiae
 & religionis famam sibi compararunt:
 & nemo usque eo perfrictae frontis
 erit, qui illos summa laude ac prae-
 dicatione dignos esse minime fateatur.
 Tamen si quis rem subtilius pergat in-
 spicere, neminem istorum cum Leo-
 ne ob ejusmodi meritorum famam ul-
 lo pacto conferendum esse cognoscet.
 Nam praeterquam quod praecleara ejus-
 cernodi facta ad eos Romanos Pontifi-
 ces non ita pertinent, ut cum Leone,
 quoque communia non intercedant;
 cum ipse & plurimas & gravissimas
 sanciverit leges, cum Lateranense
 Concilium à Julio II. indictum atque
 inchoatum & sapienter prosequutus
 fuerit & feliciter fausteque compleve-
 rit; cum denique ad propugnandam
 tum Ecclesiae tum Italiae libertatem,
 non modo frequenter potentissimorum
 Re-

Regum amicitias sibi comparaverit, sed pertinacis quoque ingenii Principes, quique dicto minus audientes fuissent, omni prorsus imperii jure abdicaverit. Id tamen quo reliquis palmam eripuit, & quo ei præ ceteris hæc Urbs, hæc moenia ac religio tribuere plurimum debent, sine controversia fuit optimarum artium studia in hac ipsa Urbe amplissime restituisse. Nam quæ tanta vis ad servandam amplificandamque religionem sive in legibus, quas tempore sæpe abrogari videmus, sive in armis, quæ sæpe irritò, sæpe etiam poenitendo inferuntur eventu, continetur, quanta ea est, quæ in bonarum artium institutione ac disciplina ponitur? Eæ siquidem sunt, quæ nos de ipso prope nutricis sinu acceptos sapientiæ lacte nutriunt ac fovent. Eæ sunt, quæ puerilem ætatem ad humanitatem & honestatis re-

gulam informant. Eæ quanta sit in virtute dignitas ac splendor, quanta in vitiis labes & turpitudine edocent. Eæ denique veram erga Deum pietatem, rebus divinis reverentiam, religionem templis, principibus fidem atque observantiam constantissime habendam, esse ostendunt. Quæ sane si quis semel cum prima vitalis auræ particula ac pene cum lacte ipso penitus imbiberit, tam recte sapienterque reliquum vitæ conficit spatium, ut ad virtutis naturam non tam factus, quam natus esse videatur. Hæc itaque mens, hoc prope divinum fuit maximi Pontificis consilium: honestissimas disciplinas in antiquum Urbis hujus domicilium, unde per acerbissimas rerum vices tanquam de sede sua deturbatæ fuerant, revocare, quo una cum illis integritatem, justitiam, fidem, omnem denique virtutem postliminio revocaret.

ret. Hujus quidem sapientissimi instituti rationem postea Tridentini Patres non modo communi omnium consensione probarunt, sed nihil eo visum, fuit opportunius, quodque ad veterem instaurandam adeo tum collapsam Ecclesiasticam disciplinam magis esset accommodatum. Ac proinde, ut tam arduum ac periculosa plenum alex negotium auspicato susciperent, non aliunde omen, quam ab ipsa studiorum instauracione ubique gentium utiliter instituenda, quæri oportere duxerunt. Quamobrem hac de re primo & in ipso rerum agendarum limine tanquam de causa omnium maxima præcipue cogitandum esse putarunt ac tempestive accurateque statuendum. Ex quo satis liquido constat quam grave tum fuerit de hujusmodi studiis jampridem in hac Urbe a Leone instauratis hominum sapientissimorum,

ju-

judicium, & quam profundum illud æstimari debeat opus, in quo religionis præsidium, innocentiam vitæ & Ecclesiasticæ disciplinæ dignitatem, Tridentini Senatus auctoritas usque eo positam esse judicavit.

Jam vero ne longius, quam par est, protrahatur oratio, quanta sit præclarissimi ejusdem beneficii latitudo, diligenter attendite. Equidem si reliqua Urbis gymnasia, quotcunque illa sint, cum hoc omnium principe conferantur; quodnam quæso est, quod scientiarum multitudine, quod varietate linguarum, quod denique rerum omnium humanarum divinarumque universitate quadam ampliore præferat latitudinem? Multis quidem aliis in scholis tum Philosophiæ, tum Theologiæ studia doctè ac perite pertractantur. Ubi vero plura Theologorum subsellia, plures Patrum senten-

tentiæ atque auctoritas? Ubi in tot distributa classes Philosophia universa? Quid vero dicam de Mathematicis disciplinis? Quid de tanta linguarum multitudine, cum præter duas illas ceterarum facile principes, Græcam scilicet ac Latinam, Hebraicis quoque, Arabicis ac Syriacis vocibus domicilii hujus parietes quotidie perfonent? Illud vero, quod majorem Academiæ hujus amplitudinem facit, quodque ei singulare omnino tribuitur ac proprium, procul dubio est tum juris legumque disciplina, tum medendi facultas: quæ quidem duo quantam, Deus immortalis, universæ Reipublicæ utilitatem afferunt, & quam amplissime per omnia humana ac divina pervagantur? Ex tanto autem ac tam splendido disciplinarum omnium apparatu, ex tanta scientiarum turba tam multa sunt, quæ & in publicum
&

& in privatum civitatis bonum derivantur præstantissima commoda, ut in iis summatim & quasi compendio recensendis difficilius fortasse sit exitum, quam principium invenire. Quocunque enim oculos cogitationemque convertō, nullus mihi fere locus, nullum hominum genus occurrit, cui hoc studiorum emporium utilitatem aliquam non afferat & emolumentum. Hic enim ætatis cujuscunque atque ordinis adolescentes paratissimum habent perfugium, in quo sine molestia, sine impensa, & quod certe pluris est, sine melioris ætatis impendio diuturnoque tædio, brevi, & ut Quintilianus admonet, methodo satis simplici, tam humanioribus literis & eloquentia, quam gravioribus disciplinis instituantur, studiorumque suorum cursum summa facilitate ac brevitate, conficiant. Quamobrem supervacaneum

neum & inanis prope laboris esset hoc loco diligentius recensere quot præclari ingenii juvenes in his scholis olim liberaliter educati latinis postea græcisque literis floruerint; quot Philosophiæ studio, aut Mathematicis disciplinis, quot medendi facultate, aut juris tum Civilis tum Canonici scientia præstantes nomen suum immortalitati donaverint. Innumeri siquidem nunc præ oculis nobis sunt, qui amplissimo huic loco doctissimisque hujus Academiæ professoribus acceptum referunt quidquid sibi honoris ac dignitatis contulit studium earum artium; quarum hic jam posuerant rudimenta.

Neque vero intra privatas tantum ædes, aut intra Urbis muros beneficii hujusce ratio ita se continet, quin & foras erumpat, atque in alias quoque regiones, non modo per Italiam uni-

versam, sed per omnes propemodum Christiani imperii fines longe lateque excurrat. Quantam enim in dies videmus esse auditorum frequentiam? Quantum ex omni fere Europa concursum? Quot Jurisprudentiæ, aut Medicinæ, aut quibusvis aliis disciplinis operam daturi e transalpinis provinciis huc summo studio ac voluntate confluunt? Ut jam hæc disciplinarum officina non tam populo Romano, quam omnibus fere gentibus posita esse videatur. Ex qua quidem peritissimi illi Juris dicendi magistri profecti sunt, in quorum auctoritate ac doctrina tam multis hodie in locis municipiorum leges, civitatum jura ac bona civium fortunæque nituntur. Hinc Hippocratis accepere aphorismos tot clarissimi viri, qui jam summa laude medendi facultatem sustinent, quorum ore ac spiritu vita principum

ci-

cipum ac populorum salus animari quodammodo ac sustentari videtur.

At vero quam in omnes tum cives Romanos tum exterarum gentes hæc late pateat studiorum beneficentia, haud satis intelligi posse arbitror, nisi a nobis, quæ præcipua sit Romanæ urbis dignitas atque auctoritas, diligentius examinetur. Duo sunt omnino, quibus omnis Reipublicæ salus maxime innititur, iisque sublati, ipsa diu salva consistere nullo modo potest, religio scilicet & optimarum legum custodia. Quæ quanvis optimæ cujusque civitatis statum constituere videantur, ad urbem tamen Romam, veluti ceterarum omnium caput, ea duo potissimum pertinere nemo unquam sanæ mentis dubitavit. Cum enim amplissimam hanc Urbem religionis Catholicæ sedem esse ac domicilium voluerit Deus, ubi Romanus Pontifex tan-

quam in augustissimo Orbis theatro vicariam ipsius Dei personam apud homines gerens, Christiani totius imperii clavum teneret; illud necessario consequitur, ut ceteræ gentes hinc leges ac jura petere debeant, & ad hanc ipsam Urbem jam de religione jam de aliis gravissimis rebus consulendi causa ex omnibus fere terrarum partibus convenire. Et quidem ubi plures simili splendore ac dignitate virorum sapientissimorum conventus? Ubi major judiciorum frequentia atque amplitudo? Ubi tot curiis, tot judicum collegiis hominum quasi exercitus distributus? Tanta vero juris tum Civilis tum Pontificii scientia, tanta in legibus explicandis interpretandisque notitia ac facilitas, cui magis quam Leoni accepta referri debeat, non video. Nam si id, quod res est, fateri volumus, ipse fuit, qui in misera

ra

ra illa disciplinarum nocte atque caligine clarissima sapientiæ lumina in hanc Urbem invexit . Ipse fuit , qui magnis propositis præmiis sapientissimos utriusque juris magistros invitavit ; atque operam dedit , ut non modo Romanæ urbis , sed Orbis prope modum universi juvenus Romæ duces haberet peritissimos , qui in legibus , in senatusconsultis , in edictis prætorum , in decretis principum ac gentium jure intelligendo explicandoque viam ac rationem ostenderent . Ex quorum labore quotidiano atque industria quantum postea splendoris existimationisque huic Urbi accesserit , aut quam uberem in dies fructum in causis forensibus judiciisque populus Romanus atque exteræ nationes percipiant , cui tanta suppetit dicendi facultas , ut satis ac pro dignitate dicere possit ? Quod si custodia

dia legum, ut præclare & graviter inquit Euripides, civitates continet; ac juris legumque neglectu florentissima & opulentissima orbis imperia funditus concidisse videmus: nonne populorum vindicem atque imperii statorem Leonem X. haberi ac dici oporteat, qui de legibus ac jure earum, omnium gentium, quæ a Romana Sede religione, fide & observantia pendent, tantopere laboraverit? Non est igitur, cur miremur, quod beneficentissimo Principi statuam in Capitolio populus Romanus dedicaret, ab eoque restitutam instauratamque fuisset Urbem insigni monumento profiteretur: cum potius mirandum esse, videatur, cur ceteræ quoque urbes ac Christiani imperii provinciæ singulas ejus nominis immortalitati statuas haudquaquam posuerint. Quandoquidem non Urbem duntaxat, neque solum

lam populi Romani utilitatem spectat tanta cum disciplinarum ceterarum dignitas, tum juris legumque auctoritas atque majestas, sed eas omnes latitudine sua complectitur gentes, quas ut religione, ita legum societate cum hac ipsa Ecclesiastici imperii sede conjunctissimas esse oporteat.

At superest jam, ut quam brevissime longitudinem ejus beneficentiæ consecretur, cujus profundum hactenus aliquo pacto dimensi sumus ac latitudinem. Plurima quidem sunt, quæ excurrunt in longitudinem, quæque hoc uno longitudinis nomine; multiplici tamen ratione sub Geometriæ regulam commode cadunt. Illud vero, quod haud postremo loco venit, & nunc ex re nostra potissimum esse videtur, est temporis longitudo ac mensura. Hæc plane in definienda rerum natura tanti semper fuit, ut per-
fæ-

sæpe, quæ minima esse videbantur, cum ad ea longitudo temporis accessisset, eadem & multa numero & magnitudine maxima esse, sapientissimorum hominum iudicio constitutum, fuerit atque decretum. Quæ sane iudicandi consuetudo apud juris interpretes, tum apud prudentissimum, quemque, cum jam sit veteri usu recepta, quodnam esse poterit de hac Leonis beneficentia hominum iudicium, si longitudinis ejus ratio atque utilitas perpetuo mansura exploretur? Non iis tantum, qui tum erant, Pontifex sapientissimus, neque unius ætatis commodo consultum esse voluit, sed posterorum tempora longissime, prospiciens, de liberis vestris, de iis, qui adsunt, ingenuis adolescentibus anxius vehementer fuit ac sollicitus. Quia vero singulari industria, quo consilio atque incredibili sapientia? Natu-

ra quidem ita comparatum est , ut unusquisque maxime immortalitatis studio ducatur . Quoniam vero , ut graviter ait M. Tullius, exiguum nobis vitæ curriculum natura circumscripsit ; tam breves vivendi terminos in posteritatis memoriam rebus præclare gestis beneficiorumque magnitudine prorogandi infita nobis est ingens cupiditas , ut nimirum nisi spiritu vitæ , nominis saltem immortalitate vivamus . At quotusquisque est , qui in posterum ita provideat , ut pulcherrima beneficiorum suorum monumenta immortaliter vivant , neque unquam situ jaceant, aut cœca oblivione involvantur ? Haud raro res præclare sapienterque a majoribus institutas fortunæ casibus , aut posterorum languore & socordia perditum iri videmus , quod eæ adversus istiusmodi injurias nullo satis præsidio firmatæ

Q

fue-

fuerint aut communitæ. Planius & apertius dicam: complures vetustiori ætate jam extiterant Romani Pontifices tam literarum, quam literatorum amantissimi, qui Romæ etsi non omnium, aliquot tamen studiorum jecerant fundamenta. Instituerat Innocentius IV. Juris Civilis & Canonici studium, cujus ipsum fuisse scientissimum satis ea perspicuum faciunt, quæ in Decretales Pontificum luculentissima edidit commentaria. Plures alias addiderat disciplinas Bonifacius VIII. universorumque studiorum formam quandam in Urbe præscripserat. Neque multo post doctos & in literis Hebraicis, Arabicis Chaldeisque eruditos professores Clemens V. invexit. Aliaque deinde alii. Quonam vero eventu? Nemo eorum, quo destinaverat, rem auspicato perduxit. Nemo literarium negotium ita firmavit, ut de-

decurſu temporis bonarum artium, ſtudia nullam vim pertimeſcerent, nullaue die ad interitum vergerent: cum ipſamet ſtudia Leonis ætate jam, adeo laborarent, adeoque proſtigata eſſent ac perdita, ut quaſi ab inferis ea revocari oportuerit.

Quid igitur Leo, ut opportune, huiusmodi malo omnino præcluderet aditum, atque optime non de ſua tantum, ſed de poſteriorum quoque omnium memoria perennis beneficii longitudine promereretur? Singularem hominis providentiam ac divinum prope conſilium quæſo cognoſcite. In medio ac frequentiffimo Urbis loco has, quas videmus, magnificentiffimas ad cælum extollit ædes, quarum proſpectus, impluvium, porticus, ampliffimum peryſtilium ac cetera ejuſmodi ſunt, ut & laxitate & elegantia a bonarum artium dignitate

Q 2

mi-

minime abhorreant : digna profecto ,
 quæ ætate quoque nostra tum illa im-
 mortalis memoriæ foemina Christina
 Svecorum Regina aspectu cohonestaret
 suo ; tum etiam Alexander VII.
 Pontifex Maximus majestate sua aliquando
 impleret . Quid postea ? De
 Pontificio ærario Leo ipse haud exigua
 vectigalium detrahit partem , ut
 bonarum artium magistri tam Romani
 Pontificis beneficentia , quam publico
 civitatis sumptu alerentur . Quorum
 alios insuper ab ipso ingentibus
 donis , alios honoribus , alios etiam
 bene opulentis sacerdotiis auctos fuisse
 atque ornatos Paulus Jovius commemorat .
 Tot præterea leges sapientissimas addit ,
 partim optimæ studiorum rationi
 administrandæ accommodatas , partim
 ad professorum eruditionem & disciplinam ,
 partim etiam ad eos , quorum in fide ac
 patrocinio hanc esse

voluit Academiam, spectantes; ut neque præstantius, neque præclarius civitatis alicujus utilitati æternitatique caveri potuisset. Quod igitur, labente jam tertio ab hac studiorum instauratione seculo, tanto semper floruerit concursu isthæc bonarum artium Respublica, tantaque professorum ejus per omnem ætatem extiterit virtutis, integritatis ac sapientiæ fama, ut ex his subselliis non modo innumeri ad sacras insulas, verum etiam ad purpuræ dignitatem complures evecti fuerint, quod denique major in dies hinc profectura sit studiorum existimatio ac nomen; nonne acceptum potissimum profiteri debemus singulari providentiæ ac consilio ipsius Leonis, qui in eo totus fuit; ut beneficentiam hanc suam ad omnem posteritatis memoriam commoditatemque traduceret? O beneficentiam ejus non modo latitudi-

dine magnam, vērū etiam longitū-
dine maximam! Dum clarissima hæc
Urbs, dum hæc mœnia, dum popu-
li Romani nomen erunt, immortalī
omnium memoria vivet laudatissimus
Pontifex, non solum ob perennem,
contestatamque virtutum suarum fa-
mam, ob singularem in ornanda am-
plificandaque Urbe magnificentiam,
ob invictam animi constantiam, pie-
tatem ac religionem; sed eo potissi-
mum nomine æternitatem conseque-
tur, quod tam populi Romani, quam
exterarum gentium animos sibi sum-
mo perpetuoque beneficio devinxerit.
Non uberrimos tantum, sed juges,
sed sempiternos nobis disciplinarum
recludit fontes. Noverat quod conqui-
site scribit Seneca, illud maximum
esse beneficium, quod semper ante oculo-
los est, & oblivisci sui nunquam fi-
nit, sed auctorem suum, ut ipse ait,
in-

ingerit semper & inculcat. Noverat
 haud satis dari, etsi necessaria, utilia
 ac jucunda darentur, si ea, quæ dan-
 tur, mansura omnino non essent. Ut
 igitur magnum undequaque in hac
 studiorum instauratione conferret no-
 bis beneficium, non modo in eo pro-
 fundum ac latitudinem, sed peren-
 nem etiam perpetuoque duraturam es-
 se voluit longitudinem. Cujus qui-
 dem ingens & infinita propemodum
 mensura cum vix percipi cogitatione
 possit, nonne eam attentare, ut de cæ-
 li dimensione censuit Plinius, furor
 esse videretur? Nulla profecto vis ho-
 minum atque audacia, nullum tem-
 pus, nulla ætas, nulla poterit abole-
 re vetustas tam præclarum & immor-
 tale Leonis X. beneficium. Imo dum
 literæ, dum Roma, dum Orbis erit,
 bonarum artium studia in amplissimo
 hoc Lyceo constanter perpetuoque
 floreant.

Uti-

Utinam igitur mihi nunc tanta, vis ingenii tantumque esset ab eloquentia præsidii, ut & Academiæ hujus universæ nomine, & populi Romani, & gentium omnium vocibus, eas tibi, Leo Pontifex sapientissime, immortales gratias agerem, quas tibi met Archigymnasii hujus statore, bonarum artium vindici ac literarum parenti beneficentissimo quam maximas deberi summo omnium consensu ac solenni religione profitemur. Sed quoniam beneficiorum tuorum amplitudine non eloquentiam modo, sed Geometriæ quoque mensuras superasse videris, hoc plane restat unum, ut jam manus ultro demus; teque longius atque ulterius, quam quo dicendi facultas & inusitata quælibet laudandi industria assequi valeat, beneficentiæ magnitudine processisse silentio fateamur.

DE

Eminentissimo ac Reverendissimo

JO. BAPTISTÆ SPINULÆ

S. R. E. PRESBYTERO CARDINALI
CAMERARIO

Paulinus a S. Josepho Scholarum Piarum.



*I optimæ artes, Romani
hujus Archigymnasii feli-
ces incolæ, ipsæ per se lo-
qui possent, magnas pro-
fecto tibi gratias agerent,
Cardinalis amplissime; ac nemini magis
quàm tibi acceptum profiterentur hono-
rem, quem præclaro tuo de se judicio sibi
maxime restitutum fuisse gratulantur.*

R

Cum

Cum enim nescio quo malo literarum fato contigisset, ut superiori etate patrocini-
 um Academiæ hujus fere apud eos esset
 Cardinales Camerarios, qui quemad-
 modum genere, ita sollicitudine & cura,
 ad sustinendum Ecclesiæ imperium cum
 Romano Pontifice conjungebantur: inde
 fieri solebat, ut in tot tantisque illi ver-
 sarentur negotiis, ut de hac literarum
 provincia ne cogitare quidem possent; aut
 etiam si possent, in eo dignitatis fastigio
 positi Deorum illorum instar esse viderentur,
 quos magna curare, parva negligere
 M. Tullius existimavit. Ex qua
 quidem inanis patrocinii forma quæ quan-
 taque deinde rem hanc literariam inva-
 ferint mala, eo libentius prætermitto, quo
 magis jam latent neminem. At tandem
 aliquando singulari Dei immortalis bene-
 ficio factum est, ut cum amplissimo Ca-
 merarii munere, quod fidei summæque
 tue integritati Romanus Pontifex deman-
 da-

davit, hæc quoque Studiorum cura ob-
 veniret tibi, qui & de literis optime
 sentires, & earum patrocinium a digni-
 tate tua abhorrere nunquam judicares.
 Qua de re præclarum satis tunc maxime
 dedisti argumentum, cum ad vetera pa-
 trocinii ejusdem jura auctoritatemque
 vindicandam, publicas etiam inimicitias
 literarum causa suscipere minime dubita-
 sti. In quo certe quanti amplitudinem
 hujus loci faceres, tam aperte significasti,
 ut optimæ artes ex hac tua erga se volun-
 tate ac studio honorem sint incredibilem
 consecutæ. Hinc enim perversa illa,
 quæ superiori memoria de cura Archigy-
 mnasti hujus tanquam de re minus gravi
 dissipata fuerat opinio, auctoritate tua at-
 que judicio refutata est omnino. Hinc
 labe illa ac macula, quæ tot annos
 Academiæ hujus nomini infederat, per
 te deleta penitus fuit atque restincta.
 Hinc denique honestissimæ disciplinæ quasi

alumne quædam tuæ ac familiares ani-
 mum erigere cœperunt pauloque liberius
 respirare. Quas igitur tibi tanquam præ-
 clarissimo dignitatis suæ statore ac vin-
 dici ingenue artes immortales profitentur
 gratias; eas profecto Romani hujus Ly-
 cœi professores earundem nomine debent
 tibi, perpetuoque debebunt maximas.
 Horum itaque in numerum ego quoque
 beneficio præsertim tuo nuper adscriptus,
 quanquam ætate, loco & eruditione
 omnium postremus, in dignoscendis tamen
 tuis erga nos meritis nemini inferior, eas
 Eloquentiæ nomine gratias ago, quas ma-
 ximas pro exiguis viribus meis possum.
 Pudet vero me haud posse aliquod tibi su-
 pra vulgarem consuetudinem ingenii mu-
 nus offerre, quod singulare ac perenne
 esset memoris animi mei monumentum.
 Etenim quod hanc orationem ex aliqua
 saltem grati animi significatione nomini
 tuo inscriptam voluerim, id mihi inter-

ce-

cedit commune cum multis, qui jam antea hoc ipsum splendidiori fortasse eloquentiæ apparatus præstiterunt. Quid igitur? Ab omni prorsus officii genere mihi diutius temperarem? Id neque observantiæ meæ rationes, neque tua cum publica, tum etiam privata in me beneficia patiebantur. Unum itaque superest, ut nimirum non tam orationem hanc ipsam, quam oratoris studium ac voluntatem spectatam habere maxime velis. Hinc enim fiet, ut hoc idem munus, quod si ex sua, vel tua dignitate spectetur, perexiguum certe est ac prope nihil, ex magnitudine tamen animi multo majora dare cupientis æstimatum, quid magnum, aut saltem aliquid esse videatur.

DE

DE INFELICITATE ILLITERATORUM. ORATIO IV.

*Habita xv. Kalen. Novembris, anno
MDCCXIV.*



IRATUS sum, sæpe ac
vehementer, quid esset,
quod majores nostri,
qui tam multa graviter
sapienterque in eos sta-
tuissent, a quibus aliqua ex parte rem-
publicam perturbari posse suspicaren-
tur, nulla tamen lege, nullo S. C.
aut Prætoris edicto singularem homi-
num illorum amentiam coercendam,
esse putaverint, qui cum acri inge-
nio ceterisque rebus, quibus litera-
rum studia aluntur, maxime abun-
dent,

dent, in supinam nihilominus oscitan-
temque socordiam ætatis florem per-
ditissime abjiciunt. Non enim illud
facile intelligebam, qua de causa tot
leges alioquin sapientissimas, Corne-
liam, Juliam, Aciliam, Calpurniam,
Maniliam, Æliam, Fufiam aliasque,
complures constituissent, quibus sæpe-
numero non tam malum, quam mali
suspicionem a republica dimovere,
conati fuerunt; nullam deinde cen-
suissent in eos esse rogandam, quos op-
timis disciplinis intensos desidiæque
deditos, reipublicæ perniciosissimos
esse summoque dedecori, nemo un-
quam dubitavit. Neque vero majores,
homines plane incredibili judicio ac
sapientia ornatos, latere poterat, iner-
tia nihil esse foedius, nihil huma-
narum divinarumque rerum ignora-
tione periculosius: cum probe perci-
perent otio ali solere vitia, & frequen-
tis-

tissime otium ipsum non modo privatos homines, sed & Reges, & beatas olim urbes in interitum excidiumque traxisse. Hæc aliaque id genus dum maturius animo reputarem, illud tandem mihi compertum est, jure optimo nullam in ejusmodi homines a majoribus latam fuisse legem, quod in eos jampridem non unum, sed multiplex supplicii genus a natura ipsa fuisset providentissime constitutum. Cum enim ex veteri quadam consuetudine institutoque naturæ ita comparatum sit, ut iidem apud omnes fere nationes insigni turpitudine ac summa infamia laborent, cumque vitam omnino tristem, ærumnosam, curarum ac molestiæ plenam & morti, ut ita dicam, propiorem, quam vitæ ducere cogantur; bene ac sapienter majores nulla alia severiori lege nulloque graviori judicio in ipsos animadverti posse putata-

tarunt. Deceveram itaque hodierno die ad inflammandos sapientiæ studio juvenum horum clarissimorum animos non alia ratione uti, quam luctuosum hoc ipsum, quod ignavi homines de se ubique terrarum præbent, spectaculum exhibere. Hinc enim forte sperabam, ut honestissimi juvenes infelicissimum illud vivendi genus quam maxime detestarentur, cui & nullam unquam impunitatis spem esse, & summa gentium omnium invidia conflagrare intelligerent. Nolui tamen per singulas orbis partes excurreret ac peregrinaretur oratio: nolui externa, aut longius petita conquireret, cum tam multa domi suppetant hominum inertissimorum supplicia. Sed unum & quidem domesticum, quod multis fortasse levissimum, mihi vero supplicium omnium maximum quodque ceteris anteponendum esse videtur, in-

S

me-

medio proponam ; ita tamen , ut neque ab hodiernæ celebritatis instituto abhorreat , neque a studiis vestris , juvenes , alienum esse censeatur . Quod tum plane me facturum esse confido , si ea , qua potero , brevitate ostendam : nihil durius atque acerbius illiteratis hominibus posse contingere , quam quod Romæ vivant . Quo quidem argumenti genere illud , quemadmodum spero , efficiam , ut qui summa frequentia adsunt optimi juvenes alieno supplicio deterriti , aut tempestive totis viribus ad sapientiam incumbant , aut ultro sibi aliquando exulandum , fugiendumque esse cognoscant ex hac pulcherrima Urbe , in qua ignavis illiteratisque hominibus citra summam infamiam atque impune vivere minime liceat .

Atque utinam mihi in hoc primo orationis aditu imitari fas esset factum

So-

Socratis sapientissimum, qui quo suorum animos ab iracundia longius abduceret, non graviolem illi, qui forte irasceretur, multam irrogabat, nisi ut in speculo oris habitum vultumque ira furentem contemplaretur. Existimabat siquidem vir prudentissimus ad iram maxime detestandam, unumquemque satis commoveri posse, si oculis, quorum sensus esse solet acerrimus, turpitudinis ejus speciem propositam habuisset. Utinam igitur & nobis hodierno die haud dissimile, speculum, in quo homines indocti sese intueri valerent, excogitandi elaborandique facultas tribueretur. In eo profecto illi quales se, Deus immortalis, conspicerent! Hominesne an pecudes dicam? Quandoquidem non Circe aliquo poculo, sed otio desidiaque imbuti tam longe ab omni humanitatis studio recesserunt, ut si

id, quod revera est, fateri volumus, non tam hominum, quam pecudum loco habendi esse videantur. Cum enim duo sint, per quæ a ceteris animantibus vel maxime discernimur, ratio scilicet & oratio, quarum utraque in ejusmodi hominibus rudis foret esse omnino atque inchoata; nondum plane inter sapientes constitutum est, plusne ad hominis, vel pecudis naturam accedant, licet inter ipsos ac pecudes haud multum interesse nemo unquam sapiens dubitaverit. Quid vero pecudes eos mihi nominas? inquit Aristippus: lapides potiori jure censerī debent. Etenim sive in foro, sive in circo, aut quovis alio in loco sedeant, semper lapis super lapidem sedet. Parcius tamen multoque moderatius in insectanda istorum ignavia se gessisse videtur Cicero, qui inertissimum unum ex hoc grege hominum

bi

c 2

Pi-

Pisonem non lapidem, sed truncum aliquem ac stipitem pronuntiavit. Quicquid vero sint istiusmodi homines aut lapis, aut truncus, æquo animo esset ferendum, si ab omni hominum consortio remoti, in montibus inclusi, aut sylvis abdití delitescerent. Eorum quippe naturæ consentaneum prorsus videretur, ut qui literarum & humanitatis omnis expertes sint, non inter homines, sed inter feras commorarentur. At vero quod Romæ in urbe scilicet omnium principis atque in tanta sapientiæ luce homines alioquin honesto loco nati versentur, atque ita versentur, ut neminem tam apertæ eorum ignaviæ fugere possit suspicio, quis adeo mentis est impos, qui id, quam turpe sit, minime videat? Utinam tamen ipsi quoque aliquando hoc viderent, exploreteque cognoscerent. Profecto in abditissi-

mo

mo aliquo orbis angulo focordia suæ latibulum quærent. Neque enim perexiguam in hac urbe diem agere eos sineret pudor atque ignominia : sed quasi saxa hæc ipsa ac rudera , quæ certe plurimo eruditionis sensu informata sunt , in eorum pinguem reclamassent inertiam , hos penates , hæc templa , atque hæc moenia continuo fugerent , abirent , proficiscerentur . At quoniam usque eo se ignorant , atque urbis hujus aspectu tantopere delectantur , maneant , si libet , Romæ : imo etiam , si Diis placet , in literatorum hominum coetum sese haud raro immiscere audeant . Hoc enim nobis ad infamiam , qua ipsi in literatissima urbe maxime flagrant , dignoscendam luculentius percommode cadit . Quid vero inter viros summa sapientia ac doctrina ornatos agent istiusmodi homines in literis peregrini omnino atque

que hospites? Qua ratione inscitiam suam dissimulabunt tam callide, quin apud omnes ridicula capita censeantur? Tacebunt, credo. At præterquam quod silentii hujus importuni diuturnitas eos aperte nimis de ignavia sua coargueret, quid tandem est in honestissimo hominum conventu, ubi de multiplici disciplinarum genere, de amoenioribus literis, de Historia, de Dialectica, de Geometria res sit, nihil respondere, nihil penitus dicere, ac prorsus obmutescere, nisi revera se truncum stipitemque inanimem venditare. At fortasse loquentur. Quid vero? Qua de re? De iis, opinor, optimis artibus, quarum non modo dignitatem, naturam ac partitiones ignorant, sed ne nomen quidem satis perceperunt? Recenti memoria factum quæso cognoscite, cui nisi pro testimonio accederent complures viri gravif-

vissimi , de industria a nobis excogitatum confictumque esse videretur . Hominem in primis nobilem , sed in literis plane novum cum aliis plurimis , qui dignitate perinde ac doctrina eminebant , convocaverat ad convivium vir in hac civitate primarius . Cumque epulæ variis honestisque protraherentur sermonibus , accidit id , quod fere inter literatos viros solet accidere , ut mentio fieret de iis optimis artibus , quas ut libero homine dignas , ita majores nostri liberales ac peculiari nomine bonas artes appellarunt . Has itaque Romæ hoc quidem in tempore florentissimas esse partim contendebant , partim e contrario jacere & jam quasi ad interitum vergere . Cumque opinionem pro se quisque suam quæ ratione , qua exemplis confirmaret ; homo ille insulfus , qui Philosophiam ne primoribus quidem labris attigerat ,

nec

nec quantum discriminis inter liberales & mechanicas artes intercederet, unquam audierat; miror, inquit, mercurule a quopiam in dubium vocari, num bonæ artes Romæ hac tempestate vigeant, in qua aurigandi studium magnopere vigere nemo est, qui dubitet. O singularem animi stuporem! O amentiam incredibilem! Quos risus tam levem importunamque sententiam consequutos fuisse putatis? Excusari quidem facile poterat homo imperitus, si inter ingenuas ac nobiles disciplinas maxime posuisset architecturam ac pingendi sculpendique facultates, quas in Urbe dudum singulari Clementis XI. beneficentia restitutas ac præmiis auctas fuisse videmus. Enimvero inter liberales artes aurigandi peritiam extollere, cui risum non moveat? In eo tamen, puto, deceptus fuit homo peracuti ingenii,

T

quod

quod complures in hac civitate vidisset principes viros aurigandi studio tantopere delectari; & quod dolendum magis est, persæpe in liberorum institutione ad id magis incumbere, ut pueri bene ac naviter equis inflectendis, aut sonantis flagelli crepitu concitandis assuescant, quam literis honestisque moribus informentur. Sed jam nimium multa de iis, quæ fortasse per jocum, tum etiam ex industria ad convivii hilaritatem dicta fuisse videantur. Fac tamen de trita atque omnium ore pervulgata historia aliqua sermo gravis omnino ac serius inciderit: quam inepta tibi ac minime consentanea ejusmodi homines respondebunt? In eos tunc perbelle cadit Galeni illud: stulti ad cribrum. Quandoquidem indistincte nulloque judicio ætates hominum ac tempora pertractantes, confundent Persas ab Alexandro

dro victos cum iisdem sub Cyro rege
victoribus: Catonem Cenforium indi-
criminatim pro Uticensi usurpabunt,
aut unum etiam ex duobus confla-
bunt; unoque verbo, quot dicta, to-
tidem congerent anacronismos: nisi
forte Alexandros, Cyros, Catones
aliaque hujus generis celebratissima
nomina audientes, tanquam ad sibi
ignotas prorsus ac barbaras voces hæ-
reant. Quid vero si de urbe aut pro-
vincia aliqua, non ad Antipodas qui-
dem posita, sed a nobis paulo remotiori
instituitur oratio? In quot enormes
impigent scopulos, quantisque loco-
rum sese implicabunt erroribus? Nam
cum omni Geographiæ lumine ca-
reant, haud raro fit, ut tam longe ab
eo, quod propositum est, aberrant, ut
si de Asiæ rebus agatur, iidem in Ame-
rica versentur, ac de Mexico interro-
gati de Æthiopia respondeant. O mi-

feram plane atque infelicem illitectorum hominum conditionem ! Si taceant , ut eliques reprehenduntur ; si loquantur , citra risum & infamiam loqui minime possunt .

At vero non Romæ tantum , dicet aliquis , sed in multis quoque aliis civitatibus eadem manet id genus hominum irrisio idemque supplicium . Non est igitur , cur in ipsos Romæ singas singulare patibulum . Apud omnes fere populos de literis optime meritos haud dissimiles ignaviæ suæ poenas perpendant necesse est . Fac omnino ita esse : & quacunque in civitate sint isti literarum ofores , dedecore ignominiaque notentur . Nusquam tamen id magis aut frequentius , quam Romæ contingere posse contendo . Quod quidem ne temere aut ex levi aliqua conjectura dictum esse videatur , urbem Romam ejusque conditionem exuberantius ,

rimo ; quo per omnem ferme ætatem
 ditata fuit , doctrinæ censu mecum ,
 paulo accuratius penditote. Quanta hic
 semper hominum doctissimorum fre-
 quentia? Quanta poetarum, rhetorum,
 philosophorum theologorumque pri-
 mi ordinis multitudo? Quot clarissima
 jurisprudentiæ lumina? Ut in qua di-
 sciplina alibi locorum vix unus aut al-
 ter alicujus nominis reperitur , in ea
 Romæ veluti multiplex seminarium
 existat. Cum enim ad hanc Urbem ,
 Christiani imperii caput , ex omni-
 bus prope orbis partibus in diem con-
 fluant viri ingenio acerrimi atque in
 omni disciplinarum genere perpoliti ,
 tanta hic est , semperque fuit ingenio-
 rum ubertas, tanta literarum gloria ac
 dignitas, ut vel Athenis Roma doctri-
 næ palmam eripuisse, vel Athenæ Ro-
 mam commigrasse videantur . In hac
 igitur tanta ingeniorum luce tantoque
 con-

concurſu ſapientum ubinam tarditatem atque animi ſui ſtuporem illiterati homines occultabunt? Amicitiamne aliquam familiaritatemque inire poterunt, in qua apud viros & dignitate & eruditione graviſſimos minus offendant? Quod tandem vitæ genus in Urbe agent? In aula, opinor, Purpurati alicujus principis locum nobilitate aut gratia ſibi comparabunt. Itane vero? Dicam plane, quod ſentio. Rejicere ab ſe deberent omnino ignavos hujusmodi homines ampliſſimi Patres; & in hac re maxime, clariffima illa Romanæ purpuræ lumina, Bemboſ, Sadoletos, Contarenos, Campegios, Eſtenſes, Borromæos alioſque horum ſimillimos imitari, quorum ſollicitudo in eo præcipue fuit, ut perhonorifica mercede propoſita, niſi viros literis ac doctrina præſtantiffimos in ſuorum familiarium ordinem neminem

nem cooptarent. Hinc enim esset & literis patrocinium & amplissimæ dignitati ornamentum. Hinc nominis sui memoriam non cum vitæ tempore dimitterent, sed cum omni posteritate adæquarent ex literis suorum ac monumentis immortalitate donati. Sed non id agimus; utque jam eo, unde digressi sumus, redeamus: esto in aulam admittantur isti, non tam homines, quam hominum simulacra, ut saltem ipsimet aulæ ornatum conferant statuarum more, aut earum arborum similes, quæ multo foliorum tegmine ornatae ad hortorum amoenitatem conferuntur, cum nullos præter ramos frondesque afferant fructus. Neque enim longe dissimilem in aula speciem præferunt elegantes isti, bene capillati, unguentis delibuti & ad omnes officiorum formulas prope facti. In hoc igitur officiorum regno beatam
qui-

quidem pulchramque vitam sibi ducere videantur . An vero hic demum eorum stultitia immunitatem consequetur ? Atqui non modo apud domesticos , sed apud externos quoque , quibus sæpe colloquantur, sæpe agant necesse est , eos crebrius irrideri jocisque notari continget . Nam fieri nullo modo potest , ut in maxima hominum celebritate atque in oculis omnium vivant, nec in viros frequentissime incurrant omni literarum studio ornatos, quos ne risum in se concitandi copiam faciant , nec libere alloqui poterunt , nec silentio dimittere . Quid igitur consilii capient infantissimi homines , ubi nomen atque existimationem suam in tam difficili loco versari videant ? Quo ad evitandam hujusmodi infamiæ labem se tandem vertent ? An ultro sese ignaros , stupidos & humanitatis omnis expertes esse fateantur ?

tur? Sed non erit plane, cur id de se fateantur: vel taciti nullo negotio agnoscentur. En quam scite eleganterque nobis ipsos describit & quasi digito demonstrat M. Tullius: homines, inquit, sine sensu, sine sapore; tardi, rudes, elingues.

At vero illiteratum esse nulla sit prorsus infamia, nullum probum, aut ignominia. Quin etiam literarum studia iis relinquuntur, quibus aut nullus nobilitatis sit splendor, aut saltem perexiguum patrimonium. Qui vero claritatem generis atque opes a majoribus suis acceperunt, habent jam unde prospere beateque vivant. Nullam igitur in hac splendidæ vitæ tranquillitate, etiam si in Urbe vivant, ignorantia suæ poenam duros esse putatis? Nequaquam profecto. Nisi forte nobis cum aliquo e Stoicorum secta res est, qui nihil eorum, V quæ

quæ prima mortales putant, curet, seque in eo divitem satis beatumque prædicet, quod astra contempletur. Homines autem, apud quos & ratio & dignitas & existimatio, vel saltem humanitatis aliquis sensus valeat, quo ferent animo, iis Romæ se videre, posthabitos, quibuscum vel de generis antiquitate, vel de fumosis majorum suorum imaginibus in contentionem venire pudori sibi maxime ducerent? Atqui ea semper fuit Romanorum Pontificum consuetudo, ut in largitione magistratuum, præturarum, legationum aliorumque munerum, non tam familiæ, quam sapienriæ rationem potissime haberent. Licet enim non semper in magistratu sit optimus, qui in academia fuerit princeps, raro tamen accidit, ut cum doctrinæ præstantia minime conjungatur prudentia, gravitas, continentia, justitia, fides
aliæ-

aliæque virtutes, quæ quoddam habent cum ea commune vinculum & quasi cognatione quadam continentur. Præterquam quod cujus optimarum artium cognitione careat animus, is qui poterit civibus jura describere, quid cuique tribuendum sit intelligere, dissidia civitatis componere, futura prospicere, & quid in singulis rebus sit optimum factu animadvertere? Excusavit valetudinem oculorum, cum designatus fuisset consul, T. Manlius Torquatus: neque, ut summum imperium susciperet, precibus aut ulla alia vi adigi potuit; quod rem indignam duceret, ei capita ac fortunas ceterorum committi, qui alienis oculis indigeret. Cui vero ad omnia alieno judicio alienoque ore uti necesse sit, eum nos ad ceteros gubernandos idoneum esse judicabimus? Quæ quidem singula in Ecclesiasticis muneribus, aut

magistratibus haud minus esse attendenda, tam perspicuum omnibus esse arbitror, ut hac in re supervacaneum sit immorari diutius. Cum itaque Romæ non ii digni honoribus esse judicentur, qui genere, nobilitate opibusque maxime præstant, sed qui præterea integritate vitæ ac doctrina ad eos tanquam per gradus efferuntur; ecquis non videat, in hac civitate imperitis hominibus omnem ad dignitatem aditum esse interclusum? At enim hujusmodi homines forte sua contenti, nec de magistratu, nec de prætura solliciti, procul negotiis in otio placidissime acquiescunt. Sic opinor: istæc nihil curant scilicet. Næ vehementer errant, qui de cupiditate istorum hominum & ambitione tam religiose judicant. Nemo ipsis in quærendo honore ambitiosior, nemo in petitione audacior, nemo in contentione im-

por-

portunior. Nullum enim inscitiae propius conjunctiusque solet esse malum, quam arrogantia. Quod revera hinc proficisci crediderim, quod cum notae istius homines se prorsus ignorent, nec quantum inter viros optimis artibus expolitos & aliorum vulgus intersit, comprehendant, secum iniquius agi putant, nisi a Principe ratio sui primum habeatur, ceterisque omnibus in partitione provinciarum praeferrantur. Ac proinde ex alienae dignitatis splendore ad offensionem invidiamque commoti clamitant, conqueruntur; quodque suis nequeunt consequi in rempublicam meritis, id vi & clamoribus extorquere conantur. Hoc autem ipsis si bene fausteque eveniret, quae mala per Deum immortalem rebus cum humanis, tum divinis metuenda non essent? Quandoquidem praereptis doctrinae praemiis, iisque teme

mere ab ignorantia occupatis , jam de doctrina ipsa , de virtute , tum etiam de religione actum esset omnino . At singulari Dei Opt. Max. beneficio nihil est in præsentia , quod suspicionem nobis hanc moveat . Imo vero certis jam rebus diuturnoque temporis experimento exploratissimum nobis est de voluntate Principis , qui meritorum ratione satis superque perspecta , neminem nisi merentem extollit . Videant itaque , nec sine ingenti dolore , videant ignavi isti , Romæ probis & eruditis hominibus aditum ad dignitatem patere amplissimum , seque unos magno cum dedecore atque contemptu repelli . Videant inferioris ordinis homines non modo haud mediocres opes doctrina sibi comparasse , sed ad summos quoque apices ea duce sibi met iter feliciter complanasse : se vero in civitate primarios nulla dignitate

or-

ornatos nulloque imperio præditos
inter postremos ac despiciatissimos age-
re. Videant denique sapientes ma-
gnam ab omnibus inire gratiam, &
auctoritate plurimum valere, indo-
ctos vero ubique gentium explodi,
apud omnes labe atque ignominia con-
flagrare. Hæc aliaque plura cum vi-
deant, nisi spiritu vitæ careant, omni-
que sensu destituti sint, tam incredibi-
lem animi dolorem inde capiant ne-
cesse est, ut Romæ esse supplicium,
sibi perpetuum sit multoque gravissi-
mum. Exeant igitur hinc potius, ab-
eant, proficiscantur; seque non mi-
nus ab hac molestia, quam Urbem ab
istiusmodi colluvie liberent. Neque
enim secus ab ægritudine ista vacatu-
ros puto, nisi se procul ab his tectis,
foro, templis moenibusque proripiant;
atque eo tandem se conferant, quo
nec literarum nomen, nec præstan-
tis-

tissimæ hujus civitatis fama pervaserit.

Sed omittamus aliquando inertissimos homines, eosque ignaviæ suæ poenitere, ac magnitudine doloris opprimi relinquamus. Dicendi tamen finem non faciam, quin prius vobis, optimi juvenes, conditionem vestram qua maxima possum voce summo opere gratuler. Vos enim jam iter illud ingressos fuisse video, quod ad immortalitatem nominis laudemque sempiternam maxime pervium esse solet atque expeditum. Neque enim vereor, ne ex hac vestra discendi cupiditate studioque sapientiæ singulari tantum, vobis accessurum sit dignitatis, quantum infamiæ ac turpitudinis illiteratis hominibus ex eorum ignavia aspergi solere intellexistis. Pergite itaque, qua cœpistis, animorum alacritate, diligentia atque industria; & frequenter vobiscum in ea Urbe vos esse perpen-

pendite, quam quemadmodum virtutis sedem, bonarum artium officinam ac domicilium gloriæ gentes omnes uno consensu confitentur, ita molestissimum in ea ipsa solent supplicium ignavi homines experiri. Ac proinde si vos id, quod maxime debet, pulcherrimæ Urbis hujus majestas ac summa amplitudo delectat, in eam studiorum rationem diligenter incumbite, quæ a laude ac celebritate Romani nominis nihil unquam abhorreat. Quamobrem primo sapientissimi Pontificis Clementis XI. summam eruditionem cum singulari virtute conjunctam, deinde ceterorum clarissimorum hominum, qui dignitatem Urbis magna sapientiæ fama sustinent, exempla vobis proponite. Horum labores intueamini, horum degloria dies noctesque cogitate, & ad eam exæquandam omnes ingenii nervos contendite.

X

Hoc

Hoc autem quo facilius consequamini, habetis in hoc Romano Archigymnasio publice constitutos eruditissimos homines, qui vobis in hoc itinere duces optimi esse possint: quorum labori quotidiano ac diligentiae ut pari respondeatis industria, certe vos non tam oratio mea, quam dignitas vestra, nomen atque existimatio cumulatius cohortantur.



Amplissimis XII. Viris
 SACRÆ CONSISTORIALIS AULÆ
 A D V O C A T I S

E T

Archigymnasii Romana Sapiencia

R E C T O R I B U S ,

JOANNI FRANCISCO FAGNANO DECANO.

ALEXANDRO CASALIO.

ANTONIO FELICIANO MONTECATINO

DESIDERIO SPRETO.

JACOBO SARDINIO.

PROSPERO LAMBERTINO RECTORI DEPUT.

FERDINANDO DE VALENTIBUS.

PETRO POMPONIO DE VECCHIS.

CAROLO Mariæ SACRIPANTI.

ANTONIO SERLUPIO.

BONIFACIO SPRETO COADJUT.

* * * * *

PAULINUS A S. JOSEPHO SCHOLARUM-PIARUM.

A 2

II-

Illustr.^{mi} & Rev.^{mi} Dñi.



UM ego semper de amplif-
simo Collegio vestro tam
præclare senserim, quam
qui maxime, baud certe
mirari debetis, si oratio
hæc mea in lucem exeat vestro potissi-
mum nomine commendata. Unde enim
mibi præsidium magis firmum contra ser-
mones & voculas malevolorum, quæcun-
que future sint, quam a singulari vestra
sapientia, gravitate, consilio atque au-
thoritate? Nemo sane quicquam poterit
de instituto ipsius orationis detrabere,
aut aliqua ex parte reprehendere, quin
politam quoque ac latinam scribendi ra-
tionem, quam in vobis præ ceteris suspi-
ci-

cimus, reprehendat. Ego equidem non
 ignorabam difficile omnino esse, ut vir
 sanctissimus Hieronymus ait, senum mu-
 tare linguam. Sed argumenti hoc genus
 iccirco maxime scripsi, ut forensi juven-
 tuti consulerem, eique stimulos admove-
 rem, ut vix e carceribus prope dicam
 emissa statim optimo sermoni assuesceret,
 & quantum fieri possit, ab intolerabili
 illa dicendi barbarie resiliret. Id quod
 etiam in causa fuit, cur mihi persuaderi
 potuerit, ut hæc ipsa oratio typis edita
 pervulgaretur. Nam quod munus Rei-
 publicæ, inquit Cicero lib. 2. de Divin.
 afferre majus meliusve possumus, quam si
 docemus atque erudimus juventutem?
 Dubitari autem vix potest, quin inde
 consequuturus sit fructus minime pœniten-
 dus, si adolescentes nostræ civitatis ve-
 stro perquam sapienti iudicio, tum etiam,
 quod magis est, exemplo, hoc ipsum ora-
 tionis propositum probari intelligant. Vos
 ergo,

ergo, qui in altiori isto dignitatis gradu collocati. iuventutem ipsam forensi discipline addictam studio laudis & virtutis inflammare debetis, libentibus gratisque animis argumentum huiusmodi excipite. Quod quidem vim, quam ad suadendum ab ingenii mei tenuitate habere non potuit, longe maiorem, ut spero, ab auctoritate vestra obtinebit.



DE

DE FORENSI
LATINITATE
EXPURGANDA.

ORATIO V.

Habita Kalendis Decembris, anno

M D C C X V I.



ON ignorabam profecto
si de latinæ linguæ barbarie, quæ jampridem
forum occupavit, ea
libere dixissem, quæ
quidem dicenda esse videntur, per-
multos fore, qui me laboremque
meum pro dignitate ipsius fori, tum
etiam pro communi nostræ civitatis
bono susceptum reprehenderent. Satis
enim intelligebam, quod etsi res tota,
de qua agerem, a nemine vocari pos-
set

set in dubium, eorum tamen, qui im-
politam illam scribendi rationem pu-
blice defendunt, tantam fere ubique
esse frequentiam auctoritatemque, ut
si ex adverso stetissem, quasi contra
fluvium ire voluisse viderer. Itaque
non immerito suspicabar, propter dis-
sipatam adeo in vulgus ea de re opinio-
nem me vim nullam in dicendo esse
habiturum; nec profuturum magis,
quam si surdis, ut ajunt, scopulis ca-
nerem. Illud quoque me vehementer
urgebat, vix fieri posse, ut res tam
caute moderateque pertractaretur,
quin magnam fori subirem invidiam;
cum multi hoc ipso argumenti genere
quasi actionem quandam in se consti-
tutam fuisse putarent: proinde mini-
me defuturos, qui me nisi temeritatis,
at imprudentiæ certe coarguerent,
quod ejusmodi genus hominum maxi-
me morosum & irritabile nulla neque
pri-

privatim , nequē publicē læsus injuria
 laceſſiſſem , quorum nec dignitatem
 ignorare, nec ſapientiam aſpernari de-
 buerim . Quæ quidem ſingula quan-
 quam me commoverent plurimum, &
 ne impeditam adeo dicendi provin-
 ciam ſuſciperem , etiam atque etiam,
 deterrerent ; vicit tamen omnem ſive
 metum , ſive pudorem mihi natura at-
 tributum incredibilis animi dolor, quo
 carere non poteram , cum viderem
 in hac tanta literarum luce tantaque
 diſciplinarum omnium cultura fere
 neminem eſſe , qui de veteri ſplendore
 civili ſcientiæ reſtituendo cogitaret .
 Dolebam igitur & acerbè ferebam
 venerandam legum majeſtatē non
 modo ab antiqua illa dignitate deſci-
 viſſe , ſed etiam partim hominum im-
 peritorum ignorantia , partim male-
 volorum pertinacia , partim quoque
 quorundam culpa , qui populares eſſe
 Y aut .

aut videri volunt, in diem ita deprimi, ut pristini vestigium nitoris in ea jam plane nullum recognoscas. Quamobrem contemptis, quicumque de me, tandem futuri essent, hominum istiusmodi sermonibus, constitui eam hodierno die de stylo forensi orationem, habere, unde & lectionum mearum auspiciū esset, & honestissimi juvenes, qui ad amplissimam Juris facultatem in hoc Romanæ Sapientiæ Gymnasio daturi sunt operam, tempestive intelligerent quantum de dignitate fori gloriaque Jurisprudentiæ detrahant, qui in judicialibus causis emendatam scribendi rationem minimi putant. Quocirca etsi non ignoro, me mihi plus oneris, quam revera ferre possim, imposuisse, si non modo rem universam ac penitus, sed ex parte complecti voluero; illud tamen, quod animum relevat meum, est jucundis-

si-

simus iste hominum sapientissimorum
 conspectus, ex quorum auctoritate,
 præsidium satis firmum mihi fore con-
 fido. Multos enim adesse video tum
 summo ingenio ac doctrina, tum a fo-
 rensi usu atque exercitatione maxime
 commendatos, quibus lutulentam,
 ejusmodi dictionem non solum non
 probari, sed ab eisdem vix magno
 cum stomacho eam tolerari certo scio.
 Quorum quidem judicium, si qua in
 parte vel orationi meæ robur, vel su-
 sceptræ causæ deerit patrocinium, in-
 star teli mihi erit, quo & adversario-
 rum audaciam exultantem reprimere,
 & civilis scientiæ dignitatem sustinere
 conabor.

Animadverti autem fore mihi in
 hac causâ cum duplici hominum ge-
 nere negotium. Quorum alii ea sunt
 austeritate ingenii, vel odio in optimas
 disciplinas, ut in foro non aliam omni-

no dictionem, nisi insuavem illam, rudem ac semilatinam usurpari oportere contendant. Alii vero etsi in ceteris rebus munditia sermonis delectantur plurimum, in causis tamen id aut minus necessarium putant, aut de industria negligunt, ne fortasse delicatiores esse videantur. Quibus ut ordine utrisque respondeam; vos primum appello, severi legum interpretes, qui caput in foro neminem extollere posse censetis, qui literarum elegantia studioque bonarum artium teneatur. Quam tandem juris regulam, quænam edicta prætorum, aut de Cæsaris scripto sanctionem in medium afferetis, qua quidem caveatur, ne quis in jure dicundo utatur verbis propriis, significantibus & ab eorum, qui latine loquuntur, consuetudine non abhorrentibus? Contra ego nullo negotio vobis planum facere potero

ca-

castitatem sermonis dicendique proprietatem, non modo ab usu forensi alienam non esse, sed summis auctoritatibus diuturnaue temporis præscriptione eam ipsam quodammodo præcipi atque mandari? Nam quis ignorat e quonam fonte ad nos primum defluerit universa Romani juris scientia? Nonne de summa virorum doctissimorum sapientia, qui XII. Tabularum interpretationi ea doctrinæ laude præerant, ut eorum domus, ut ait M. Cicerō, haberetur veluti totius oraculum civitatis? Imo apud omnes in eam existimationem ac sapientiæ famam venerant, ut cum a Græcis primo, tum deinde a populo Romano non alio quidem nomine, quam Sapientes appellarentur. Quis igitur sibi persuadeat ejus ordinis homines inde, in vulgus tam præclarum nomen fuisse assequutos, quod de jure rusticana ac
pla-

plane inculta oratione populo responderent? Aliud profecto fuit hominum Græcorum ingenium. Næ amabant illi politam dicendi rationem: oblectabantur maxime suavitatem sermonis. Proinde Homerus haud visum iri putavit Nestorem summæ prudentiæ virum, neque Ulyssem maximum imperatorem, nisi singularem utrique in dicendo laudem tribuisset. Quid vero de populo Romano? Cui sane emendatum scribendi genus ita placuisse accepimus, ut quos complures ediderat de Jurisprudentia libros C. Trebatius eques Romanus, homo tum M. Tullii familiaritate, tum etiam C. Cæsaris consuetudine atque amicitia celebratissimus, minimi fecerit, quod non admodum eleganter conscripti fuissent. Neque probavit magis, quæ Q. Ælius Tubero de publico & privato jure acute & subtiliter scripsit, quod non nihil
ve-

vetustiora & fere absoleta verba affectaverat. Contra vero quanto honore sunt habiti Publ. Scævola, Q. Mutius, Gallus Aquilius, L. Crassus, Ser. Sulpicius, M. Cicero aliique plurimi, qui ad juris civilis scientiam non modo summam eruditionem, sed etiam verborum delectum mirumque latinitatis candorem adjunxerant? An vero quod nobiliori stylo ac ratione minus vulgari scriberent, iccirco aliquid de dignitate juris eos detraxisse quisquam sanæ mentis judicavit? Atqui illud de Ser. Sulpicio, ut ceteros missos faciam, proditum est memoriæ, eum latinæ linguæ studium tantopere coluisse, ut quandoque M. Varronem de germana vocabulorum significatione non secus quam de summo negotio consuleret.

At enim aurea fuerunt ista latinitatis tempora, quibus Romæ non modo

do curia & forum, sed theatrum, sed balneæ, sed popinæ quoque ipsæ multo sane felicius, quam nos, latine & intelligebant & loquebantur. Neque illos ætatem plurimam, ut nunc nobis usu venit, ad unius linguæ notitiam traducere necesse erat, sed elegantiores dicendi modos de nutricum sinu cum lacte prope ipso accipiebant. Mirum itaque videri non debet, si id temporis, quando scilicet non tam præclarum erat, ut ipse Cicero ait, scire latine, quam turpe nescire, homines summo loco ingenioque ad juris, quod profitebantur, intelligentiam singularem pariter sermonis elegantiam adjungerent. Fac ita esse omnino. Neque enim me longius oratione abduci patiar, ut doceam, non eam omnem, qua illi tantopere præstabant, dicendi laudem ita fuisse natura partam, ut diligentia ac labori locus haudquāquam
fue-

fuërit. Satis fit quod hac de re Quintilianus copiose ornatèque disseruit. Sed antequam respondeam, illud monendos vos esse video, veteres illos, quos nominavi paulo ante, viros eloquentissimos jurisque peritissimos me non iccirco in medio proposuisse, ut ad eorum amplitudinem homines nostros effingerem proxime, aut undique conformarem. Illos enim singulos, ut de uno M. Tullio Plinius pronunciauit, extra omnem ingenii aleam positos esse perspicuum est. Sed ut petita a vetustissima juris origine sapientissimorum ejusmodi virorum exempla os tandem occluderent iis, qui palam dictitant forenses hominem a studio & elegantia literarum alienum esse oportere. Age vero, occasum interitumque suum Romanæ linguæ splendor obierit; & aureum illud latinitatibus seculum ætas deinde ferro deterior

Z

lon-

longeque corruptissima consequuta fuerit. Verum in hac ipsa literarum caligine quonam quæso scribendi genere in judiciis homines usos fuisse putatis? Dicendine rationem puram & emendatam usurpasse, an vitiosam, an fordidam de triviis haustam & plebeculæ mores olentem? Equidem si maturius id, quod res est, perpendamus, facile quidem erit comprehendere, tunc summa dicendi proprietate maximoque verborum ornatu de universo Romanorum jure conscripsisse & Cajos & Paulos & Ulpianos & Papinianos & Tribunianos aliosque complures, qui per eam ætatem, inter mortua jam prope omni latini sermonis luce, se forensi operæ addixerant; ut eos certe non mediocris notæ scriptores, sed omni literarum præsidio benemunitos fuisse dubitari nullo modo possit. Quantam enim esse constat ve-

nu-

nūstatem orationis atque elegantiam ,
 quam sane continent Pandectæ , Co-
 dices , Institutiones Novellæque Con-
 stitutiones , & si quæ alia sunt ab ipsis
 digesta de universo civili jure volumi-
 na? Quamobrem Laurentius Valla Ro-
 manorum omnium scriptorum censor
 acerrimus , non modo eos censoria illa
 virgula sua mulctare ausus non fuit, sed
 etiam libere fatetur , se quidem per-
 legisse quinquaginta Digestorum li-
 bros ex plerisque jure consultorum
 voluminibus excerptos , & relegisse
 cum libenter , tum vero quadam cum
 admiratione . Primum quod nescias ,
 inquit , utrum diligentiane an gravi-
 tas , prudentia an æquitas , scientia re-
 rum an omnis dignitas præstet , & ma-
 jori laude digna esse videatur . Deinde
 quod hæc ipsa ita in unoquoque illo-
 rum omnia egregia sunt & perfecta, ut
 vehementer dubitari possit , cui quis

sit præferendus . His autem nihil est ,
 ait ; mea sententia , quod addi adimive
 posse videatur tam eloquentiæ , quam
 latinitatis & elegantiae , sine qua cæca
 omnis doctrina est & illiberalis præ-
 fertim in jure civili . Quid planius , quid
 sapientius , aut quid accomodatius dici
 poterat ad jugulandam omnino homi-
 num nostrorum audaciam ? Quid ? ne-
 gabuntne illos summam in foro laudem
 fuisse assequutos , vel eo dicendi genere
 forensis officii muneri non undique sa-
 tisfecisse ? Hoc autem præterquam
 quod dignitatem eorum ipsorum , quo-
 rum isti sese interpretes esse & dici vo-
 lunt , & quorum auctoritatem in judi-
 ciis non minus quam aras & focos
 tuentur , magnopere offenderet , longe
 alia certe fuit semper , quam sapientis-
 simus quisque habuit de talibus viris ,
 opinio . Illos quippe clarissima juris-
 prudentiæ lumina , ornamenta legum ;
 ju-

judiciorum propugnacula & humanæ societatis firmamentum appellant Antonius Faber, Balduinus, Cujacius alii-
que plures. Imo Balduinus ipse, homo perquam acri ingenio, nec postrema apud eos, qui in foro versantur, auctoritate, in commentariis suis, quibus institutiones juris ornavit, illud primo loco admonet, ut singularem Dei Opt. Max. providentiam suspiciamus, qui quemadmodum olim eos sempiternæ memoriæ viros Josephum in Ægypto, Danielem in Babylonia, Athenis Periclem, Lacædemone Lycurgum aliosque alibi, ita postea Romæ Papinianum ad conservandam humanam societatem & justitiæ splendorem excitaverit.

At mutata est jam, inquit, omnis illa vetus judiciorum ratio. Descivit ab elegantia orationis ad formularum quarundam angustias pompa illa foren-

ren-

rensis; neque nunc ut olim in sub-
 sellis eloquentia dominatur, sed jura.
 Habeant igitur veluti fundum suum,
 grammatici & verborum censum &
 opes elegantiarum. Nos quidem non
 de verbis, sed de patrimoniis, non de
 nominibus, sed de legatis, de vendi-
 tione bonorum, de successione jure
 nostro agemus. Illi se politos dicendi
 magistros de Ciceronis schola evasisse
 & omnes lepores, Tulliana omnia my-
 rothecia consumpsisse gloriantur. Præ-
 clarum satis quid nobis esse videbi-
 mur, si multo labore multisque vigi-
 liis contigerit nos haud longissime
 abesse ab Accursii, a Bartoli, aut Bal-
 di gloria, qui tamen grammaticorum
 judicio gothice magis quam latine
 scripserunt. Rerum sane, non verbo-
 rum nos urgeat oportet sollicitudo. Ne-
 que decet causidicorum sermonem re-
 bus tam gravibus occupatum juncturis
 &

& quasi syllabarum numero insistere :
 unoque verbo , sic a nobis de jure
 scribendum , ut nec diligentiori voca-
 bulorum studio judicum torqueantur
 ingenia; neque sit, qui sensum omnem
 orationis nostræ liberius & sine artifi-
 cio excurrentis non probe omnino per-
 cipiat . O acutam excusationem ! O
 defensionem singularem ! Enimvero id
 primum libere dico , eos frustra conari
 præclara illa Bartolorum ac Baldorum
 nomina quasi murum nobis opponere ,
 ut ex tam magnis auctoritatibus ha-
 beant firmissimum inertiae suæ propu-
 gnaculum . Excusant quippe illos tum
 etiam alios ipsamet tempora , quibus
 non modo omnis latina lingua interci-
 derat, sed quod magis dolendum, quod-
 que omnes deplorant ejus ætatis histo-
 riæ , talis pervaserat in omnium ani-
 mos stupor, talis dementia oblivioque
 literarum , ut de iis temporibus nihil
 omni-

omnino extet hominum memoria dignum. Quapropter in summis de eo genere viris, qui certe in civili scientia sunt longe omnium principes, si fermo rudis & gothicus, si historiarum literarumque ignorantia deprehendatur, condonanda profecto sunt illis pro temporis ipsius ratione: cum præsertim istiusmodi errores pura exactaque Romani juris notitia, quam diu sepultam nobis immenso labore restituerunt, cumulatissime compensaverint. Quænam itaque, malum, est ista amentia in tanta nunc literarum luce gothicam ejus seculi barbariem pugnacissime tueri velle, quam revera Bartolus ipse si revivisceret, jam omnino detestaretur summoque studio expurgaret? Et sane quid est, quod teterrimum illud loquendi genus minime sibi retinendum fore putaverint quotquot proxime, consequenti ætate pari judicio, acumi-

mine ingenii & singulari industria de civili jure scripsere? Imo vero quid purius, quid luculentius, quid suavius ea oratione, qua quidem usi sunt viri illi civilis scientiæ consultissimi, Alciatus, Pancirollus, Goveanus, Cujacius, Budæus, Duarenus, Tiraquelus, Contius, Hotomannus, Brissotius alique complures, qui ad jus Romanum exornandum tantam literarum ubertatem attulerunt, ut ex eorum vigiliis maximum eidem accesserit ornamentum? In hos profecto solertissimos & quasi majorum gentium doctores intueri, hos sibi duces proponere homines nostri deberent; non autem ignaviæ suæ ab eo præsidium, quærere, quod temporum potius quam hominum culpæ tribuendum esse videtur.

At multo vehementius commovet me, quod ajunt, in foro non verbo-

A a rum,

rum, sed rerum habendam esse sollicitudinem. Itane nos amentes, aut imperitos judicant, ut minime intelligamus qualis rerum, qualis verborum debeat apud ipsos esse sollicitudo? Non æqualem utramque contendo. At nego alterutram posse negligi. Cum enim omne jus aut in verborum interpretatione, aut æqui pravique discrimine positum sit, quotus quisque non videt, quantum momenti habeat verborum sensus & optima vocum ipsarum intelligentia? Sunt tibi res pecuniæque nostræ curæ atque sollicitudini. Esto: at voces, quibus res ipsæ continentur, earumque sunt indices, minimi putas? Non illum ego mehercule optimum statuerim imperatorem, cui sane certamina, aut obsessio murorum maxime cordi essent, interea vero nulla de comœatu, nulla de delectu militum cura teneretur. Quo-
ties

ties autem præpostere concepta verba
 impedimento sunt , quo minus diffi-
 cillimæ quæstionis nodus præcidatur ,
 quæ diu & altercantium fortunas &
 judicum ingenia torfit ? Dicet aliquis :
 huic etiam incommodo bene ac sa-
 pienter majores nostri consuluerunt .
 Complura per eorum manus volumina
 accepimus , in quibus singula , quæ
 propria sunt juris , vocabula enuclea-
 te distincteque adnotarunt . Ex his
 statim intelligas , quid peculium , quid
 tutela , quid familia , quid usucapio &
 hujus generis alia fere infinita . Ha-
 beant itaque sibi suas grammatici vo-
 ces , suas ad cælum efferant etymolo-
 gias , non hercle invidemus . Homines ,
 ut video , acuti rem plane confectam
 putant . Non ita tamen olim sapien-
 tiores illi legum interpretes de hoc ne-
 gotio judicarunt . Præstantiorem lon-
 ge aliam de minimo isto grammati-

corum regno opinionem habebant. Quandoquidem non ea duntaxat, quæ ad jus civile pertinerent, vocabula explorari oportere censebant, sed crebas quoque inter se quæstiones de proprietate latinarum vocum earumque primæva significatione agitabant. Hinc ab iisdem mira quadam ingenii subtilitate quæsitum, quid vitium differret & morbus, quid hostis apud veteres significaret, quid manubiæ, quid fundus, quid municipium aliaque fere, innumera, quæ cum ab A. Gellio, tum ab Andrea Alciato & Gulielmo Budæo elegantissime recensentur. Ex hujusmodi enim notitia futurum fuisse putabant, ut Romano juri & lumen & ornamentum accederet.

Atqui relicta vulgi barbarie, si politum dicendi genus prosequeremur, paucissimi jam nostra intelligerent. Quid si ad forensem usum non contortam

tam & acrem orationem postulo, quæ
 Tullianam amplitudinem exprimat,
 aut nervosam Sallustii brevitatem, nec
 quæ Taciti aculeos emittat; talem ve-
 ro, ut accurata tametsi & distincta,
 plana tamen, inaffectedata, æquabilis &
 sine fastu fluat? Estne quisquam tam
 plumbeus, aut sic ab humano sensu
 alienus, qui lectionem hujusmodi non
 longe facilius perciperet, quam indi-
 gestam illam, confusam, desultoriam
 aut etiam, si Diis placet, soloecismis
 compluribus aspersam? Quæ quidem
 quam absurda plerunque sit, vel illud
 argumento esse poterit, ingenuos quos-
 dam, quos ego novi, optimo ingenio
 adolescentes, qui legum facultati sum-
 ma spe ac voluntate nomen dederant,
 haud multo post perterrefactos ab ipsis
 barbarorum castris aufugisse. Cum
 enim, ut mihi narrabant, Ciceronis,
 Cæsaris, Terentii aliorumque his si-
 mi-

milium libris ab ineunte fere ætate,
 educati, latinitatis illius candore ac
 perspicuitate mirum in modum tene-
 rentur, tam inconditas deinde atque
 horridas caussidicorum ductorum suo-
 rum voces diutius ferre minime potue-
 rant: ad quas sane intelligendas no-
 vam sibi, ut dicebant, grammaticam,
 novos commentarios conquirere ne-
 cesse erat. At nemini sese obscuros in
 dicendo fieri velle dictitant. Optime
 est. Cur tamen ea pariunt verborum
 monstra, quæ necessario rebus obscu-
 ritatem, non lumen afferant? Illud
 potius nobis persuadeant, se operam
 dare, ut extra forum a nemine queant
 intelligi, haud valde dissentiam. Pos-
 sem equidem hoc loco forensem ali-
 quam ex ista scoria paginam in me-
 dium afferre, quæ plus nimio fortassis
 orationi meæ fidem faceret. Sed cum
 diebus singulis in omnium ferme ocu-
 lis

lis scriptiones de hoc genere versentur, non est, cur rem ipsam, quæ nonnihil invidiæ & offensionis habere videtur, verbis pluribus agam. Venio itaque ad argumentum officiorum & observantiæ plenum. Verentur nimirum ne elegantius scribendo iudices, homines quidem plurimum occupatos, molestia afficiant. Proh Deum immortalem, ubinam gentium sumus, ut indicem talis stultitiæ vocem audiamus? Elegantiæ sermonis satietatem affert, quisquilæ vero delicias & voluptatem? Delectat, credo, iudices ipsos siccitas illa & puerilis quædam dicendi insulitas, in qua cum prope nihil existat, quod non obscurum, aut alienissimo loco sit positum, necesse est plane de auctoris sententia divinare. Delectat ipsos videlicet oratio non simplici puroque stylo composita, sed verbosa, sed tumultuaria, sed

sed levibus minimisque rebus redundans. En quam præclare sentiant de ingenio studiisque ipsorum iudicium hominum sapientissimorum, quos quidem aut in literis hospites omnino iudicant, aut sic in illas infestos, ut tetterimum verborum pædorem sincera electaque dictione jucundiores ipsis fore arbitrentur. Percommode tamen in eos cadit iniqua ejusmodi opinio atque injuria. Haud immerito luunt (dicam magis aperte id, quod sentio) indulgentiæ suæ poenas. Nam quoties sibi illepida ista ac perturbata afferuntur, ad quorum ambages expediendas est non minus quam labyrinthum Cretensem ingressis laborandum, quid est per Deum immortalem quod eadem omnino ab se non rejiciant, & ad Orbili ferulam tam malos grammaticos non dimittant?

At quærunt quo pacto fieri possit,
ut

ut id temporis aliter in foro quis scribat ; cum talis scribendi ratio sit jam omnium usitatissima, cum ubique consuetudinis jus quoddam obtineat, cum postremo non secus hodie plerique omnes faciant . Mente jam recreor, quod aliquid tandem in medium attulerint, quod non leve omnino videatur . Excusandi sunt plane : communi quodam usu & necessitate peccant, non animo ac voluntate . Inurbane, scilicet impoliteque scribunt, quia nesciunt elegantius . Parcius autem vellem nobis de consuetudine verba facerent . Quis enim est tam mediocriter in re forensi versatus, qui non intelligat, quam tenue sit & infirmum, quod ab ipsa consuetudine petitur, argumentum ? Multa sane conveniant necesse est, ut aliquid illa valeat. Quod si forte fuerit varietate temporum interrupta, neque apud omnes ita rece-

pta, quin in contrariam quoque partem aduersentur multa, vim habet tum mehercule nullam. Cum itaque juris scientia ab ipsa originis suæ vetustate fuerit semper, ut satis jam vidimus, cum omni literarum genere conjunctissima: cumque extiterint viri gravissimi atque omni laude digni, qui vix reversis postliminio optimis disciplinis in expurgando statim, ornandoque Romano jure magnopere defudarunt, cum denique per hanc ætatem, videamus, quod in hac ipsa Urbe homines summo ingenio & gravitate præditi humanitatis studia ad legum exercitationem adhibent; frustra nobis usum gentium communem objiciunt, & consuetudinem istam antiquitate venerandam tantopere prædicant. Sed plerique non longe secus scribunt. O præclaram defensionem! Quid? multitudinis exemplum, quod
qui-

quidem Seneca omnium pessimum
 pronunciavit argumentum, præsidio
 sibi esse volunt? Enimvero indigna
 semper visa fuit optimo quoquo viro
 vox istiusmodi atque consilium. Pon-
 deranda sunt hominum judicia, non
 autem numeranda. Esto pauci sint per
 hos dies, qui literarum latinarum stu-
 dium ad forensem usum traducant:
 nonne horum paucissimorum judi-
 cium, virtus, gravitas & sapientia
 pluris apud te esse debeant, quam ce-
 terorum omnium plurimorum barba-
 ries atque infantia? Neque enim ne-
 gare quis poterit, quin hi pauci mul-
 torum sint instar imperatorum, qui
 primos in foro ordines ducunt: cum
 ad ipsos gravissima quæque causa de-
 feratur, cumque hi ceteris non modo
 scientia præluceant, sed ingenii quo-
 que fama omnium maxime florent.
 Quæ cum ita se habeant, quis æquo

animo ferre possit legulejos illos , homines infantissimos , qui cum omne , literaturæ genus nihili prorsus faciant , præterquam quod poetas , oratores , philosophos , mathematicos tanquam viles animas & inutile terræ pondus contemnunt , eos præterea derident sapientissimos viros , qui de jure venuste latineque scribunt , quasi in foro desiperent , quod non barbari , quod non illorum similes esse studeant ? Hos itaque festivi isti & arguti appellare , per risum & jocum audent homines Ciceronianos , aut sesquipedalium verborum confectatores , aut etiam , quod multo indignissimum est , levia ac ventosa capita , quæ haud satis ratione constant . Ita profecto ipse ego viro in hac nostra civitate tum juris doctrina & literarum humaniorum , elegantia , tum etiam librorum editorum gloria clarissimo ab aliquo nescio

quo e nugatoribus istiusmodi illudi
 atque obtrektari, multis de foro plausu
 comprobantibus, vidi. Nequiorne
 impudentia excogitari potest, quam
 quod ab ipsismet literarum ornamen-
 tis, quæ maxime commendare debe-
 rent, occasionem arripiant homines
 gravissimos contemnendi atque irri-
 dendi? Sed in hac parte aliquo pacto
 fortasse excusari possunt. Nauseant
 facile stulti id, quod ignorant; utque
 putentur sapere, cælum ipsum, ut
 Phædrus ait, vituperant. Quod vero
 longe gravissimum, quodque nullo
 modo ferendum esse videtur, illud
 sane est, quod adolescentes optimo
 ingenio & a musis minime alienos ab-
 ducant ab amore studioque literarum,
 & quantum fieri potest, distrahant.
 Qua quidem in re quis summam isto-
 rum fraudem malitiamque non videat?
 Conantur porro in ceteris ea ipsa vir-
 tu-

tutis semina elidere, quorum uberes fructus sterilitati suæ probro aliquando fore extimescunt. Omnes incultos, omnes balbos, omnes gregis sui simillimos esse cupiunt. Quocirca vulpeculæ illius calliditatem haud inscite imitari videntur, quæ, ut in fabulis est, quo caudæ sibi interceptæ dedecus alieno cohonestaret exemplo, ceteras quoque vulpes enixe cohortabatur, ut eam pariter sibi abscinderent; quippe quæ usui non esset, sed oneri. Ita fere solent homines isti fallaci quadam benevolentia specie adolescentium animos nondum satis consilio & ratione firmatos aggredi, & sæpe dignitatem fori, quod quidem minime reprehendo, ad cælum extollere, sæpe de literarum studiis declamare tanquam de re non modo nihili prorsus facienda, sed quæ etiam fortunam hominum forensium deprimat. Nugas
er-

ergo dictitant literas esse & delectamenta puerorum: Philosophiam vero, aliorum notitiam, Geographiam ceterasque ejus ordinis disciplinas otiosi hominis occupationem: omnia denique isthæc supervacanea ac leviora ab eo repudiari oportere atque contemni, qui aliquando familiam in jure & legibus velit ducere & foro supra ceteros dominari. Itane vero? Fieri non potest, ut quis evadat magni nominis jureconsultus, nisi musis, nisi elegantioribus studiis valere jussis, incultam, cæcam ac rerum pene omnium ignorance miserissimam vitam traduxerit? O nequitiam hominum plane veteratorem! Adeone sibi persuadent posse, per summam fraudem amoliri ea, quibus ipsi carent, bonarum artium ornamenta, unde Italix dignitas, unde nostræ civitatis splendor, unde Christianæ religionis præsidium & firma-

men-

mentum constituitur? Verum enimvero errant, vehementer errant, si in hac Urbe, per antiquo optimarum artium domicilio, per hos cuniculos efficere aliquid posse putant. Habent enim adolescentes nostri plurimos, quos Romæ intueantur, clarissimos viros cum juris, tum omni literarum genere ornatos, quorum iudicio atque auctoritate perversas istiusmodi opiniones omnino refutari videant. Habent Pontificem Maximum ante oculos, virum sane literatissimum, cui difficillima Christianæ reipublicæ tempora impedimento non sunt, quo minus honestissimas disciplinas in diem amplifcet, & quam maxime potest, illustret. Habent denique saxa hæc ipsa & parietes, qui veteris doctrinæ gloriam adhuc spirantes, hominum tam desipientium vocibus prope reclamitant. Quibus sane lapidibus
uti-

utinam vis inesset exulcerata istorum, hominum capita ad sanitatem revocandi, aut saltem sic deterrendi, ut sese tandem silentio contineant: quemadmodum inepto illi apud Petronium versificatori Eumolpo contigisse dicitur.

Sed longius fortasse, quam par erat, dicendo provecti sumus. Tempori jam consulendum, cujus finibus reliquam orationis partem ita circumscribi sentio, ut eam breviter & quasi summatim percurrere necesse sit. Quanquam & hoc satis commode cedit: neque enim cum tardis & conclamatis ingeniis erit nobis deinceps laborandum, aut cum iis, qui literas e civitate exturbare conentur atque in exilium ejicere; sed cum honestissimis viris, in quibus cum dignitate forensi conjunctum est maxime omne liberalium artium decus & ornamentum.

Cc

tum. Delectantur hi plurimum, ut antea dixi; candore latinitalis, amanti purum scribendi genus; quod tamen in judiciali sermone, nescio qua consuetudine, aut opinione ducti, negligunt. Quocirca hi mea quidem sententia longe gravius peccant, quo major est in foro eorum ipsorum auctoritas: cum aliis dare videantur ansas ad forensis munditiam orationis jure aliquo reprehendendam. Sed hoc omitto. Quid autem est, quod ipsi tam humiliter demisseque sentiant de dignitate, Jurisprudentiæ, ut deteriori eam loco ac ceteras facultates esse velint? Quis enim populus, quæ gens, quæ hominum natio memoria nostra est adeo inculta atque omnis humanitatis tam expers, ut non exhorrescat ac magnopere detestetur foeditatem illam dictionis, quæ ab ætate ac moribus barbarorum veluti tabes quædam mortifera

fera defluens, in singulas quidem scientias invaserat? Hinc proinde fit, ut jam transalpinæ gentes, tum etiam Italia fere univèrsa de Dialectica, de Philosophia, de Geometria, de Medicina ceterisque iis bonis artibus libros scribat luculenter & singulari quadam proprietate sermonis. Quod igitur communiter in omnibus aliis facultatibus turpe ac vituperatione dignum esse censetur, id in jure civili non inhonestum esse videatur? At peculiare sunt aliquæ juris formulæ, quæ etsi cum castitate latinitatis maxime pugnant, nullo tamen modo dimitti possunt, aut immutari. Quasi vero id non sit facultatis cujusque proprium, ut quibusdam certis unaquæque utatur vocabulis, & suis quodammodo loquatur vocibus. Sunt enim non solum cujuslibet linguæ, verum etiam artium singularum propria quædam, ut

ita loquar, idiomatica. Habet suas Dialectica voces, habet Geometria, habet quidem Medicina. Cum itaque abunde fatis fuerit jam usu atque experientia comprobatum, liberalissimas ejusmodi disciplinas ab elegantia latini sermonis non abhorrere; dubitabisne, quin pari splendore ornatuque verborum de Romano jure valeat disputari? Quanquam ego nunquam in eorum sententia fui, qui si quod verbum ab antiquis minime usurpatum offenderint, aut quod a Cicerone ipso, aut a Cæsare, seu primo quovis alio ejus ætatis scriptore non fuerit Romana civitate donatum, stomachantur statim, fastidiosaque librum deponentes, clamitant auctori diem violatæ latinitatis esse dicendam. In hoc autem isti meo quidem judicio faciunt & arroganter & imperite. Quis enim non videat, quod rebus novis inven-

ventis, plura quoque nova vocabula inducere necesse fuerit? Quæ tametsi olim minime recepta ac prorsus inusitata, tamen haud iccirco nunc minus latina, aut barbara cenferi debent: cum jampridem ab ipso hominum doctissimorum consensu auctoritatem & jus quodammodo antiquitatis obtinuisse, videantur. Quamobrem elocutionem forensem non puris putis aurei seculi reliquiis usque adeo conflata volo, ut quamlibet vocem non ea ætate natam proscribendam fore judicem: sed mihi satis erit, quod ipsa verbis propriis constet iisque dicendi modis, quos usus literatorum probavit: quod perturbata constructione non obscureretur, quod temperata sit numeris, quod denique suavis & quadam cum lenitate profluat. Etiamne hic homines isti delicatiores cunctantur? Adhucne animis & cogitatione hæsitant?

Quid

Quid vero si stylum gravibus verbis ac sapientissimis sententiis ornatum, postulassem, quali usum fuisse videmus Franciscum Hotomannum, aut immortalis memoriæ virum Jacobum Cujacium, aut Annæum Robertum aliosque clarissimos superiorum temporum jureconsultos? Insigniter jam splendideque hoc tempore quæstiones suas expediunt plerique medici atque philosophi, de jure autem ac legibus nisi inornate, nisi incondite duriusque disceptari non poterit?

At nobis ob maxima negotia tantum otii non suppetit. Nemini sane, idubium esse potest, quin forensis vitæ genus plenum sit curarum, plenum laboris. Tot enim sunt juris anfractus, tot latebræ, tot veritatis oppugnandæ cuniculi, ut quemadmodum bella gerentibus & adeundi sunt asperi colles & munitissimæ civitates expugnandæ
aper-

apertoque sæpius campo totis viribus decertandum; sic etiam, qui in iudiciorum castris versantur, non certaminis unius incommoda, sed multa & gravissima & quotidiana subeant oportet. Quamobrem magnus ille fori ductor & quasi signifer M. Tullius, qui per summos labores in acie illa forensi plures unus victorias, quam ceteri pugnas, numeraverat, illud toties monet, præsertim vero in Orat. pro M. Coelio, in isto scilicet vitæ genere omnes omittendas esse voluptates, relinquenda studia delectationis, ludum, jocum, convivium ac sermonem pene familiarium deferendum. Itaque si homines nostri tam magna ingenii contentione tantoque animi impetu ad fori negotia incumbant, ut omnibus sibi voluptatibus, omnibus ludis interdictis, vix spiritum & vitam ducant: concedenda quidem est ipsis aliqua sermo-

monis incuria: neque valde curandum, si non accurate eleganterque scribant. Sin autem tam multis negotiis occupati, totque causis susceptis: quamquam nolo hac de re curiosius inquirere. Esto per nullam parvam moram, eisdem liceat esse otiosis, imo vero semper occupatissimi vivant; an condonanda erit iccirco ipsis levitas illa, ne dicam infamia orationis? Quæ tanta eisdem quæso necessitas impulit, ut plures reciperent causas, quam dicere accurate possint & cum dignitate sustinere? An lucri cupiditas? At si majorem vim apud eos pecunia habeat, quam nominis fama, aut existimatio fori, quid est mediufidius, quod a talibus hominibus metuere non debeamus? Quod facinus, quod scelus, ab eorum manibus abesse poterit? Certe si extra contentionem ratio mihi habenda esset, cum iis, qui hoc pacto utili-

litatem honestati anteponendam esse arbitrantur , illud primum ab ipsis quærerem , utrumne per eam scribendi socordiam e re sua sese facere putent ? At enim diligentius scribendo multo pauciores causas expediremus. Sit sane ita. Num quis ignorat, adamantem quanvis unum & perexiguum, saxi tamen multis & ingentibus longe pretio atque æstimatione antecellere ? Haud valde sapit , qui vel unam auri massam compluribus ferramentis pretiosiores esse non iudicet . Remplanius agam . Longissime quidem a proposito aberrant , dum sibi persuadent , ab iis quæstus non uberrimos fieri, qui pure emendateque causas dicunt . Hi profecto clarissimi solis instar usque adeo foro prælucent , ut omnium oculos ad se convertant ; aut imperatorum fortissimorum similes esse videntur, quorum consilium in con-

D d

ful-

sultationibus , quorum sapientia in iudiciis , auctoritas in subselliis maxime dominetur. Equidem incredibile dictum est , quam magnum nomen afferat vel unius causæ patrociniū ex ipsis studiis humanitatis splendide & luculenter pertractatum ; ut proinde mirum esse non debeat, si haud raro videamus in foro homines adolescentes iis palmam præripuisse , qui in iudiciis diu versati prope inter subsellia consueverant . Nam oratio est quoddam animi nostri speculum, in quo non adumbratam modo, sed etiam veluti expressam humanæ sapientiæ imaginem intuemur . Hinc accepimus Socratem , hominem sane sapientem , ad explorandum suorum ingenium penitusque inspicendum , aliud nihil ab illis postulare consuevisse , quam quod loquerentur . Vix enim fieri potest , ut certum quoddam sapientiæ , aut stultitiæ

in-

intus latentis vestigium non ex ipsa-
 met oratione foras erumpat atque
 appareat. Jejunitas enim illa elocutio-
 nis misera atque insulsa indicio haud
 obscuro esse solet levioris animi, sive
 hominis si non ætate, at certe judicio
 adolescentis. Quapropter Horatius in
 præclara illa ad Pisones epistola sta-
 tuit, ibi duntaxat repertum iri recte
 scribendi & principium & fontem, ubi
 existeret mens & sapientia. Cum igitur
 proprietas integritasque sermonis
 tam uberem existimationis fructum
 pariant; cumque ex earum neglectu
 facile soleant in summum discrimen
 adduci ingenii fama, judicium, gra-
 vitas atque consilium; tantum abest,
 ut nitide politeque scribentes aliquid
 de judiciario quæstu deperdant, ut ad
 ipsam dicendi elegantiam spe lucri
 amplissimaque pecunia vel maxime
 incitari videantur. At fortasse plus

æquo de re minime dubia diximus.

Quod vero magis animum angit meum multoque vehementius perturbat, est sane publica civitatis nostræ macula atque infamia, quam quotidie suscipit de teterrima istius scruptionis colluvie. Cum enim ea sit dignitas Urbis atque majestas, ut quemadmodum olim imperio, ita nunc religione ac legibus in omnibus fere gentibus dominetur; illud necessario consequitur, ut hic maxima & frequentissima fieri debeant judicia, ubi est fons & sanctitas legum, ubi sanioris jurisprudentiæ responsa, ubi demum populi ac Reges sacrorum canones, decreta & constitutiones Pontificum Romanorum sæpissime consulunt. In hac igitur tanta judiciorum celebrata tantaque juris tum humani tum divini disceptatione cum Romæ multi de foro sint, qui gravissimas de his rebus

bus quæstiones ; nulla adhibita scribendi cura , solute oscitanterque pertractant ; ecquis non videat, quantum de existimatione forum ipsum ac populi Romani nomen amittat ? Etenim plurima istius generis scripta non modo Romæ in dies singulos exeunt & in vulgus emanant , sed quod longe deterius est, apud exteras quoque gentes haud raro pervagantur , quæ ab inusitata ista scribendi negligentia de omni pariter studiorum nostrorum ratione pessime judicant . Cum enim plerunque sibi per locorum intervalla non liceat ad Urbem accedere , neque videre, aut alloqui homines nostræ civitatis sapientissimos , neque etiam congressus celebratissimos frequentare , ubi de studiis humanitatis & eloquentiæ , ubi de re poetica , de notitia veterum numismatum , de novis philosophorum inventis aliisque pulcher-

ri-

rimis rebus summo ingenio ac puris
lectisque verbis dicitur; in hanc facile
suspicionem veniunt, ut singularis illa
latinarum literarum elegancia, quæ
olim Romæ tantopere colebatur, in
eam ipsam jam commigrarit barba-
riem, quam hodie permulta olent cauf-
fidicorum Romanorum volumina. Ne-
que id sane immerito. Nam si homi-
nes, qui diu in foro versati sunt,
habiti fuerunt semper omnium opi-
nionem perquam docti insigniterque sa-
pientes; isti autem sic latine scribant,
ut id nescire prorsus videantur, quid
denum de ceteris nefas erit in eo ge-
nere suspicari? Huc quoque error alter
accedit, quod sæpe in Urbe magna
hominum istorum ratio habeatur, eo-
rumque consilium atque opera non se-
cus plerunque exquirantur, quam si
in tota civitate nemo sapientior exi-
steret, aut gravissimum quodque ne-
go-

gotium eorum ipsorum iudicio, veluti Atlante cælum, niteretur; proinde fit, ut exteri homines existimationis ejusmodi specie inducti soleant de ceterorum ingenio ac virtute conjecturam longe omnium pessimam facere. Ex ipsa autem tam perversa de rebus nostris opinione natam potissimum, fuisse arbitror earundem exterarum gentium arrogantiam prorsus intolerabilem, unde nostra despiciere consueverunt, & præ nobis unæ omnino sapere sibi videntur. Quandoquidem se suaque tam magnifice circumspiciunt, ut jam non modo poetas & oratores, vetustissimum luculentissimumque Italiæ nostræ patrimonium, fundum suum factos fuisse dicant, sed etiam nos de omni latinitatis statu atque elegantiae dignitate dejecisse gloriantur. En quem in locum deducta est vetus Italiæ gloria; en quo nominis nostri
fama

fama decessit ob pervagatam istam ineptissime scribendi licentiam. Huic autem malo nisi aliquando tandem occurratur, nemo non intelligit in diem magis ludibrio læsum iri Italiæ ipsius nomen, & quod dolendum est maxime, immortalem quoque amplissimæ hujus Urbis existimationem. Quæ quidem Urbs clarissima ac sapientissima, Christiani imperii caput, si loqueretur, nonne vos, amplissimi PP. vestramque fidem, quantum posset, hac una voce obtestaretur? Quod olim rapuit Gothus, quod incendit Hunnus, quod late Vandalus vastavit, næ mihi multo minoris stetit, quam si nunc meo nomini hæreat ignaviæ macula aut ignorantia suspicio. Vos igitur qui sacramento legum iccirco obstricti estis, ut injurias ab unoquoque propulfaretis, quousque demum illatum mihi a barbaris hominibus tam
acer-

acerbum, tam grave vulnus inultum
 esse patiemini? Illa ego, quæ olim non
 modo domicilium, sed magistra, sed
 parens literarum, ceteras omnes gen-
 tes instituebam, haud minus certe sa-
 pientia; quam imperio ipsis prælu-
 cens, nunc me videam dignam, cujus
 fortunam ipsæmet exteræ nationes il-
 ludant; & propter imperitorum non-
 nullorum socordiam veteris omne di-
 gnitatis nomen amittam? Per illa vos
 ego gravissima senatusconsulta, per ea
 sapientum responsa, quæ summa reli-
 gione colitis, per ingenium, per for-
 tunas vestras vos oro atque obtestor,
 ne pulcherrimam legum facultatem
 tam illotis manibus contrectari sinatis.
 In vestra quidem potestate positum esse
 scitote irruenti barbariæ frænos inji-
 cere. Præcludite in hoc Romano gy-
 mnasio ad juris dignitatem aditum iis,
 qui plane latine nesciunt. Prohibete

E e

do-

domo vestra juvenes, qui non apposite scienterque scribunt. Loquimur sæpe de laude, sæpe de gloria jureconsultorum vestrorum, qui optimis temporibus floruerunt. Hos vestris adolescentibus imitandos proponite: horum vestigiis ut diligenter insistant, etiam atque etiam cohortamur. Profligatam ita fori barbariem videbitis ac brevi pristinum splendorem legibus restitutum.

Hæc, vel horum similia essent, P. C. verba, quibus amplissima hæc Urbs, modo vocem posset emittere, opem vestram non postularet tantum, verum etiam flagitaret. Quibus cum mihi graviora non suppetant, aut quæ sperem majorem vim esse habitura, ut tandem faciam dicendi finem, ad hos optimos adolescentes humanitatis & eloquentiæ studiosos, quorum potissimum causa, ut initio jam dixi, hæc
omnis

omnis oratio mea instituta fuit, me convertam, eosque sane, nulla inducta persona, sic alloquar. Permagna quidem sunt præmia, juvenes, quæ vobis olim in hac civitate & ingenium vestrum & fori dignitas pollicentur. Nolite tamen per Deum immortalem pati, ut hominum barbarorum exempla ab hoc suscepto gloriæ cursu vos deturbent longissimeque deducant. Contemnite illorum sermones & vîculas, quibus temere audent bonis artibus obtrectare. Imò ad honestissimam legum facultatem viam vobis muniendam esse statuite non hercle barbariæ ac desidia, sed sincera latinitate, sed eloquentia, sed studiis honestissimis literarum. Hæc una vobis tam arduum iter molientibus sint per amplam splendidumque viaticum. Hæc sint lauta & luculenta supellex, quæ ad usum tam civilis, quam Pon-

tificii juris promatur. Itaque ex optimis quibusque scriptoribus vim dicendi & proprietatem arripite, quæ lucem rebus incredibilem affert: præsertim autem ex Tullio, qui propter ingenium & eloquentiam in judiciis regnare dictus est. Ab ipso vires & impetum orationis, ab ipso elocutionis ordinem & ornatum addiscite, eamque dicendi facilitatem, qua nihil jucundius, nihil dulcius inveniri potest. His autem ornamentis instructi ad eorum quidem jureconsultorum gloriam propius accedetis, qui non minus liberalissimis studiis, quam legum doctrina floruerunt, digni propterea omni laude ac memoria hominum sempiterna. Sed quid ego vobis antiqua repeto? Quasi vero hic magno numero adesse non videam juris perinde scientissimos ac literatissimos viros, quos vobismet imitandos propone-

nere possim. Adest scilicet hic lectissimus jurisperitorum senatus, sacra Consistorialis aulae Advocati ac fori Romani lumina: adsunt hi Principes Eminentissimi, qui praesentiae suae splendore ac majestate clariorem hunc diem illustrioremque nobis efficere, per summam humanitatem voluere. Hi sane omnes ad hanc ipsam, quam videtis, amplitudinem dignitatis, ad hoc tantum gloriae fastigium, non per inertiam, aut per literarum odium & contemptionem, sed per summum laborem, per studia optimarum artium forensi exercitatione conjuncta magna cum laude pervenerunt. Hos igitur perpetuo constanterque vobis, clarissimi adolescentes, ante oculos ponite. Horum fructuosos labores, horum praeclara studia dies noctesque cogitate. Sic enim aliquando fiet, ut vos quoque ad hanc ipsorum laudem
&

& dignitatem , quod vobis felix fortunatumque sit , jure aliquo aspirare possitis .



DE

DE USU ET NECESSITATE
ELOQUENTIÆ
IN FORO ET HODIERNIS JUDICIIS.

ORATIO VI.



Habita VI. Idus Novembris, anno
MDCCXVII.



IRANTUR nonnulli quid
caussæ sit, quod pro tan-
ta eloquentiæ dignitate
tantisque professorum
laboribus, nequaquam
satis multi adolescentes forti & magno
animo inveniantur, qui ad pulcherri-
mam dicendi facultatem omnem vim
ingenii omnemque industriam confe-
rant. Verum meo judicio mirentur
potius si quem hoc tempore ad sub-
sellia hæc nostra accedentem, quam si
aut

aut a nobis abhorrentem, aut ipsius
 eloquentiæ studium tanquam levè ac
 minime fructuosum contemnente[m],
 videant. Nam ut omittam de ceteris
 causis dicere, nemo vestrum igno-
 rat, quænam opinio his temporibus
 non apud barbaras gentes, sed in hac
 ipsa civitate, in urbe Roma de elo-
 quentiæ statu inveteraverit. Percre-
 buit enim ore atque sermone omnium,
 eloquentiæ usum prope omnem jam de
 medio esse sublatum; ejusque fines ad-
 eo anguste jam circumscribi, ut si sa-
 cras conciones, quæ ad populum ha-
 bentur, aut laudationes quasdam, quæ
 ad Principes fiunt gratulandi causa,
 vel in eorum funeribus exornandis ex-
 cipias, nullus amplior pateat locus,
 ubi ea satis valeat expatiari. Domi-
 nabatur illa quidem olim in rostris,
 latissime regnabat in foro, eaque fere
 causa in disceptatione vincebat, quæ

patronum invenerat eloquentiorem. Nunc autem immutata subfelliorum forma, judicia hac nostra ætate ita exercentur, ut in eis nihil oratorum facultati tribuatur. Cum itaque ad forensam gloriam alius jam tenendus sit cursus, alia via; frustra adolescentes nostri, qui in hac civitate ad hanc tantam spem aluntur, frustra, inquam, diutius in hac palæstra versantur. Non est sane, cur hi summo studio tantisque vigiliis in eloquentissimorum oratorum lectione occupentur: nec laude digni, qui multum ætatis atque industriæ in ea facultate sibi comparanda ponunt, cum qua nulla jam intercedit cum jure civili affinitas nullumque vinculum societatis. Hæc fere sunt P.C. ea, quæ plerique de foro homines crebris solent usurpare sermonibus. Hæc prope omnium adolescentium nostrorum de eloquentiæ sta-

F f

tu

tu una vox atque sententia . Ego vero aut rudis omnino sum rerumque humanarum undique ignarus , aut istiusmodi opinionem inanem prorsus stultamque esse & haberi oportere contendendo . Nam esto immutata sit vetus illa judiciorum ratio , esto nunc causarum actiones contineantur domesticos intra parietes ; neque eam populi frequentiam plausumque adsciscant , in quo oratorum studia maxime niti solebant : adhuc tamen in hoc ipso , quo nunc utimur , judicandi genere , dico , interdictam hodie foro non esse eloquentiam , sed in judiciis quoque nostrorum temporum suum esse eloquentiæ usum , suam vim suamque , ut paucis dicam , necessitatem . Quod quidem totum etsi primo multis incredibile esse videatur , spero tamen fore , ut hac ipsa re nihil veriùs , nihil rationi magis consentaneum esse intelligant . Cum autem

tem

tem in eo orationis genere versetur,
in quo de dignitate Romani fori, de li-
berorum vestrorum gloria maximif-
que utilitatibus agitur, profecto du-
bitare non possum, quin me hodierno
die attente libentissimeque audiat.

Quoties autem mecum ipse cogito
quam libere nonnulli confidenterque
dicant, nostris hisce temporibus ad fo-
rum accomodari nequaquam posse elo-
quentiam, toties sic mecum statuo: aut
hos temere damnare, quod minus in-
telligunt, qua re nihil turpius, nihil
impudentius; aut eos prorsus, in quo
sita sit eloquentia, non internoscere.
Putant fortasse, cum eloquentiam au-
diunt, facultatem dici, quæ quamli-
bet in partem arbitrato suo ac libidine
audientium animos flectat & circum-
ducat; quæque ita sit acris, ita vehe-
mens in dicendo, ut non tam verba
& sententias fundere, quam tela &

fulmina undequaue vibrare videatur, quemadmodum de Pericle illo Athenienſi veteres Comici tradiderunt. Cogitant, puto, oratores homines turbulentos & quaſi lymphatos, qui in id maxime incumbant, ut precibus, clamoribus atque ejulatibus turbas excitent ac tragoedias. Id demum opinantur, omnem dicendi vim uſque adeo in concitandis affectibus eſſe repositam, ut iis ſublatis, eloquentia ſtatim concidat atque intereat prorſus. Enimvero errant, & vehementer quidem errant ejuſmodi homines; nec quicquam recte judicant de eloquentia. Tantum enim abeſt, ut in excitandis animorum motibus maxime, vel ſolum occupari debeat orator, ut contrarium potius, ſi præſertim de eloquentia, quæ ad forum pertinet, res agatur, & ſenſerint & palam docuerint homines ſapientiſſimi

ii-

iidemque in arte dicendi peritissimi.
 Nam ut omittatis recordari quid olim
 hac de re gravissimus Areopagitarum
 senatus decreverit, qui semper ab
 hujusmodi lenociniis sic abhorruit, ut
 ne iudices aut dicentis aspectu, aut
 actione moverentur, sed unas rationes
 & unum jus æquitatis attenderent,
 eum in tenebris audire voluerint; dif-
 ficile sane non erit assequi, in hac ipsa
 opinione fuisse Socratem, Platonem,
 Aristotelem aliosque plurimos. Et qui-
 dem Socrates ipse cum summo capitis
 discrimine reus ageretur, suamque
 causam sic jam egisset, ut aliud ni-
 hil expectasses, quam quod iudices
 ad misericordiam dicendo commove-
 ret; noluit tamen eorum clementiam
 implorare, noluit lacrymas adhibere,
 noluit uxorem, liberos, amicos for-
 didatos producere: sed maluit honeste
 mori, quam gemitu ejulatuque mu-
 lie-

liebri vitam turpiter deprecari. Plato autem Socraticæ doctrinæ cultor optimus & propugnator acerrimus quam severe, quam graviter eos sæpe reprehendit oratores, qui parum de veritate solliciti judicum animos, admotis veluti machinis, blanditiis emollirent, & a judicii severitate, cui sese jurejurando obstrinxerant, ad lenitatem & misericordiam impellerent? Quid demum Aristoteles, qui cum tam multa eleganter ornatæque de oratoria facultate conscripserit, ejusmodi animorum motus non modo non probavit, sed eos quoque gravissime maledictis infectatus est quasi labem & nefariam judiciorum pestem? Et quidem si judicem pecunia corrumpi, nemo unquam, nisi forte improbus, præclarum duxerit; quis laudaverit artificio quodam judicem ipsum depravari longeque a recta ratione deduci? Videant ergo, quam
fa-

facile decipiuntur qui putant, animorum concitandorum vi sublata, eloquentiam nullo modo posse consistere. Quod igitur isthæc judiciorum consuetudo neque populi studia, neque iudicum iram, aut misericordiam admittat, sed summam animi æquitatem summamque placabilitatem & quasi veterem illam Stoicorum ἀπάθειαν postulare videatur, non continuo eloquentiam foro exulare optimo jure quis dixerit. Aliud est profecto pugnacem illam & contentiosam dicendi rationem, quæ ad permovendos animos maxime valet, inveterasse; aliud vero e judiciis, quæ modo fiunt, omnem eloquentiæ usum fuisse sublatum. Quis enim nobis nunc recte pronunciaverit fuisse, vestibus interdictum, quod nemo prætexta, aut toga, vel sago prisco more induatur? Præterquam quod hac ipsa ætate ἀπάθειαν istam in foro regnare:

mi-

minime video . Imo a plerisque summis caussarum patronis animadverti calliditatis plurimum & industriæ ad commovendas judicum mentes haud raro usurpari . Quorsum enim spectant illæ de adversariorum fraudibus querimoniæ ? Quorsum tam multi de mala ipsorum fide clamores ? Cur judices tam enixe orant atque obtestantur , ut honestissimæ familiæ , de qua res est , rationem habeant , ut domus paupertatem , ut rei familiaris angustiam , ut liberorum multitudinem , ut duriores fortunam & iniquissimam conditionem mature cogitent atque perpendant ? Non hæc præcipua animorum concitandorum ratio ? Non hinc locus patet , ubi magna vis eloquentiæ versetur ? Age porro , contuitur Romanum forum , multaque ex parte florentissima oratorum gloria absolevit vetustate ac vicissitudine temporum .

porum: non ita tamen obsolevit, ut maximam adhuc partem sibi in jure dicundo non vindicet.

Sed antequam rem propius attingamus, alteram mihi video convellendam esse opinionem, falsam quidem non minus & absurdam, quæ tamen multorum studia longe a nobis abducit. Putant nonnulli hominem eloquentem eum tandem esse ac dici debere, qui plena ac perenni quasi flumen oratione redundat; eumque ad Demosthenem, aut M. Tullium proxime accedere, qui ceteris hominibus verborum pompa & sermonis granditate antecellit. At vero quis tam rudis ingenio, aut in literis tam novus, qui non intelligat, plura quidem esse dicendi genera, & ad Rhetoricæ facultatem orationem amplam & copiosam non magis quam pressam & modice temperatam pertinere? Alioquin

G g

ne-

neque Isocrates, neque Plato in amplissimum oratorum ordinem cooptarentur, quod eorum oratio, ut Cicero animadvertit, mollis erat ac temperata, nihil iratum habens, nihil invidum, nihil atrox, nihil inflatum, & grandiloquum, sed casta & verecunda quasi virgo. Illum itaque dicendi arte præstantem voco, qui bene, idest qui luculenter orateque orationem tum ad res, tum ad personas, tum etiam ad tempora satis accomodatam adhibeat. Sit robustum dicendi genus: sit gracile, si mavis, atque exile, non impedio. Mirum profecto, quam varia & multiplex sit eloquentia. Quemadmodum in infinita hominum multitudine unum alteri ore ac vultu ceterisque lineamentis persimilem omnino non videas; ita ne duo quidem oratores eodem prorsus inter se stylo eademque dicendi forma conveniunt.

Al.

Alter quidem acuto ac subtili magis quam amplo ac vehementi delectatur: alter gravis incedit & majestate verborum & dignitate sententiarum: alii vero ita medium tenuere, ut voluerint illis quidem ornatiores, his autem submissiores videri; ut propterea, si vera fateri volumus, quot fuerunt olim viri eloquentiæ splendore clarissimi, totidem plane dicendi formas expresserint. Quid quod alias atque alias scribendi rationes & multiplices prope dicam ipsius eloquentiæ facies in uno eodemque homine intueri fas est? Quanta enim mehercule in uno M. Tullio dicendi varietas? Quam amplum & multiplex scribendi genus? Modo humile ac mediocre, modo augustum atque excelsum videas; jam asperum atque acerbum, jam suave ac lene fluens, ut nimirum & locus & tempus, aut res postulare videbantur.

Cum enim sapientissimus atque immortalis vir nunc in foro, nunc in curia diceret, & jam oratorem jam philosophum jam vero consulem, aut imperatorem tutoremque reipublicæ ageret, ita opportune loco ac tempori orationem accomodabat, seque ad rerum dicendarum formas ita traducere solebat, ut grandia elate ac magnifice, media temperate ac mediocriter, parva tenuiter pertractaret.

Quæ cum ita sint, quid est, quod rabulæ quidam de foro jus civile cum eloquentia jam pridem divortium fecisse contendunt? An quod præsens judiciorum status ubertatem illam orationis & dicendi ornamenta non recipit, sed sincerum potius lene ac temperatum loquendi genus, proscribendane erit continuo atque e foro exterminanda dicendi facultas? Quasi vero sublata veteri forensium actionum for-

ma

ma, omnis pariter suadendi ratio e judiciiis sublata esse videatur. Quo pacto autem sperant homines peracuti, se quicquam de jure recte statuere ac judicibus persuadere posse, si ejus facultatis præsidio careant, quæ una suadendi vim præcipue nervosque ministrat? Ego sane nihil video a recta ratione magis alienum, quodque magis consilio repugnet.

Ut causæ fidem, inquiunt, dicendo facias, & non opinione solum, sed etiam ad veritatem judicibus persuadeas, non præcepta rhetorum, aut eloquentiæ myrothecia, sed juris adeundi sunt fontes & peritissimi legum interpretes consulendi. Ita profecto. Ecce tibi ante oculos immensa rerum, ac verborum copia ex iis, quæ causæ maxime favere videntur. Sexcenta habes tum ex Romano, tum ex Pontificio, tum etiam ex statutorio jure argu-

gumenta, quæ in medium afferas. Quin etiam innumeri doctores & legum interpretes, tot controversiarum & consiliorum scriptores præbent tibi ad scribendum segetem uberrimam, atque amplissimam. Quis vero Oedipus, aut quod tibi de cælo numen affulgebit, ne tanta ac tam varia rerum multitudine obrutus de charta in papyrum scribas (verba sunt eruditissimi Polyhistoris Germani) inepta, futilia, supervacanea, thesin ipsam vel parum, vel nihil attingentia? Ita enim moris est vulgo, inquit, apud jurisconsultos. Quis, inquam, te doceat singula loco suo scite disponere, & communes argumentorum locos industria quadam rectoque ordine pertractare, ut perspicue & ornate, tum etiam breviter, quæ ad causam pertinentia sunt, explices atque expedias? Quotidianus, opinor, usus exercitatio-

tioque forensis. Itane verò? Sed unde fieri dicendum est, quod homines ætate jam matura & in foro exercitati quam qui maxime, præpostere, tamen ac perverse sine ordine ac sine delectu de jure scribant? Quid causæ tandem est, quod in tanta exercitatione usuque forensi, nihil aliud præter putidos & male futos centones farciant, qui viris doctis & eruditis stomachum movent? Nonne quia illotis, ut ajunt, manibus ad sacrosanctas, quas ipsi vocant leges, pertractandas ausi sint accedere? Nonne quia bonarum artium & eloquentiæ adjumenta non habent, unde orationis filum apte pertexere valeant? Equidem negari non potest, elegantiorum literarum studia optimum esse fundum, cui inædificari debet omnis civilis prudentiæ doctrina: quo qui careant, nunquam veram forensium laborum gloriam assequuntur.

tur. Accipite quæso testimonium non
caussidici alicujus de trivio, sed vi-
ri doctissimi & de omni juris scientia
optime meriti Hugonis Grotii, qui
Gallos, ad quos disertissimam scribit
epistolam, ita graviter admonet. Jure-
consulti munus, inquit, virum ma-
gnum non faciet, nisi eloquentia acce-
dat. Equidem magno sui experimento
didicerat homo in jurisprudentia ma-
xime exercitatus, quantum ab elo-
quentia ceterisque bonis artibus præ-
sidii habeant, qui in foro aliqua cum
laude versari cupiunt, cum ipse non
alia ratione in iis, quæ de jure belli &
pacis elegantissime tradidit, veterum
jureconsultorum in dicendo gloriam
æquaverit.

Age vero homines plerique de fo-
ro ita ingenio ac judicio polleant, ut
inutilibus amputatis, non modo quæ
solida sunt atque optima consecretur,
sed

sed singula quôque in ordinem digerant: ac satis bene disponant. Video me plus nimio de meo jure concedere: Fac tamen ita esse omnino. An propterea ob ejusmodi ingenii vim eloquentiæ studia ad forum minus pertinere censenda erunt? Quid enim ista non inelegans dispositio atque ordo, si præterea nullus adsit verborum delectus, nulla elegantia vocum, nulla denique germanæ latinitatis imago? Poteritne mehercule ejusmodi lectio mulcere legentium animos & suavitate aliqua allicere, ut attente libentique animo tota quanta est perlegatur? Lectio enim, ut optime ait Cicero, sine delectatione negligitur. Quid si lectio bene longa, aut de rebus per se injucundis, vel etiam subtilibus & obscuris? Tunc sane dilucidam puramque dictionem, quæ rebus istiusmodi lucem afferat, nemo non videt fore.

H h

ma-

maxime necessariam. Cum igitur delectus ille & cura verborum, unde recte Cæsar eloquentiam originem suam ducere affirmabat, ad eloquentiam ipsam jure suo pertineat; nemo profecto studiorum hujus generis expertus ea seligere poterit, quæ obscuriora illustrent, & insuavia ac molesta jucunditate quadam ac sapore perfundant. Non est itaque, cur miremur, si homines forenses, qui hæc nostra studia averfantur, aliquando tam obscure scribant, ut Chrysippum illum æmulari videantur, cujus integrum volumen ambiguis oraculis ac flexiloquis ambagibus sic refertum dicitur, ut ad illud enodandum novo semper opus esset interprete. Nam quod Cicero olim semel ingenii solertia, vel malitia potius in Cluentiana causa se fecisse gloriatus est, obscurasse videlicet dicendo judicum mentes: illi quotidie
igno-

ignorantia faciunt, quod se nempe dictio nitida ac sincera deficiat, qua animi sensus & cogitationes suas explicare commode valeant. Cum enim ex Aristotele prima eloquentiæ virtus sit elocutio pura ac venusta, quæ facit, ut oratio nihil barbarum, nihil insolens, aut peregrinum habeat, sed omnia singularum vocum elegantia earumque structura & collocatione optime inter se cohæreant; non video quo pacto queant luculente scribere, qui elocutionis ipsius vim & præcepta prorsus ignorant. Hinc barbaræ illæ & nunquam apud latinos auditæ locutiones, quibus quasi quodam humanitatis sale homines plane insulsi descriptiones suas condire sibi videntur. Quæ ut percipiantur, non satis est habere præ oculis glossaria universa, quæ de barbaris vocibus magno studio collegerunt Fridericus Lindebrogius,

H h 2

Hen-

Henricus Spelmanius, Gothofredus Wendelinus, Gerh. Jo: Vossius, Carolus de Frene aliique plures. Unde vero istiusmodi. cenum ac sordes homines festivi colligere poterunt? An ex purissimis veterum Jureconsultorum monumentis? An ex ipsis Justiniani institutis? An ex codice Theodosiano? Credo fortasse ex Novellis, ex Authenticis, aut Pandectis. Quam vellem clarissima ejusmodi exempla sibi ob oculos ponerent. Id quod superiori ætate summa laude fecerunt Guilielmus Budæus, Antonius Faber, Jacobus Cujacius, Franciscus Balduinus, Jacobus Gothofredus, Franciscus Duarenus aliique sapientissimi viri, qui cum civili scientia elegantiores literas & eloquentiam optime junxerunt. Quorum profecto volumina eam redolent scribendi castitatem atque elegantiam, ut si forte quæ del-

rhe-

rhetoricâ facultate Aristoteles, aut quos de Oratore libros Cicero memorie prodidit, nobis fato aliquo interiissent, ex ipsis mehercule eloquentissimis viris haberemus, unde suppleri possent eloquentiæ præcepta & omnis dicendi venustas. Cur ergo quos habent duces & optimos scribendi magistros presso pede non insequuntur? Cur singularis eorum sapientiæ vestigiis non insistant? Pudetne sequi Fabros & Cujacios, barbaros vero & imperitos, qui eruditorum omnium convicio vapulant, sequi non pudet?

At enim jureconsulti, quos mihi prædicas, sapientes quidem ac disertis, non e foro, sed ex Academiæ spatiiis extiterunt. Versabantur illi in eruditorum umbraculis ac Licei otio, ubi satis commode potuerunt jus, de quo quasi domestica exercitatione in gymnasiis disceptabant, aspergere doctrinæ

næ floribus & eloquentiæ pigmentis colorare. Nobis autem quotidie descendendum in medium agmen, in pulverem, in clamorem atque aciem forensam, ubi sane non pulchre cultis & affabre elaboratis, sed bene solidis armis pugnandum est. O præclaram pugnam! O certamen cruentum! in quo, ut video, adversarii suis se miserime telis confodiunt. Etenim satis intelligo, magnum interesse discrimen inter sapientissimos viros, quos causa honoris paulo ante nominavi & homines nostros, qui hodie in foro cum aliqua nominis fama versantur. Enimvero duo sunt omnino, in quibus eorum eloquentiam imitari & ad illam proxime accedere e præsentis more ususque fori tenentur: in scribendo scilicet & causam ad iudices referendo. Ad utrumque hoc munus certe ingenium humanitatis studiis perpolitum & di-

cen-

cendi exercitatione bene subactum,
 deposci, quis non intelligit? Ut pro-
 inde ex immutato pristino judiciorum
 statu, unde eloquentiam foro ejectam
 plerique argumentari solent, ego con-
 tra pro hac ipsa, qua nunc utimur, fo-
 rensi consuetudine, maximam ipsius
 eloquentiæ necessitatem statui debere
 contendo. Nam agebantur olim causæ
 summo apparatu maximoque splen-
 dore. Victoriæ sibi magna ex parte
 vindicabant tum patroni eloquentia,
 tum populi Romani studium, qui ju-
 diciis maxima frequentia adesse &
 æquitatis patrocinium quodammodo
 arripere solebat. Huc accedebat ejus,
 de quo erat jure decernendum, præ-
 sentia atque aspectus; uxoris lacrymæ,
 gemitus filiorum, amicorum officia
 & preces, spectata erga Rempubl.
 merita, postremo judicum pietas &
 commiseratio. Quid vero perorantis

VOX

vox atque actio? Quæ profecto sic valet ad mentes hominum permovendas, ut fama sit Demosthenem ei primas, eidem secundas ac tertias tribuisse. Gerte Cicero hanc ipsam unam in dicendo maxime dominari affirmabat. Cum igitur hæc omnia jam e foro desciverint, quid aliud misero clienti ad salutem remanet præter unam scriptiorem juris quasi naufragii tabulam? Quæ quidem si obscura, ut difficilis sit explicatu; si jejuna atque agrestis, ut legenti nausea fiat, nonne de omni causa actum esse dicemus? Continetur nunc tota quanta est causarum actio unius hominis diligentia atque industria: qui nisi in scribendo singula ad rem pertinentia in bono lumine collocaverit; nisi facti & juris nervos artusque optime disposuerit, verendum est sane, ne ejusmodi causa non præclaros exitus habeat. Et negare quis poterit

non

non majorem nunc, quam olim in foro oratoriæ facultatis usum esse ac plane necessitatem?

Alterum vero, in quo eloquentiæ studium, ut dixi, nostris hisce temporibus homini forensi majorem in modum necessarium esse judico, est nimirum causam ad judices referendi consuetudo. Qua quidem in re mirum, quantum valeat dicendi venustas & eloquentiæ præsidium. Etenim sive latino sermone, sive domestica atque vernacula lingua (eodem quippe res recidit) id fiat, talis quidem esse debet doctoris industria, ut verbis quam paucissimis rem doceat, persuadeat, flectat & jam quodammodo vincat. Quod negotium permagnum fane atque arduum qui suscipit, non temere & casu, sed meditatus & ex arte dicat necesse est; ea videlicet perspicuitate, ut rem omnem aperiat atque illustret;

iis verbis puris atque electis, ut si dicendo non delectet, at certe animos non offendat; ea denique brevitate, orationis, ut iudices, homines vel maxime occupati, longo dicendi ambitu minus defatigentur, argumenti tamen vis tota eorum mentibus hæreat penitus atque infideat. Has autem singulas oratoris partes qui non satis apte accurateque expleverit, hunc profecto muneri suo deesse judico; & nihil dubito, quin is causa, etsi optima illa sit, turpiter cadat. Quod si nonnulli naturali quadam dicendi copia, nullo adhibito studio, id satis præstant; hoc præterquam quod non est multis natura datum, sed quasi privilegium & singulare paucorum donum; id præterea eloquentiam fori non amolitur, sed ejus necessitatem luculento admodum hoc ipso exemplo confirmat. Huc quoque accedit, orationis vim ejusmodi

di insitam & a natura profectam tautologiis plerunque aliisque sermonis scaterere vitiis, quæ nisi ars dicendi opportune amputaverit, ea offendit plurimum ac molestissima esse solet.

Superest jam, ut quam brevissime, eorum refutemus errorem, qui etsi studia hæc nostra vituperare non audent, imo ea palam laudant atque extollunt, negant tamen posse fieri, ut unus idemque homo simul præstet & dicendi genere & civilis scientiæ doctrina; cum res utraque magnam vim ingenii, multas vigilias maximosque procul dubio labores requirat: nisi forte velit vel paucissimas causas suscipere & perraro ad forum accedere, vel quod longe deterius est, in jure discutiendo segnior ac remissior videri. Profecto homines isti si hæc de se sui que ingenii imbecillitate loquantur, bene habet; non repugno.

runt ipsi, ut poeta inquit, quam sibi curta supellex. At vero si ex suis viribus alios æstimare atque omnes ex ingenii sui modulo metiri velint, ferendi nullo modo sunt, imo graviter reprehendendi. Nam quæ, malum, amentia est ista, quod se præstare posse diffidunt, id universe ab nemine alio fieri posse contendere? Quis æquo animo ferat homines imperitos, qui eloquentiam ne de facie quidem noverint, quique, ut lepide Budæus ait, albane, an atra sit; dijudicare nequeant, negare tamen pugnacissime; ipsam cum jure civili posse conjungi, quo cum conjunctissima semper fuit? At magno opus est ad eloquentiam ingenio, magno conatu, summis viribus. Esto: concedatur quidem difficillima esse, quæ pulchra & admodum ardua, quæ optima. Verum si id quod est fateri volumus, ejusmodi labor iis plane

nē summus ac prope intolerabilis, qui cruda adhuc studia ad forum attulerint, & humanioribus literis vix leviter informati ad juris lauream aspiraverint. Qui vero ex humanitatis studiis solidam sibi eruditionem præoccupaverint & apparatus elocutionis uberem satis & luculentum tempestive collegerint, næ ego amens, si in causis defendendis herculeo isto sudore manaverint. Imo nullus dubito, quin ipsi prompte atque expedite de jure scribant, quemadmodum in ceteris argumentis hominibus in iis studiis exercitatis usu venit.

Sed plura jam fortasse, quam volebam, de re minime obscura. Quis enim non videt, istorum opinionem satis superque refutari exemplo domestico complurium clarissimorum virorum, qui in hac ipsa civitate a pueritia hoc consilium sequuti disputationes
fo-

forenſes cum expédite , tum ornatè ac doctè pertractant , ut non minus eloquentiæ vi , quam juris telo pugnare ac vincere videantur . Horum ſane auctoritas in hac Urbe quam maxime invaluit , non quod juris ſcientia ceteris longe præſtent , ut ſibi falſo perſuadent plurimi , ſed quod dicendi copia & facultate ceteros antecellant . Quo fit , ut ipſos magna clientum caterva ſtipatos huc illuc quotidie volitare videamus & pecunias & opes & amicitias ſibi præclaras comparare . Poſſem hic multos nominatim proferre ex iis , qui hodie in foro familiam ducunt , quique hoc indiſtriæ genere ceteros ſui æquales longo poſt ſe intervallo reliquerunt . At nolo aliquem nominare , ne aut cuiquam adulari , aut ſi non omnes , ut par eſt , laudavero , debita laudatione quemquam fraudaſſe videar . Sed præſtat id tacitis veſtris

co-

cogitationibus existimandum relinquere, de quibus hanc tantam laudem intelligi cupiam. Neque enim facile latere possunt, si velint; cum sint in oculis totius civitatis, atque eorum fama omnium sermone celebretur. Horum dignitate atque opibus mirum profecto, alios ad hæc ipsa studia non incitari atque accendi: quemadmodum fama est, Miltiadis trophæa Themistoclis animum ita inflammasse, ut vel quiescentem e somno excitare solerent. Atqui isti duro ore possunt quotidie non unius, sed multorum præclaras in foro victorias & trophæa oscitantes intueri. O singularem stuporem! O stultitiam incredibilem!

At magnam quidem vim esse in fortuna aliqui putant, & inanis ejusdem numinis arbitrio illud fieri, ut aliquando etiam in foro primos ordines ducant, qui eorum opinione inter greg-

garios milites deberent incēdere. Alii vero ingenio, ut sibi persuadent, altiores cælum ipsum, ut poeta inquit, stultitia petunt, & arcanas nescio quas siderum coitiones ariolantes, clarissimorum virorum præstantiam non labore atque industria, sed stellarum benignitate derivari & quodammodo donari volunt. At merhercule illi non minus quam fortuna ipsa cæci esse videntur, quod non videant, sapientia & consilio fieri, quod ipsi casu contingere putant: hi vero malitiosi atque improbi, quod ad ignaviam suam excusandam de summorum virorum gloria plurimum detrahant, astrorum virtuti & efficacitati tribuentes, quod illi revera sibimet bonarum artium studio multis vigiliis maximisque laboribus compararunt.

Quæ cum ita se habeant, ecquis est, qui non intelligat, quam utile, quam
fru-

fructuosum ; unoque verbo quam necessarium sit eloquentiæ studium iis, qui id temporis in foro aliqua cum laude versari volunt? Non ejecta est, non exulavit foro, ut barbari homines obloquuntur, amplissima dicendi facultas. At quandiu Romæ tribunalia patere & tum publica tum privata iudicia fieri contigerit, quandiu causas de criminibus agitari & homines in jus vocari atque defendi, tandiu illa pristino suo jure uti atque in subselliis ut olim regnare videbitur. Desinant ergo, desinant optimarum artium contemptores eloquentiæ gloriam insolenter traducere: comprimant aliquando voces obtrektionis & invidentiæ plenas. Plus satis jam palam est, eloquentiam ad forensam dignitatem hac nostra ætate esse vel maxime necessariam. Etsi, age, pergant dum volent de foro rabulæ honestissimas discipli-

K k

nas

nas maledictis incessere . Clamitent
boni viri inter eloquentiam ipsam &
juris scientiam nullum interesse com-
mercium , nullum vinculum societa-
tis. Suadeant quantum valent, ab ejus-
modi studiis nullum esse expectandum
emolumentum , nullas opes , nullum
decus: omnem ipsis obtrectandi licen-
tiam damus. Neque enim veremur,
ut quisquam tam hebes ingenio , aut
natura tam amens existat , qui ab isto-
rum dicacitate jejunisque argumentis
sefe unquam ab eloquentiæ studio di-
moveri patiatur .



IN OPTIMIS STUDIIS LENTE FESTINANDUM.

ORATIO VII.

*Habita x v. Kal. Novembris, anno
MDCCXVIII.*



CLORIANTUR plerique nostræ ætatis homines, optimarum artium studia hoc tempore ad eam esse deducta facilitatem, ut paucis annis & perexiguo labore cuique facile sit magnam sibi doctrinæ laudem comparare. Quinetiam nonnulli libere affirmant, hominis vitam non brevem admodum esse, ut putavit Hippocrates, ad unam vel alteram disciplinam assequendam; sed diuturnam quoque satis & bene longam ad

K k 2

am-

amplissimum illum scientiarum orbem obtinendum, quem Græci Encyclopædiam dixerunt: tot videlicet esse hodie discendi subsidia prompta atque parata, tam amplam librorum supellectilem, tot publica ubique gymnasia & nobilissima literarum emporia patere, ut nisi quis ingenio sit omnino destitutus, aut summam ad ignaviam projectus, brevi possit præclaros in omni liberalium artium genere progressus facere. Quæ quidem si vera sunt, ab istis quæro, qui tandem fiat, ut in tam obvia atque expedita discendi ratione, tam pauci nihilominus reperiantur, qui non dico universum illum scientiarum circulum ingenio complectantur, sed in una vel altera disciplina inter ceteros præstent, & quasi primos ordines ducant? Ubi memoria nostra Platones, ubi Demosthenes, ubi Cicerones, aut Plinii atque alia

alia ejusmodi clarissima doctrinæ lumina? Nemo profecto non videt, communi experimento refelli inanem istorum hominum credulitatem, aut nimium, ne durius agere videar, blandiendi cupidæ juventuti desiderium. Multo labore multisque vigiliis, si vera fateri velint, opus est ad solidam doctrinæ laudem consequendam. Nec quicquam est mea sententia, quod studiosis adolescentibus officiat magis quam immatura & præceps studiorum ratio. Quandoquidem si ulla alia in re, certe in optimarum artium studio, ut veteri proverbio dicitur, est lente festinandum. Quare adeste vos animo; Adolescentes optimi, quotquot hodie ad intermissa literarum studia instauranda frequentes in hunc amplissimum locum alacri lætoque animo convenisse video. Nam vestram causam & quidem gravissimam hodierno
die

die me potissimum suscepisse profiteor, dum præproperam quorundam in studiis festinationem oppugnare aggredior. Hanc enim vos veluti ingeniorum pestem ac perniciem fugiendam, esse, quemadmodum spero, facile intelligetis.

At vero dum in ipso orationis aditu immaturam & plus æquo festinatam studiorum rationem reprehendere instituo, nemo vestrum sibi persuadeat, eorum mihi probari consilium, qui in levioribus studiis adolescentes diutissime detinent, ut ad unam latinæ linguæ institutionem complures anni, immo integra hominis ætas vix satis esse videatur. Tantum abest, ut istorum sententiam laudem, quin illam, potius nullo modo ferendam esse iudico. Nam ut de ipsius latinæ Grammaticæ rudimentis exemplum sit, quid est per vestram fidem immensa illa regu-

gularum, appendicum, scholiorum, monitorumque farrago, quam ad torquenda puerorum ingenia usque adeo exaggeravit cerebrosa ista grammaticorum natio? Quid tot ambages ac subtiliores observationes, quæ non latinæ linguæ castitatem, sed tricas & apinas bene longas continent, in quibus miseri adolescentes potissimam, ætatis partem traducere coguntur? Amputetur aliquando tot luxuriantibus ramis abundans ipsamet latine loquendi ars; puerisque tradatur angustis ut olim finibus circumscripta. Grammaticæ facultatis institutio: næ ego amens sim, nisi minori cura & per brevi tempore pueri ipsi latinum sermonem integrum ac purum expedite loquantur; quos hodie post tot labores atque ætate grandiori adhuc balbutientes audimus. Quod quidem de longioribus grammaticorum commentatio-

tionibus sic dictum volo, ut de Dialecticis pariter, de Physicis, de Theologicis aliisque gravissimis facultatibus non minus intelligatur. Quandoquidem ingeniorum luxuries tantam in singulas disciplinas propaginem, subtilitatum invexit, ut sapientissimi cujusque judicio nihil jam utilius magisque necessarium esse videatur, quam eas circuncidere & quasi ad vivum refecare. Quamobrem ego nunquam eos bonarum artium professores laudaverim, qui nimia quadam docendi intemperantia ducti singula quæque student subtilius copioseque enucleare, ut nihil præterea supersit dicendum, vel cogitandum; quique non id quærunt, ut ad doctrinam veram & solidam juventuti facem præferant, sed illud potius, ut rerum ubertate & dicendi copia magnam sui moveant audientibus admirationem. Qui si glo-
rio-

riolam istam pluris quam iuventutis ab se recte in studiis instituendæ laudem faciunt, certe sunt reprehendendi.

Verum ut aliquando, unde digressa est, revocetur oratio mea, si quis forte putet, cum unam vel alteram disciplinam a me nominari audiat, leve aliquid, aut parvi negotii provinciam dici, is vehementer errat. Quemadmodum enim maximorum montium altitudo procul intuentibus minus conspicua esse solet, ubi vero ab ea propius absumus, tum apparet quanta demum illa sit, & quam in sublime assurgat: ita fere nemo prospicit quam excelsum atque arduum sit cujusque doctrinæ fastigium, nisi illud cominus contempletur, & quam proxime ad ipsum accedat. Præstat itaque liberalium artium naturam earumque altitudinem atque profundum paulisper inspicere. Nihil autem hoc

L l

lo-

loco de studiis eloquentiæ dicam , ne
 nostra magnificentius extollere , aut
 quæ in me multa defunt , ab aliis ex-
 quirere velle videar . Norunt multi,
 qui me audiunt, quam late pateant hu-
 jus generis studia . Norunt cujusmodi
 laboris sit , oratoris personam pro vi-
 rili parte ac dignitate sustinere . Præ-
 terea in oculis omnium extant quæ
 multa M. Tullius , Fabius Quintilia-
 nus & Dionysius Longinus ad perfe-
 ctam absolutamque dicendi rationem
 esse maxime necessaria doctissimis mo-
 numentis tradiderunt . At vero Phi-
 losophia , quæ primo nobis occurrit ,
 in quantam , Deus immortalis , lati-
 tudinem se se explicat ? in quot partes
 ac membra veluti magnum doctrinæ
 corpus distributam videmus , quæ sin-
 gula multiplicem eruditionem com-
 prehendunt ? Nam ut Dialecticæ ar-
 tem, quæ sane suas habet subtilitates &
 an-

anfractus bene multos, præteream; quanti ingenii ac laboris est, rerum omnium, quas oculis intuemur, quæque in terris vel in aqua gignuntur, si-ve in aere ex elementorum conflictu procreantur, causas penitus abditas retrusasque perquirere? Quot profecto in hac una naturæ contemplatione arcana latent, de quibus & veterum philosophorum placita consulenda & experimenta recentiorum ad examen sæpius sunt revocanda? Equidem nemo hætenus fuit, qui certo definire, aut satis explicare potuerit & magnetici lapidis ad cælestem polum conversiones & originem fontium & admirandam fulminum celeritatem & vim ac sexcenta ejus generis aliâ. Tu vero vix auditis aliquot de materia & forma opinionibus, vix nonnullis de causarum numero atque ordine, quæstiunculis delibatis, te continuo

physicum prædicās & universæ naturæ interpretem sapientissimum ? O stultos Democritos , stultos Platones atque Aristoteles , qui tot annos pertinaci industria assiduisque vigiliis in Philosophiæ studio defudastis . Ecce adolescentes nostri paucis mensibus & quasi per ludum omne id assequuntur , ad quod integram diuturnamque ætatem vos nequaquam sufficere posse putabatis . Certe Themistocles ille philosophus cum centum & septem annos , quibus vixit , in Philosophiæ contemplatione fere omnes consumpsisset , morti proximus dixisse fertur : se dolere , quod tum de vita egrederetur quando in Philosophiæ studiis progressum aliquem erat factururus .

At vero profundiozem , inquit , naturæ notitiam iis ultro relinquimus , quibus per omnem vitam in ejusmodi studiis otari vacat . Nobis autem , qui
ad

ad gravissimas facultates, ad Jurisprudentiam, ad Medicinam, vel ad Theologiam properamus, abunde est primoribus labris isthæc degustasse & extremis, ut dicitur, digitis attigisse. Præclare quidem. At Metaphysicæ studium, quod viri sapientes tanti fecerunt, atque Ethica, quæ disciplina morum vitæque civilis magistra habitata semper fuit, omnino superfluunt? Quid multa? Honestissimas siquidem ejus generis disciplinas quasi otiosas occupationes æstimant, & tanquam figmenta a male feriatis hominibus excogitata negligunt atque prætereunt. Non erat ergo, cur tam multa sapientissimus Socrates de virtutibus ac vitiis disputaret. Non erat, cur Plato atque Aristoteles tam ampla de singulis Philosophiæ partibus scripta posteritati relinquerent, si in illis nihil excellens, nihil egregium, nihil denique

bo-

bonæ frugis inveniretur . Age vero ad medicorum scholas advolent cur-
fores isti studiorum . Græcas , credo ,
literas , quibus ipsa medendi ars prin-
cipium sane debet & incrementum ,
intime norunt . At vereor , ne latinas
quidem fatis intelligant . Cælestium
corporum motus , opinor , & quam in
hæc nostra inferiora vim habent , pro-
be tenent . Quid ad medicum , in-
quiunt , fidera ? Nos morborum ori-
ginem eosque depellendi rationem ,
non stellarum ortus & occasus inquiri-
mus . Atqui Hippocrates & Galenus
medicorum principes hanc ipsam
astrorum scientiam ad morborum cu-
rationes suscipiendas , aut etiam præ-
termittendas , ad crises internoscendas ,
ad exitus bonos vel malos prænun-
ciandos esse maxime necessariam affir-
mant . Et vero paucis explicari non
potest , quam multiplicem rerum noti-
ti-

titiam postulet ars ceterarum omnium periculosissima . Quis enim ignorat quam intimam arctamque habeat mendendi facultas cum Anatomia , cum Botanica , cum Optica , cum Mechanica aliisque bonis artibus societatem? Quæ si forte negligantur , nullum majus reipublicæ malum , aut luctuosius communi saluti periculum accidere potest . Hinc enim fit , ut homines nullis ejusmodi studiis informati ad usum atque exercitationem ejus artis temere irrumpant , quæ cum per se sit maxime periculosa , nisi recte adhibeatur , evadit longe omnium perniciosissima . Et mirabitur quisquam , si id temporis in tanta quidem medicorum turba unum plerique omnes medicum quærant? Verum plura dixi , quam volueram , de isto hominum genere , quo cum dimicationem suscipere est valde periculosum . Illud mihi satis

tis est cuique ob oculos ponere, Medicinam arduam & negotii plenam esse provinciam: nec quemquam fore etsi ingenio præstantem, qui exiguo tempore, aut modico labore assequi possit id, ad quod obtinendum superiori memoria viri ab ingenio prope facti & optimis artibus instructissimi Helmontius, Willisus, Thakenius, Fallopius, Malpighius, Bellinus alique plurimi spatium ætatis omne consumperunt.

At vos jam compellat oratio mea, juvenes navi & industrii, quos ad scientiam juris in hoc Romano gymnasio summo studio summaque frequentia convenire video. Equidem si vos aut veterem jureconsultorum sapientiam & singularem eruditionem mature spectetis, aut in eorum clarissimorum virorum, qui literis vix restitutis, ad jus civile exornandum omnem

omnem industriam suam contulerunt, doctrinam & multijugem totius antiquitatis cognitionem intueamini; facile vobis erit intelligere, quarum rerum quandam veluti præcursionem a vobis postulet absolutissima juris prudentia. Sciunt enim omnes quanto & Græcarum & Latinarum literarum apparatu, quanto eloquentiæ studio muniti ad juris facultatem accesserint in Italia princeps & dux ceterorum Andreas Alciatus, Tiberius Decianus, Jacobus Menochius, Guido Pancirolus; in Hispania Antonius Augustinus, Didacus Covarruvias, Antonius Goveanus, Arius Pinellus: in Gallia Guillielmus Budæus, Jacobus Cujacius, Franciscus & Duarenus & Balduinus, Antonius & Petrus Faber: in Germania Zazius, Sicardus, Viglius aliique plurimi. E quorum unanimi consensu tantaque diversarum gen-

M m

tium

tium conspiratione nemo non videt ,
 unam omnium fuisse sententiam , ad
 jus civile amplectendum non levem
 & perfunctoriam latini sermonis co-
 gnitionem & adumbratam Dialecticæ
 tincturam , ut hodie plerique existi-
 mant, sufficere; sed cum eloquentiæ &
 literarum studio totius anteaetæ noti-
 tiæ memoriam atque ex omni gente,
 collectam eruditionem requiri. Quan-
 doquidem ut a Dionysio Gothofredo
 viro sapientissimo & de civili scientia
 optime merito admonemur , jus civile
 Romanum , quod sanctitate legum &
 disciplina omnium exterarum gen-
 tium legibus & institutis præponde-
 rat , omnia populorum jura & mores
 in se comprehendit . Siquis ergo ex
 hac tanta juvenum frequentia existe-
 ret , qui civilis scientiæ elegantiam
 & ornamenta despiceret , & apud il-
 lum clarissimorum virorum , quos pau-

paulo ante honoris caussa nominavi, auctoritates nihil valerent; imo vero satis sibi esse duceret ex Institutis, vel etiam ex Pandectis delibare nonnulla, quæ ad forensem usum maxime pertinent: hunc ego sane non legum jurisque peritum futurum esse dicerem, sed legulejum & unum de foro rabulam. Novi equidem in hac Urbe hominem inter caussarum patronos minime postremum, qui ab studioso juris adolescente contubernali suo de trita illa juris civilis partitione, qua scilicet Justinianus Cæsar universum jus Romanorum in quatuor libros, Pandectas, Codicem, Institutiones & Novellas constitutiones distribuit, cum esset requisitus, obmutuit; atque ita mente turbatus hæsit, ut si de aliqua Sinarum provincia, aut unde Nilus originem ducat, fuisset interrogatus. Quid si homo eruditus de XII. Tabulis, un-

de omnis publici & privati juris fons
 promanavit, de Prudentum responsis
 & jure non scripto, de Senatusconsultis,
 de Prætorum edictis, de decretis
 aut de epistolis Principum simili ratio-
 ne fuisset consultus? Enimvero istius-
 modi homines, si id quod est, fateri
 volumus, indigni sunt prorsus, qui
 sibi jureconsulti nomen & dignitatem
 usurpent, cum ipsa fundamenta le-
 gum ignorent, & uberrimos juris fon-
 tes & capita ne viderint quidem. Age
 vero hæc omnia si mavis negligantur:
 in ea namque tempora delapsi sumus,
 in quibus eruditionis nomen forensium
 hominum auribus barbarum sonat:
 sed jurisprudentiæ potius vim soli-
 dam & succum ipsum inquiremus.
 Enimvero quam amplum, quam im-
 mane doctrinæ corpus efficiunt, quæ
 unius civilis scientiæ ambitu conti-
 nentur? Ut nihil dicam de amplitudi-
 ne

ne juris Canonici, cujus quidem fines longe lateque proferuntur; nihil de innumeris Conciliorum decretis, nihil de tam multis Romanorum Pontificum constitutionibus: quæ singula immensi laboris assiduitatem & non impar diuturnæ vitæ studium postulare nemo est, qui non videat. Huc accedit tot jam propagatas esse in utramque judicii partem opiniones Doctorum, ut his unis capiendis vix ampla bibliotheca sufficiat. Quorum sententias cum ad examen revocari, & si quæ falso obtruduntur interpretationes, expungi oporteat, facile omnes intelligunt, totos ingenii nervos & laboris vim maximam esse adhibendam. Quæ cum ita sint, prodeat nunc in forum pexo capillo nitidus & barbatulus nescio quis juvenis, qui vix levi quadam legum & judiciorum notitia respersus, audeat tamen sese Urbis profiteri jure-

re-

reconsultum : qui videlicet triduo totam, quantacunque illa est, juris scientiam devoraverit . Ego quidem audaciam ejusmodi propter ætatem excusari posse non dubito . Mirari tamen satis non possum , quenquam tam amentem reperiri, qui novi & inexperti hominis fidei causam committat . Hunc quippe & rebus suis & fortunis & liberis pessime consuluisse quis non videt ? Cladem quippe subeat necesse est , qui cæco & imperito duce cum hoste confligit . Juvenes autem, qui sic imparati ad forum accedunt , id quæso caveant dum iter nimium properant , ne idem , ut in veteri proverbio est , serius absolvant . In ipsos enim optime quadrat scitum illud Divi Augustini adversus Petilianum , iis scilicet , qui plus nimio festinant , nonnunquam usuveneri , ut vestem, aut calceos perverse induant , quæ res postea curren-

rentibus moram & tarditatem affert .

Jam vero de Theologia pauca dicam, ut inde de ceteris disciplinis conjectura amplissime fiat & judicium . Equidem si e tanta Theologorum paucitate, quantam esse videmus, divinæ hujus scientiæ difficultatem & salebras deducere fas est, nemini obscurum esse poterit, quantum amplitudine & dignitate ceteras disciplinas Theologia antecellit, tantum illam & ingenii & laboris præ aliis exquirere . Nam si rationem recte subducere velimus, pro innumeris prope religiosis familiis, quæ hodie in ejusmodi studio unice versantur, paucissimi quidem sunt, qui tam amplæ facultatis non dicam membra omnia & partes, sed partium articulos absolutissime comprehendant . Nisi forte Theologos mihi nominas disputatores nescio quos acres & subtiles, qui nihil de abditioribus

ribus sacrarum literarum oraculis, nihil de Ecclesiasticæ historiæ notitia, nihil de monumentis tum Græcis tum Latinis sanctorum Patrum attigerint; sed Dialecticorum instar rem omnem agunt disputationibus & clamoribus. Hos enim censoria virgula notatos e Theologorum collegio dispungit Melchior Canus vir dignitate & doctrina clarissimus. Audite quæso doctissimi antistitis testimonium. Intellego, inquit, fuisse in schola quosdam Theologos adscriptitios, qui universas quæstiones Theologicas frivolis argumentis absolverint, & vanis invalidisque ratiunculis magnum pondus rebus gravissimis detrahentes, ediderint in Theologiam commentaria vix digna lucubratione anicularum; & cum in his sacrorum Bibliorum testimonia rarissima sint, Conciliorum mentio nulla, nihil ex antiquis Patribus oleat;

nihil

nihil ex gravi Philosophia , sed puerilibus fere disciplinis; Theologi tamen, si superis placet , vocantur . Ex qua gravissima auctoritate cui perspicuum non est quot doctrinæ præfidiis debeat esse instructus , qui præstantissimæ facultati nomen dedit? Dubitari plane non potest, quin præter magnam ingenii vim diuturno quoque labore multisque vigiliis ad tam amplam eruditionem comparandam opus sit , sine qua nemo potest jure dici Theologus . Equidem si paulo maturius cogitemus quæ superiori ætate plena succi & sanguinis monumenta literis elegantissimis tradiderunt & Bellarminus & Sirmondus & Petavius & Alphonsus a Castro & Melchior Canus & Thomasinus & Natalis Alexander alique permulti , qui de rebus Theologicis acute simul & nervose scripserunt , compertissimum nobis erit , ejusmodi

N n

stu-

studia complurium annorum industriam, imo vero diuturnæ ætatis maturitatem redolere.

Verum quid diutius gravissimis disciplinis immoramur, cum hæc nostra mitiora literarum studia, quæ Humanitatem appellant, tantum sibi cum ingenii tum temporis postulare videamus? Nam præter universam illam ceterarum fere omnium artium, quam necessario exigunt, notitiam, præter historiarum, quam Græci & Latini scriptores memoriæ tradiderunt, cognitionem & amplissimam illam ubertatem rerum, quæ eruditio dicitur; quanti mehercule laboris est dictionem sibi puram & elegantem conflare, varias dicendi notas internoscere ac multiplices sermonis formas exprimere? Quam paucorum semper fuit orationem sic verbis & sententiis instruere, ut ad veteris eloquentiæ decus & ma-

majestatem proxime accederet? Quid vero de poetica facultate dicam, cujus dignitas plusne naturæ, an arti, plus ingenio, an industriæ esset tribuenda, merito viri sapientissimi dubitarunt? Atqui Virgilium, cui ingenium benelimum & omnibus fere disciplinis excultum, septem perpetuos annos in Georgicorum libris desudasse accepimus. Neque ipse annorum duodecim, quos in divino Æneidum carmine insumpserat, moram satis esse putavit ad sempiterni ejus operis commendationem, quominus illud ut rem informem impolitamque testamento comburi juberet. Quid quod Jacobus Sanazarius poeta sane elegantissimus tres illos aureos de Partu Virginis libros viginti annorum lima perpolivit? Nam quemadmodum Zeuxis ille celeberrimus in tabulis pingendis morosus & difficilis dicere solebat, se diu pingere,

N n 2

quod

quod æternitati pingeret ; ita plane, quæ immortalitati parantur, diu multumque cogitanda sunt ; neque ante de tabula ponenda est manus , quam singula dilucida sint admodum atque expolita . Quamobrem Horatius in præclara illa & immortalis ad Pisones epistola sæpissime inculcat , multa die multisque lituris esse castigandum , quod propediem in lucem est exiturum : nec quicquam fore elaboratum satis atque perfectum, quod longa mora non concoqueret, nonumque in annum non premeretur . Quæ sic dicta volo, ut omnes intelligant, citra sudorem studiumque plurimum neminem in re literaria fieri summum, nec posse paucis annis, ut stulte sibi plerique arroganti, ad veram doctrinæ laudem pervenire .

At vero dicet aliquis , Picus ille Mirandulanus, cujus gloria in omnium ore

ore & admiratione semper vivet, nonne tam brevi, quo vixit, trium circiter & triginta annorum tempore id est assequutus, ut & orator & philosophus & mathematicus & theologus magni nominis esset, cum tam multa de omni fere doctrina & publice disputaverit & literis tradiderit? Quid quod præterita ætate, ut ne longius abeam, Hugo Grotius, Daniel Heinsius, Blasius Paschalius in ipso adolescentiæ flore complura in lucem ediderint; quæ eruditionem minime vulgarem redolent? Profecto non negaverim, Picum aliosque permultos extitisse, qui singularis ingenii felicitate paucissimis annis eo pervenerint, quo plerique homines longo studio multaque ætate pervenire nequaquam potuerint. At vero præterquam quod quæ paucorum felicitas est ad commune ceterorum exemplum trahi nullo modo potest, quis ignorat, non

non defuisse doctos & emunctæ naris viros, qui in Pico ipso Mirandulano aliquanto amplius desideraverint, & in eo nescio quam præcocis ingenii acerbitem culpaverint? Illud certe negari non potest, multos nævos & maculas illius scriptis esse aspersas, quæ in eloquentia & elegantioribus literis hominem immaturum fuisse ostendunt. De ceteris autem dico, homines quidem multos præceleri fervidoque fuisse ingenio, qui scriptis editis adolescentiam suam illustraverint: nego nihilominus omnem in præmaturis ejusmodi fructibus degustari tum ingenii tum judicii maturitatem. Quod ne cui obtrectandi causa, aut de gloria summorum virorum quicquam detrahendi studio dictum esse videatur, literariæ Reipublicæ annales quæso percurrite. Non pauci sane vobis occurrent viri literatissimi, qui deinde

con-

confirmata jam ætate , ad incudem ea ipsa revocaverint , vel etiam cum pudore damnaverint , quæ pridem juvenilibus annis nimium festinanter effuderant. Hoc enim, ut antiquiores præteream , & Laurentium Gambaram & Petrum Bembum & Franciscum Petrarcam & Torquatum Tassum aliosque magni ingenii homines fecisse legimus. Nec sane mirandum; cum oculis nostris quotidie videamus , succum non habere diuturnum, quæ nimis celeriter maturescunt, neque diu vigere, quæ præpropere & quasi ex tempore gignuntur : contra vero arbores , quæ in multas ætates mansuræ sunt , altioribus humo defigi radicibus , sero crescere ac paulatim robur & firmitatem tenere .

Quæ cum ita se habeant , jam intelligitis , Adolescentes optimi , quorum causa potissimum hæc omnis oratio

tio instituta est, nihil esse solidiori doctrinæ noxium magis aut inimicum, quam nimiam studiorum festinationem. Non cursorum more, sed lente, sed maturo consilio in optimis studiis est properandum. Sat cito, dicere solebat sapientissimus Cato, res fiunt, si fiat bene. Quid autem vobis ad scientiæ exitum celeriter pervenisse proderit, nisi illius membra omnia & partes plene cumulateque teneatis, aut in ea quid primo, quid postremo loco sit, haud satis percipiatis? Agite itaque, rem vestram naviter, & ad quam semel animum appulistis disciplinam, ad eam diligenter constanterque incumbite quousque illam a vobis revera possideri & utilitatis & gloriæ vestræ fundum fieri contingat.

DE

DE EXPEDITA DISCENDI RATIONE.

ORATIO VIII.

Habita xv. Kal. Novembris, anno

MDCCXIX.



U M anno superiore ex hoc ipso loco eam more majorum orationem haberem, in qua quotannis quispiam de dignitate ac præstantia bonarum artium præfari solet; illud, si meministis, contende-
bam, in optimis studiis lente quidem esse festinandum; nec studiosæ juventuti quicquam esse perniciosum, magis, aut inimicum, quam paucissimis annis gravissimarum disciplinarum studiis immorari, quæ multum

O o

&

& temporis & laboris omnino requirunt. Quod argumenti genus his plane temporibus necessarium etsi sapientissimis, qui aderant, viris probatum fuisse certe scio; non defuerunt tamen aliqui, qui inde occasionem obtrectandi arripuerint: quasi vero, proposita hac tanta studiorum difficultate, juvenes ab suscepto eorundem cursu retardari & magnos illos, quos ad Academiam attulerant, animos despondere contingat. Quorum opinio tametsi & ratione & communi experimento refutari facile possit; cum compertissimum sit, quæ obvia & unicuique exposita maxime sunt, homines ea negligere atque contemnere; ad illa vero, quæ ardua & multo difficillima, eos fortiter aggredi & majori studio & voluntate duci; malo tamen mitiori ejusmodi hominum ingenio indulgere, quam erga ipsos durior, aut parum
offi-

officiosus videri. Temperabo itaque hoc anno aulteram illam dicendi rationem, & molliori suscepto argumento, tyrōnes milites, si quī forte, severitatis metū a nobis olim dilapsi sunt & in fugam coniecti, ad musarum castra hodierno die revocare conabor. Quare aditus quosdam breves admodum & expeditos cupidæ literarum, juventuti indicare statui, per quos, si velit, propere possit ad veram doctrinæ laudem pervenire. Hæc autem ne quis forte dici putet adulandi studio, aut ostentandi ingenii causa, quod a natura mea semper abhorruit, nihil de meo proponam: sed presso pede summorum virorum vestigia persequens, quem ipsi tenuerint brevissimum discendi cūrsus, ostendam. Sic enim omnes intelligent, non me meo consilio, sed ipsos veteres sapientiæ magistros, hoc unum expeditissimum mu-

nivisse ad doctrinam iter, quo nullum possit aut magis certum, aut compendiosius excogitari.

Duo sunt omnino, quantum ego intelligo, quæ cum in omni vita, tum præsertim in bonarum artium studio plurimum valere majores nostri semper existimarunt, amor nimirum & diligentia. Quorum alter animum excitat, & subjectis veluti facibus ad agendum inflamat: altera vero facit, ut id, quod eximium & laude dignum, homines magno conatu summoque labore assequantur. His quidem ducibus ad optimas disciplinas iter facile & expeditum majoribus nostris semper patuit. Hanc unam illi brevem & rectissimam ad literarum studia viam, nobis tritam reliquerunt. Amor scilicet, amor doctrinæ fuit, qui Platonēs, qui Aristoteles, qui Archimedes, Hippocrates, Papinianos aliaque clarif-

rissima scientiarum lumina olim peperit, & ad gloriam extulit sempiternam. Putant nonnulli, & falso quidem, ætatis nostræ ingenia tardiora, esse atque hebetiora, quam antiquorum fuerint. Putant effoetam jam esse naturam, & magnorum ingeniorum semina penitus interiisse. Cum enim videant nostris hisce temporibus tantam adolescentium frequentiam in literario pulvere desudare; nihilominus paucos admodum singularis doctrinæ palmam referre: nullumque memoria nostra existere, qui scientiæ gloria cum antiquis decertare audeat: nullum, qui in poetica facultate cum Homero, aut Virgilio, nullum, qui in eloquentiæ castris cum Demosthene aut M. Tullio sit conferendus; in eam facile suspicionem veniunt, iccirco veteres tantopere excelluisse tantoque nos ab illis doctrinæ intervallo distare,
quod

quod aureo seculo nati sint primo naturæ partu, cum vis feminis esset accerrima & terræ benignitas tanta, ut centesimis semper & cum anatocismo responderet. Nos autem deteriori ætate, cum jam solum lassum & emaciatum est, exortos non æqualem mentis aciem, neque eandem ingenii vim, aut perspicaciam habere. Quæ si vera essent, liceret utique nobis de natura gravissime conqueri, quod erga nos non parentem egisset, sed novercam; quodque illorum mentibus ingenii florem instillasset & succum, nobis autem quisquillas & porriginem reservasset. At vero cum ex multis, quæ hoc nostro tempore longe subtilius inventa sunt, aut quæ ingeniosius quam antiquis temporibus pertractantur, facile sit intelligere, non tardiora nunc esse, quam olim fuerunt ingenia; cum insuper & plura & uberiora nobis
quam

quam illis præsto sint ad discendum, subsidia, quid aliud tandem in causa esse dicemus, nisi quod nos non eodem amore, neque eodem, quo veteres, studio honestissimas disciplinas prosequamur? Et quidem incredibile ac prope immensum erat illorum in perscrutanda veritate desiderium; atque adeo inexplebili sciendi cupiditate, conflagrabant, ut nihil tam arduum, nihil tam alte positum, ad quod eorum diligentia & industria non pervaderet. Non inauditum aliquid, aut in hoc genere novum dico. Plena sunt historiarum monumenta, plena vetustatis exempla, plenæ omnium gentium literæ. Quis enim ignorat, Aristotelem hoc ipso discendi studio inflammatum annos viginti perpetuos divinum Platonem sic audivisse, ut ne unam quidem interim ejus lectionem prætermisisse dicatur? Quis ignorat, Platonem

nem ipsum, Pythagoram, Democritum, Anaxagoram aliosque bene multos summo vitæ incommodo maxime diversas ac remotas regiones peragrassæ, ut ampliorem sibi doctrinæ censum compararent? Quid quod Euclides ille Megarensis auditor Socratis tantæ sciendi cupiditate incenderetur, ut ejus rei causa capitis etiam periculum adire sæpissime non dubitaret? Nota res est & apud omnes gentes satis superque pervulgata; digna tamen, quæ sæpius repetatur & ad omnem posteritatis memoriam summis laudibus efferratur. Caverant Athenienses edicto, ut si Megarensium quispiam pedem Athenas inferret, ei capitale fieret. Euclides autem, qui Megaris natus, quique antea & esse frequenter Athenis & Socratem audire consueverat, tantum hinc accepit dolorem tantamque animi ægritudinem, ut mori satius

tius quam ab ipso Socrate diutius abesse duceret. Quid ergo consilii ceperit, quæso animadvertite. Sub noctem homo sagax & acutus muliebri stola & pallio ornatur, ac foeminarum more capillis reticulo collectis, Athenas per summum vitæ discrimen ad Socratem adit; quodque mirandum magis est, rursus sub lucem millia passuum prope viginti eadem illa veste, tectus domum commigrabat. Quis summam hominis constantiam non admiratur? Quis discendi ardorem incredibilem non videt? Quantum autem fuisse putabimus sciendi desiderium, quod hominem domi suæ nobilem a quiete nocturna, a Diis penatibus tectisque patriis, ab omnibus vitæ commodis distraheret, & tam apertum capitis periculum subire sæpius impelleret? Si revera idem nobis esset erga literas amor, si eadem discendi cupi-

P p

di-

ditas , dubitandum non est , quin magni nunc quoque in omni disciplina-
rum genere progressus fierent . Non
esset profecto , cur ætas nostra heroicis
illis temporibus tantopere invideret ,
in quibus præstantissima ac prope di-
vina ingenia floruisse miramur . Non
deessent in unaquaque ætate Platonēs
& Archimedes , non deessent Demo-
sthenes & Tullii , si eorum studium ac
diligentia minime deessent . Et quidem
altero abhinc seculo tot in omni facul-
tate extiterunt viri clarissimi , qui ut
veteres illos sapientiæ antislites inge-
nio superare haud potuerint , ad eorum
tamen gloriam quam proxime quidem
accessisse videntur . Necesse non est
hic vobis ad memoriam revocare Sca-
ligeros , Sigonios , Lipsios , Grotios ,
Galilæos , Cujacios aliosque complu-
res , qui magna cum ingenii laude &
singularis doctrinæ fama floruerunt .

Quot

Quot præterea fuere præclara eruditione adolescentes, qui in ipso ætatis flore quasi canescere & doctrinæ maturitatem quandam ac senectutem habere visi sunt? Nolo in illis nominatim recensendis immorari, cum præsertim in oculis omnium sint evulgata ab Adriano Bailletto viro clarissimo monumenta, quæ ex omni fere literarum memoria collegit de unis adolescentibus, qui studiis scriptisve editis inclaruerunt. Quid autem illis tantum animi tantumque virium dedit, ut imbecilla ætate gravissimas disciplinas profiterentur, & puerilem prætextam cum philosophorum pallio commutarent? Doctrinæ profecto amor fuit, qui eosdem impulit, incitavit, & quemadmodum poeta ait, alas addidit, ut festinato cursu & incredibili velocitate ad amplissimæ gloriæ fastigium properarent. Equidem nihil est, ut

M. Tullius affirmat, quod studio & amore effici non possit, nihil tam arduum, tam eminens, quo amor eniti non valeat.

Quanta vero fuerit ejusmodi vis amoris, quantaque cupiditate homines sapientissimi ad optimarum artium possessionem aspiraverint, nullo sane luculentiori argumento dignosci posse crediderim, quam ut videamus diligentiam prope incredibilem, qua eosdem doctrinæ assequendæ causâ, usos fuisse ex annalium testimonio accepimus. Cum enim probe perciperent, inane esse ac perridiculum illud sciendi desiderium, quod cum summa industria ac diligentia minime conjungeretur; nulla erat difficultas, nulla vis, nullum incommodum, quo ipsi ab instituto studiorum cursu retardarentur; & quominus perpetuos dies noctesque scriberent, aut sese immensis

sis lectionibus occuparent . Quamobrem Cicero ad Atticum scribens de se ipso testatus est , incredibile esse , omnino quantum scripserit die , quin etiam noctibus . Nihil enim , inquit , est somni . De Aristotele autem Laertius memoriæ prodidit , ejus libros ad quadringentorum pene numerum pervenisse , de quibus nemini sit ambigendum , præter complura alia volumina , quæ ipsimet tribui soleant . Quid vero de Galeno medicorum principe dicam , quem libros de re medica quadringentos , de aliis autem disciplinis ducentos quadraginta conscripsisse , auctor est Joannes Fernelius ? Quid de Ser. Sulpicio viro summo atque doctissimo , quem juris civilis scientiam centum & octoginta voluminibus illustrasse accepimus ? Quid demum de Aristarco Grammatico , qui de multiplici reconditaque eruditione com-
 men-

mentarios supra mille literis consignavit? Ut nihil de Theophrasto, nihil de Didymo Alexandrino loquar, quorum ille trecenta volumina, hic vero quatuor millia posteritatis memorie mandasse dicitur. Quæ quidem utcunque vera sint, certe sanctissimus Ecclesiæ Doctor Hieronymus se librorum Origenis sex millia non vidisse modo, verum etiam perlegisse affirmat. Quocirca in altero scribendi labor, in altero autem legendi studium admirationis habet plurimum. Quamobrem omnes jam, puto, satis intelligunt, quo majores nostri cursu ad solidam doctrinæ laudem venerint: quo animi ardore, vigilantia, assiduitate, utque omnia uno verbo complectar, qua diligentia in optimis studiis se gesserint; omne sibi tempus periisse rati, in quo aliquid non didicissent: adeo ut fama sit, Catonem Uticensem virum

ce-

celeberrimum in ipsa quoque Romana curia, dum Senatus cogeretur, Græcos libros lectitare conlueuisse. At nostra ætate juvenes, qui non labori, sed otio, non vigiliis, sed somno, non libris, sed ludis libentissime vacant, literas tamen se amare & in deliciis habere profitentur. Imo, quæ incredibilis amentia est, cum laborem & industriam fugiant ut nihil supra, ita tamen sibi de suo ingenio blandiuntur, ut viros perquam doctos & literatos se posse fieri sibimet stultissime persuadeant. Enimvero nobis etiam si suadeant, ut ait Comicus, non persuadebunt. Nam quæ major excogitari potest temeritas, quam oscitanter & quasi per otium id velle assequi, ad quod obtinendum majores nostros tot labores suscepisse videmus? At dicet aliquis: non pauci juvenes præceleri præditi sunt ingenio, & memoriæ vimul-

multa pollent. Quasi vero majores homines natura tardi atque ingenio hebetes fuerint. Quem autem unquam post homines natos invenias, qui cum Pythagora, cum Platone, cum Aristotele, cum M. Tullio ceterisque ejus disciplinæ viris sit ingenii præstantia & amplitudine conferendus? Quam ergo illi sibi sapientiæ laudem diu multumque laborando compararunt, hanc tu homo ingeniosior minimo negotio, vel etiam, si Diis placet, paucissimis diebus referes? O ridicula capita! O stultitiam singularem! At longius jam, quam par erat, progressi sumus. Ut finem dicendi faciam, ad vos quotquot adestis, ingenui Adolescentes, se convertit oratio mea: vos magnopere hortatur atque obsecrat. Si majorum gloriam æmulamini, si dignitatem literatorum hominum, quod sane præclara vestra indole dignissimum est,

præo-

præoptatis ; eorum pariter in discendo ardorem , eorum labores & studium , eorum diligentiam atque industriam , imitari velis remisque contendite . Breve profecto vobis atque expeditum patebit ad doctrinam iter, si eorundem vestigiis insistere vos minime pigeat . Magnum quidem & arduum negotium suscepistis : non inficior . Sed illud primo cogitate : nihil esse amanti difficile, nihil arduum, nihil impervium. Volat, ut ajunt, amor, si quo aliter pervenire non possit . Deinde tantam esse sciendi voluptatem , ut omnis studiorum labor suavissimus fiat ; atque etiam sæpe , licet sit revera durus & diuturnus, minime tamen sentiatur.



Qq

San-

Sanctissimo Domino Nostro
INNOCENTIO XIII.
PONT. OPT. MAX.

Paulinus a S. Josepho Scholarum Piarum.



RATIONEM hanc, quæ de
 argumenti magnitudine,
 dignitatem sibi aliquam
 comparavit & ornamen-
 tum, supplex & qua ma-
 xime decet veneratione tibi offero, In-
 nocenti Pontifex Maxime. Quod plane
 volens lubensque facio, cum ea, quæ in
 Leone X. suspeximus & admirati sumus,
 in

in te quoque & virtutum similitudine & suprema, quam sustines dignitatis maiestate, mirifice conspirare videamus. Etenim quis non intelligit, constituta esse auspiciatissimi tui initia principatus ea ipsa duo, quæ Leonis nomen immortalitati maxime commendarunt, amorem scilicet & maiestatem? Humanitas quippe illa singularis & amor eximius, qui in te unaque clarissima familia non tam innutritus esse videtur, quam innatus penitus atque insitus, nihil de Pontificia Maiestate tua, detrahit, imo vero ornat gloriosius. Proinde in Apostolica dignitatis auctoritatem & decus dum omni cogitatione curaque incumbis, urget interea animum tuum populorum amor & Patriæ charitas: cujus inopie sublevanda & publica vectigalia imminuta & alia plura commode opportuneque provisâ vidimus. Ex quibus sane faustissimis regni auspiciis cur eam nobis reducem felicissimam ætatem non omine-

Qq 2

mur,

*mur, quam plane beatam atque auream
 suis temporibus Leo X. condidisse dici-
 tur? Quod enim ille in omni vita sua, ut
 Paulus Jovius scribit, id præcipue spe-
 ctaverit, ut benefaciendo & promerendo
 ab omnibus hominum ordinibus amaretur,
 nemo est, qui te in ejusmodi beneficentiae
 studio Leonis simillimum esse non videat:
 cum erga omnes, qui de rebus tuis vel mi-
 nimum meriti sunt, gratissimum animum
 beneficentissimumque probaveris. In hoc
 tamen uno te Leonis omnino dissimilem
 fore optamus, ut videlicet quam ille feli-
 citatem e vivis immature præreptus bre-
 vem admodum & caducam fecit, eam
 Sanctitas tua ad populi Romani votum &
 ad commune Ecclesiae bonum diu incolumis
 nisi immortalem, at diutissime duraturam
 exhibeat.*

DE LAUDIBUS LEONIS X.

In anniverfariis ejus parentalibus.

ORATIO IX.

Habita III. Idus Februarii, anno

M D C C X X I I.



U^m de Leone X. Pont.
Max. præclarisque ejus
laudibus in hac tanta
literatorum hominum
frequentia verba de mo-
re facere meditarer, & dubius animo
hærerem, quid eligi potissimum ad
dicendum posset, quod & immortalis
Viro dignum & a majestate hujus loci
non alienum esse videretur; novæ quæ-
dam admirabilesque virtutum species
cogitanti mihi occurrebant. Obver-
sabatur quippe ante oculos regia illa
at-

atque excelsa animi magnitudo, qua
Leo X. in omni vitæ statu tanto se ce-
 teris mortalibus superiorem exhibuit,
 quanto & nobilitate generis & digni-
 tate fortunæ ceteros anteibat. Occur-
 rebat quoque beneficentia illius & li-
 beralitas pene incredibilis; qua factum
 est, ut ea tempestate auream ætatem
 postliminio ab ipso revocatam homi-
 nes sibi gratularentur. Rapiebat ani-
 mum summa ejus & quasi divina in
 adversis fortiter ferendis constantia;
 prudentia & sagacitas in agendis sin-
 gularis, sapientia denique ab ineunte
 ætate tam eximia atque admiranda, ut
 in ipsa adolescentia ea virtutis & di-
 gnitatis præmia præoccupaverit, quæ
 alii vix extrema consequuntur sene-
 ctute. Ex quibus sane tot tantisque
 virtutibus etsi nullam esse intellige-
 bam, quæ argumenti magnitudinem
 quandam & novitatem non præsefer-
 ret;

ret; nihil tamen mihi tam novum inu-
 sitatumque visum fuit in omni Leo-
 nis X. vita, quam videre majestatem
 in eo una cum amore fuisse conjun-
 ctam. Hoc mihi profecto perquam
 rarum apparuit maximeque admiran-
 dum. Quandoquidem veterum poeta-
 rum judicio, tum etiam communi ho-
 minum sermone percrebuit: non bene
 convenire, neque in una sede morari
 posse amorem & majestatem. Sed ex
 hac ipsa rei novitate, unde brevissimæ
 orationis meæ argumentum erit, vos
 PP. amplissimi facile intelligetis, quid
 de virtute ac sapientia Leonis X. judi-
 candum, cum ea, quæ quasi opposita
 difficillime junguntur, in se uno
 ipse feliciter perpetuoque copulave-
 rit, amorem scilicet & majestatem.

Nescio quo fato fieri dicam, ut
 plerique mortalium, quos avitæ no-
 bilitatis splendor, aut honoris digni-
 tas

tas & amplitudo supra ceteros extulit, adeo statim supercilium attollant ceterosque fastidiant, ut ipsi non ex hominum numero, sed quasi e Deorum concilio delapsi esse videantur. Putant nimirum cum imperii majestate eas locum obtinere non posse virtutes, quæ quasi communes & populares habentur, humanitas scilicet, benignitas, sermonis facilitas atque mansuetudo. Putant de dignitate sibi detrahi plurimum, nisi superbia & fastu a ceteris internoscantur. Ex qua profecto falsa hominum opinione natum fuisse arbitror pervulgatum illud proverbium, honores nempe in mores mutationem inducere. Longe tamen aliter Leo X. in omni vitæ suæ fortuna statuit. In tanta enim domesticæ gloriæ amplitudine, in tot summis maximisque honoribus constitutus nunquam se hominem esse oblitus, & nihil humani a se alie-

alienum esse putavit. Proinde quem-
 admodum natura in ejus ore atque
 oculis gravitatem quandam cum in-
 credibili benignitate conjunxerat; ita
 virtus & præclara majorum exempla
 illius animum ad humanitatem sic in-
 formarunt, ut auctoritas cum gratia,
 amor cum majestate veluti inito foedere
 confociarentur. Nam præterquam
 quod in ea fuerat amplissima domo edu-
 catus, unde superbia & audacia, ut
 Paulus Jovius scribit, penitus exclu-
 sis, veræ munificentiae, jucunditatis,
 elegantiae virtutumque omnium cun-
 ctis officina patebat; duo præterea sibi
 præ oculis erant domesticæ gloriæ lu-
 mina, magnus videlicet Cosmus &
 Laurentius pater, quorum alter ob
 præclara erga rempublicam merita,
 Pater patriæ publici amoris decreto
 appellatus fuerat, alter ob singularem
 benevolentiam & charitatem non,

modo suorum civium, verum etiam totius Italiae deliciae atque amor aestimabatur. His ergo praelucentibus sibi majorum exemplis, non obscure intellexit Joannes Medices, principibus viris nihil esse gloriosius, quam dignitatis majestatem humanitate ac benevolentia temperare. Cum itaque in ipso ætatis flore ab Innocentio VIII. Cardinalis, deinde etiam paulo post Legatus totius Etruriæ renunciatus fuisset, in ea amplitudine dignitatis ita se gessit, ut incertum fecerit, plusne admirationis haberet adolescentem videre tanta prudentiæ laude ornatum tantaque morum gravitate compositum, an vero cum ea, quam sustinebat, Ecclesiasticæ personæ auctoritate tantam ingenii suavitatem humanitatemque conjunctam. Permirum sane videbatur, homini adolescenti ad maximas imperii difficultates expediendas,

das , & ad confilia cum de rebus privatis tum publicis capienda , parem inesse animi maturitatem atque prudentiam . Sed admirationem hujusmodi superabat , quod non tam Legati auctoritatem , quam optimi civis amorem erga omnes studiumque patefaceret . Quo plane miraculo factum est , ut per Etruriam universam ejus sapientiæ fama nomenque celebraretur ; & non modo singulæ illius provinciæ civitates honores ei publice statuerent , sed ii quoque omnes , qui ex tanta Mediceorum gloria invidia dudum disrumpebantur , eximiam ejus virtutem admirari cœperint atque amare . Usque adeo singularem sibi conciliat gratiam virtus cum dignitate conjuncta .

At fortasse mirandum non est , quod cives invidos & inimicos humanitate ac benevolentia deliniret , cum

efferatos quoque militum animos in
 fui amorem pertraxerit ac veneratio-
 nem. Ardebat jam multos annos Æmi-
 lia prope universa bello teterrimo ac
 periculoso. Vastati ubique agri, suc-
 censæ domus, direptæ bonorum for-
 tunæ; atque Urbes civilibus odiis
 magis quam bello confluentes par-
 tim a Romani Pontificis imperio de-
 fecerant, partim in exterarum gen-
 tium potestatem aut ultro se dede-
 rant, aut vi armisque redactæ fuerant:
 omnia postremo armorum terror ac
 belli furor invaserat. Ut igitur tot
 tantisque malis, quibus jampridem
 divina atque humana omnia permi-
 scebantur, Julius II. Romanus Ponti-
 fex tempestive occurreret, ad arma
 veniendum esse putavit, agendumque
 vi & gladio, ubi religione contempta,
 neque paternæ reverentiæ dignitas,
 neque Romanæ Sedis auctoritas va-
 luif-

luissent . Comparato itaque instructif-
 simo longe omnium exercitu , Joan-
 nem Medicen Cardinalem ad eam
 provinciam Legatum Apostolicum
 renunciavit . Qua quidem ardua ac pe-
 riculorum plena legatione suscepta
 Joannes ita non modo fidem suam ,
 operam diligentiamque eidem Julio
 acris sane ingenii ac judicii viro pro-
 bavit , sed tantam etiam apud omnes
 existimationem obtinuit , ut milites
 ipsi Joannem Medicen non legatum
 ex hac urbe missum , sed hominem
 quasi de cælo delapsum intuerentur .
 Quoties enim prodiret in publicum ,
 quoties in conspectu exercitus staret ,
 tantus fieri solebat centurionum ac mi-
 litum concursus sacram purpuram ma-
 nu tangere atque osculari cupientium ,
 ut nimia pietate signa deferri , & quasi
 dissolvi militares ordines viderentur .
 Unde autem tam præclara atque insi-
 gnis

gnis hominum opinio? Unde tam illustria religiosæ venerationis officia? Opinentur sane alii, tantam fuisse in ea legatione Joannis sapientiam, tantum consilium, pietatem ac religionem, ut non immerito omnium erga se studium excitaverit atque amorem. Ego profecto non repugnabo; cum proditum sit memoriæ, pecuniam sæpe ad licentiam militum coercendam eorumque explendam cupiditatem, illum summa liberalitate impertivisse; imo etiam aliquando sese vulneribus objectare non dubitasse, ut matronarum dignitati, aut virginum pudori consuleret. Verum sic existimo, etsi nihil ceteris virtutibus detrahendum esse videtur, negari tamen non posse, quin beneficentia atque amore omnium sibi studia ac venerationem promeruerit. Auctoritas enim cum gratia, ut Stoicus inquit, homines
non

non solum amabiles, sed venerabiles efficit. Quamobrem etsi imperatoria dignitas milites continet; ita tamen continet, ut imperatorem aut metuant, aut oderint. Imperii autem majestas cum beneficentia ad obsequium pariter atque amorem impellit.

Quid vero diutius obsequia militum demiramur, cum & hostis, qui natura tum etiam victoria insolens ac superbus erat, Joannem Medicen imperio exercituque spoliatum summa religione colat ac mirandum in modum veneretur? Nam ingenti a nostris calamitate ad Ravennam accepta cæsoque ex majori parte exercitu, cum Legatus ipse, qui in hostium potestatem venerat, Mediolanum captivus & quasi per triumphum ductus fuisset, nequaquam tamen animo concidit, nec dignitatis, qua præditus erat, majestatem abjecit. At sereno placidoque vul-

vultu milites alloquutus , tam graviter sapienterque Romani Pontificis caussam egit , ut Pisani Concilii improbitate damnata , totus ille in Julii Pontificis odium concitatus exercitus errorem agnosceret suum , ac supplex veniam deprecaretur . O singularem hominis virtutem ! O sapientiam admirabilem atque omni laude , prædicatione , literis monumentisque decorandam ! Desinant veterum annalium historiæ summis laudibus ad cælum extollere Scipiones Africanos , Julios Cæsares , Cn: Pompejos aliosque clarissimos Imperatores , quod clementia & inusitata quadam imperii dignitate , non suis tantum , sed hostibus etiam divini quodammodo ac venerabiles essent . Illi siquidem victores gentium , expugnatis urbibus ac provinciis igne ferroque subactis , vi & armis suam & Pop. Rom. majestatem vindicabant .

Quod

Quod vero Joannes non imperio munitus, non exercitu instructus, non victor, sed victus, sed captivus Apostolicæ dignitatis auctoritatem propugnaverit, quod armatæ multitudinis animos non armorum terrore ac minis, sed benignitate atque humanitate devicerit & ad Romani Pontificis voluntatem deduxerit, quis pari eloquentia explicare poterit? quis unquam satis pro dignitate laudare?

At majora nobis occurrent amoris & majestatis argumenta, si Joannem ipsum ad Vaticani fastigium jam eventum & magnanimo Leonis nomine decoratum contemplemur. Quid enim magnificentissimus ille apparatus atque ea solennis pompa, qua Pontifex salutatus ad Basilicam Lateranensem primo perrexit; tanto videlicet Purpuratorum Patrum splendore, tot clarissimorum Principum comitatu ac

S s

tam

tam incredibili hominum concursu ,
ut a Gothicis temporibus Romæ nec
illustrius , nec magnificentius specta-
culum visum fuisse Paulus Jovius te-
stetur ? Hoc autem totum etsi ad illius
majestatem referri debet , amoris ta-
men singularis argumentum certe fuit
sparsa a Quæstoribus per omnes Urbis
regiones aurea & argentea pecunia ,
tam liberaliter effuseque , ut centum
millibus aureis eam liberalitatem ,
Pontifici stetit Quæstores ipsi fate-
rentur . Quid præterea veteres patef-
næ domus inimici omnes statim in-
gratiam perhumaniter recepti , quo-
rum alii e longinquis regionibus , ubi
misere degebant , benigne evocati sunt
& re familiari atque honoribus aucti ;
alii e vinculis , quibus detinebantur ,
soluti ac libertati patriæque cumula-
tissime restituti ? Intelligebat enim
Pontifex sapientissimus , nihil esse tam

re-

regium, ut M. Tullius inquit, tam liberale tamque munificum, quam opem ferre supplicibus, excitare afflictos, dare salutem, liberare periculis homines. Intelligebat, nihil esse laudabilius, nihil magno & præclaro viro dignius placabilitate & clementia.

Dum autem mente mecum ipse, reputo, quæ Leo X. in absolvendo Lateranensi Concilio, quod jampridem Julius Pontifex inchoaverat, opportune sapientissimeque constituit; dubius plane hæreo, majoremne in eo sibi partem vindicaverit amor, an verò majestas: imo ut verum fatear, magnum & acre video dissidium inter amorem & majestatem, utri videlicet gloriæ tribuendus sit principatus. Nam etsi frænata sanctissimis legibus nefariorum hominum audacia, spoliati jure imperii principes perduelles, sancita plurima cum potentissimis regibus

foedera, instructæ ingentes classes, repressi conatus atque arma Selymi crudelissimi Turcarum Imperatoris & sexcenta alia graviter providentissimæque constituta incredibilem Leoni X. conciliaverint majestatem: cum tamen nemini dubium sit, quin ille hæc omnia cogitaverit atque perfecit ob summum Christianæ religionis propugnandæ amplificandæque studium, quo nimirum vehementissime incensus nuncios & epistolas misit tum ad Abissinorum regem, tum ad magnum Moschorum ducem, tum etiam ad alias plurimas remotissimas Asiæ gentes, ut deterfa, si fieri posset, errorum labe, in Ecclesiæ Romanæ sinum reciperet universas; quis facile dijudicare possit amorine, an majestati magis sit tribuendum? Quod autem ad tollendas e Christiana republica turbas, iis omnibus veniam indulgeat, qui

qui turbulentissimis factionibus Julium II. diu ostinateque vexaverant; quodque Carvajalem & Sanseverinum perduellionis reos ab ipso Julio Pontifice Purpuræ dignitate & sacerdotiis omnibus expoliatos summa clementia paternoque amore complectatur & ad omnem pristinae dignitatis splendorem restituat: in hoc sane dedit præclarum amoris sui testimonium. At enim ex amplissimo senatu nescio quem majestatis reum plane convictum more majorum a Leone X. fuisse multatum testantur historiae. Ita profecto: at vero vindicis majestatis poenas amor quidem excepit. Quandoquidem in ipso capitalis sententiæ die unum atque triginta Cardinales, viros ex omni prope natione virtute, doctrina nobilitateque clarissimos summa & inusitata liberalitate cooptavit. Quo quidem tam amplo atque illustri senatorum

rum delectu non modo populo Romano, sed omnibus fere gentibus singularem suum probavit amorem ac voluntatem beneficentissimam.

Verum populo Romano beneficentia hujusmodi communis quidem cum ceteris gentibus intercesserit. Quis autem dicendo complecti valeat, quibus maximis eundem beneficiis cumulaverit ejusque nomen ad sempiternam posterorum memoriam illustraverit? Mitto publica vectigalia, imminuta, prætereo Triumviralem Conservatorum Urbis potestatem amplificatam, nihil loquor Romanos cives cum præmiis, tum immunitatibus privatim publiceque donatos & alia plurima, in quibus plane amor cum majestate triumphare visus est. Quantum vero splendoris atque amplitudinis hanc Urbem consequutam fuisse putabimus, tot viris ingenio, doctrina
fa-

sapientiaque clarissimis ab eo Romam, magnis propositis præmiis, evocatis; ex quorum domicilio Roma ipsa, ut olim de Athenis fama est; disciplinarum omnium altrix & mater facta esse videbatur? Negari profecto non potest, quin ex florentissimis hisce ingeniis aurea illa literarum ætas, quæ Augusti ævo floruisse dicitur, Leonis beneficentia in hac ipsa Urbe restituta populum Romanum ad veteris gloriæ possessionem, unde a Gothicis usque temporibus turpiter dejectus fuerat, amplissime revocaverit. Quamobrem mirandum non est, quod idem Romanus populus solenni ordinum omnium decreto statuam marmoream optimo liberalissimoque Pontifici in Capitolio dedicaverit, ut gratissimi animi sui studium & immortales gratias publici amoris monumento profiteretur.

Jam vero temporis angustia eo me
du-

ductum video, ut vela colligere necesse sit & quasi in medio orationem ab-rumpere. Unum tamen, de quo & parentalibus hæc sacra & amplissimi hujus loci parietes me quodammodo admonere videntur, præteriri nullo modo potest; hoc ipsum scilicet Romanum Archigymnasium a sapientissimo Pontifice tam splendide, tam magnifice restitutum. Qua quidem in re quantum magnanimi Principis regia beneficentia effulgeat, cui tam rude, aut tam plumbeum ingenium, ut non agnoscat? Restitutis enim optimis disciplinis, nonne uberrimos in hac Urbe reclusit fontes, unde tum populus Romanus tum ceteræ gentes & ornamenta pacis & belli præsidia perpetuo sibi compararent? Quod autem illustrius paterni amoris indicium, quam singulari ejusmodi beneficio non præsentibus tantum prodesse, sed posteris,

non

non uni-civitati, sed terrarum Orbi prope universo? Quanta vero Pontificiæ majestati dignitas, quantus Romanæ Urbi splendor ex hac doctissimorum virorum palæstra accesserit, quis dicendo paucis complecti valeat? Quot enim in omni ætate ex gravissimo isto magistratu, ex his subselliis, homines eximia virtute ac doctrina ornatī ad sacras infulas, tum etiam ad Romanæ purpuræ dignitatem fuerunt evecti? Quamobrem etsi cetera omnia argumenta desint, hoc unum tam regium, tam munificum sapientissimi Pontificis opus longe quidem melius quam mea dicendi imbecillitas ad omnem posteritatis memoriam prædicabit Leonem X. virum beneficentissimum, parentem Orbis amantissimum unoque verbo, Principem amoris plenum & majestatis.

T t

DE

DE INGENIORUM DELECTU

AD STUDIA LITERARUM HABENDO.

ORATIO X.

Habita IV. Idus Novembris, anno

MDCCXXIV.



EMO vestrum ignorat quid valeat, quantamque vim habeat cum in homine, tum in ceteris animantibus disciplinæ ratio atque industria. Nam ut de equorum ingenio, qui in oculis nostris assidue versantur, nihil dicam, qui etsi primo furentes & effrænes nullius imperio regi posse videntur, ita tamen paulatim domitoris industria atque arte flectuntur, ut omni ferocitate posita, admirandam plane docilitatem induant;

duant; quid est, quod psittacos picaeque docuit humanas voces expedite reddere, & quasi hominum more, ut Plinius inquit, fermocinari? Mens autem hominis per se rudis, & quemadmodum Aristoteles ait, quasi nuda pictorum tabula, si studium accesserit & disciplina, nonne ad id sapientiæ pervadit, ut nihil tam arduum sit, quo non pertingat, nihil tam sublime, quod assequi minime valeat? Quo quidem in genere ut cetera, quæ ad literarum studia nequaquam pertinent, recordari omitatis; quid Platonēs & Archimedes ingenii principes ac doctrinæ, quid Homeros & Virgilios clarissima poetarum lumina, quid demum Hippocrates & Galenos medicorum signiferos eo dignitatis & gloriæ provexit, ut de illis sine laude dicere nemo possit, eosque homines quasi divinos & ad nos erudiendos e cælo missos omnis posteritas

veneretur? Industria nempe fuit & diligentia, qua animi & ingenia mortalium mirum in modum excoluntur, & quæ a studio bonarum artium honestissimo sejungi ac dimoveri nullo modo potest. Hinc enim accepimus immensos eorum labores, diuturnas vigilias, permolestas peregrinationes, creberrima itinera & sexcenta alia doctrinæ causa incommoda vitæ suscepta: ut facile, dijudicari non possit, utrum plus industriæ, an ingenio accepta referri debeat eorum tota quanta est sapientiæ ratio & amplitudo. Quanquam autem in labore & industria sita tanta vis est, ut nihil supra; undenam sit, ut in optimis artibus addiscendis haud raro summæ contentioni & complurium annorum industriæ nullus, aut certe exiguus doctrinæ fructus respondeat? Sentiant alii quod volunt. Ego quidem semper in ea sententia fui, nec ad
lite-

literarum studia omnia ingenia apta esse, nec ad singulas disciplinas singula ingenia. Atque hinc fieri non dubito, per plures adolescentes in literarum cursu labore quidem maximo ac diuturno defatigari, at vix mediocrem aliquem pro ejusmodi conatu ac diligentia progressum facere. Quam quidem in re quia multos esse intelligo, qui cum magno liberorum suorum incommodo, tum etiam summo rei literariæ damno misere hallucinantur, me operæ pretium facturum existimaui, si in hoc primo studiorum aditu ea in medium afferrem, quæ & falsam eorum opinionem convellerent, & ingeniorum delectum ad literarum studia maxime necessarium esse demonstrarent.

Quod autem sint semperque fuerint homines sic mente & ingenio destituti, ut ad optimarum artium studia ine-

inepti prorsus existant, nemini obscurum esse arbitror. Quemadmodum, enim natura non omnibus agris fertilitatem est impertita, sed infœcundos sterileque nonnullos deferuit, qui quocunque labore aut industria excolantur, frugem nullam afferunt: ita juvenum ingenia aliquando videas sic effœta atque arida, ut ab iis nullus doctrinæ fructus sit expectandus. Ejusmodi olim fuisse sive cœli atque aeris crassitie, sive alio quovis ejus regionis vitio Boetii atque Thebani dicuntur, quos multum virium, ingenii minimum habuisse legimus. De Thracibus autem Aristoteles tradidit, eos ingenio tam pingui fuisse ac memoria propemodum nulla, ut ne quaternarium quidem numerando transcendere valerent. Ex hoc nimirum genere procreatos crediderim esse non paucos adolescentes, quorum cum ingeniis
qui

qui conflictatur, litus quidem arare, quod ajunt, aut Isthmum fodere suscepit. Hæc tamen calamitas non tam sæpe accideret, si bonarum artium professores aut misericordia erga miseros illiusmodi juvenes commoti, aut conscientiae stimulis acti, Alabadenſis Apollonii rhetoris præclaro satis exemplo ineptos hosce discipulos operam apud se perdere nequaquam paterentur, & ad quam unumquemque artem idoneum judicant, ad eam serio cohortarentur atque dimitterent. Sed valeant jam, valeant quotquot invita Minerva nati musas & Apollinem, averſantur. Vos enim compellat oratio mea, Adoleſcentes optimi, præſtantiori indole ac felici ingenio ornati, quos Iſocrates Deorum immortalium filios appellare solebat, quippe qui intelligendi facilitate ac divino ingenio parentes Deos referre videremini.

mini . Vos, inquam, spectat quicquid de ingeniorum delectu instituendo dicam . Inter vos enim alios in mathematicis disciplinis , alios in physicis , alios in arte medica , alios in jure civili , partim in re poetica , partim in dicendi facultate præstantissimos fore , non dubito ; si unusquisque vestrum in id studendo sedulo incumbat , ad quod natura duce propendet , & ad quod prope factus esse videtur . Quemadmodum enim, ut poeta inquit, non omnis fert omnia tellus ; ita sane non omnes , qui nostra vel majorum ætate claruerunt homines sapientissimi , omnem artem assequutos fuisse videmus , sed singulos in singulis præstitisse .

Verum ut inde orationi aditus pateat , unde potissimum omnis ratio ducenda esse videtur ; primo quidem nobis diligenter est attendenda mira illa ingeniorum varietas , qua homo alter
al-

alteri non minus est, quam vultu atque ore dissimilis. In aliis enim intelligendi acumen & sagacitatem incredibilem admiramur, qua facile omnium oculos ad se convertunt oratione venusta atque expedita, tum etiam salibus & jocis, quos semper in promptu habent, quibus ipsi sæpe maiorem sibi opinionem, quam alii multo studio ac diligentia creant. In aliis vero tarditatem & quasi stuporem quendam mentis videmus: qui sermone parci sunt ac statarii, ut proinde illis oratio non tam fluere, quam stillare videatur. Alii autem intelligendo minus acuti, nihilominus memoria pollent firma & præstantissima: alii contra ingeniosiores, sed omnium maxime obliviosi: alii denique tum memoriæ vi, tum intelligentiæ acumine instructi, utraque facultate mirum in modum excellunt: Nolo hac in re Astrologorum delira-

V v. menta

menta confectari & varietatem ejusmodi ad nescio quas Planetarum coitiones referre: nolo Philosophorum sectas & opiniones excutere. Illud mihi nec absurdum, nec a veritate alienum esse videtur, varias hujusmodi ingeniorum formas & multiplici diversoque, quod unicuique inest, temperamento proficisci: cum satis exploratum sit, non æqualem semper in nobis percipiendi facultatem, quæ a sensibus ortum habet, vigere; sed pro diversa corporis temperie illam modo acrem & robustam, modo fractam & imbecillam existere. Cum itaque tanta sit ingeniorum dissimilitudo, quanta vix corporum esse solet; quis non videt dissimilem inde singulorum virtutem fore, nec eundem unquam ab universis progressum esse sperandum? Platonem legimus ingenia hominum cum metallis comparare fuisse solitum: quo-

quorum alia quidem aurea, alia ferrea, aut plumbea, partim stannea, partim argentea, partim denique e variis conflata metallis esse dicebat. Quod plane in rem nostram quadrare satis apte videtur. Quandoquidem ad divinas & sublimiores scientias, quæ aurea nimirum ingenia exigunt, is frustra incumbit, cui ferreum, vel plumbeum, ut Platonis more dicam, ingenium habere contigit. Frustra subtiliora Geometriæ problemata, frustra reconditos naturæ aditus rimari tentant ii, quibus hebetior mens & tardi ad percipiendum motus. Reptare humi contenti sint, quibus natura volucre negavit ingenium, quo ad alta ferantur, ne Icarî audaciam imitari velle videantur. Quemadmodum autem non eadem est, ut paulo ante dixi, in omnibus intelligendi facultas, sed varia admodum & multiformis; ita quoque

multiplex & diversa est natura scientiarum, quæ non omnes idem ingenii acumen, sed diversos intelligendi gradus virtutesque deprecant. Quædam enim, ut Algebra, ut Methaphysica, ut Theologia aliæque plures ad contemplandum natæ singularem percipiendi celeritatem & igneam vim mentis postulant. Quædam vero tarditatem magis quandam amant cum ingenii maturitate conjunctam, ut Medicina & Juris scientia. Aliæ peramplum volunt, ubi spatientur memoriæ campum, quemadmodum Historia, Geographia & omnia fere linguarum studia. Aliæ denique cum tenaci memoria ingenium vividum & bene subactum, quales sunt dicendi facultas, ars Critica, & quæ de Theologicis dogmatibus agit divina scientia. Quocirca & si per se difficile est rem amplissimam definire & certam unicuique di-

disciplinæ mensuram ingenii tribuere; hoc tamen ex eo difficilius esse video, quod præoccupatam quisque habeat de ea, quam profitetur, scientia opinionem; ad quam ingenium longe, omnium optimum deposci omnino sibi persuadeat, & alter alteri concedere haud quaquam velit. At vero negari non potest id, quod experientia fere, quotidiana exploratum est atque perspectum, duos scilicet homines & ingenio & pari industria præstantes sæpe in una eademque facultate atque eodem magistro non æqualiter proficere: imò aliquando fieri, ut alter incredibiles in eo studii genere progressus faciat, in quo alter sic hæret atque implicatur, ut ab ejusmodi vadis emergere nullo modo possit. Quid ita? Nonne quod alter quanquam intelligendi vi multa præstet; eo tamen ingenii temperamento caret, quod ad
ejus

ejus generis disciplinam est apprime, necessarium? Multos ego novi adolescentes, qui in elegantioribus literis & eloquentiæ studiis nullum egregiæ indolis specimen dederant, magno deinde ingenio in Dialectica, in Geometria, tum etiam in jure Civili instructos apparuisse.

Usurpari solet communi fermone, & quasi proverbii locum obtinuit: poetas quidem nasci eosque non tam arte ac studio, quam natura & divino quodam instinctu valere. Homines enim cum viderent aliquos ad pangendum carmen mira ingenii facilitate, duci, aliis vero per diuturnos labores ac vigilias id minus licere; poetas cælesti quadam vi ac divino spiritu afflari putarunt. Quocirca si quid fingere ac poetice ludere velint, non intercedo. Si vero quæ causâ sit, serio requirant; hoc pro certo habeant, ad poeticam

ticam facultatem ebullientem ingenii
 fervorem & ingentem mentis impe-
 tum postulari, quo homines quodam-
 modo furere & œstro quodam perciti
 esse videntur. Hoc autem qui carent,
 frustra musis & Apollini litare conten-
 dunt. Quamobrem ut Quintilianus
 animadvertit, optimus quisque poeta
 esse debet *ὁ φαντασίωτος*, is scilicet qui
 sibi & res & actus simillimos veri scite
 ac venuste confingere valeat. Quod
 quidem de poetis argumentum nemo
 non videt in ceteras quoque discipli-
 nas satis commode cadere. Atque
 hinc M. Tullius ad informandum eum,
 quem ipse in libris de Oratore insti-
 tuit, optimum dicendi magistrum, id
 maximæ curæ esse debere ac præ cete-
 ris attendendum monet, ut primo in-
 geniorum delectus diligenter accura-
 teque habeatur. Præcipuum est, inquit,
 ut doctor animadvertat ingenium &
 na-

naturam discipulorum . Quintilianus autem , de quo paulo ante , æstimandorum & ipse ingeniorum peritissimus , examen hujusmodi tanti quidem fecit , ut illud jam inde a pueritia omnino fieri jubeat . Tradito sibi puero , ait , docendi peritus ingenium ejus in primis naturamque perspiciat . Intelligebant quippe homines sapientissimi , naturæ non debere vim fieri ; sed ad quod unumquodque natum est , eo esse adhibendum . Siquis enim a teneris , ut Græci dicunt , unguiculis pingendi artem non alio nisi natura duce imitetur ; non est , cur in consectandis latinæ linguæ elegantissimis , aut in Dialecticorum subtilitatibus extricandis ætatem atque operam frustra consumat . Ea ipse fervet phantasiæ vi , ut quotquot sibi ob oculos rerum imagines veniunt , totidem adumbrare coloribus & non in scite exprimere valeat .

Erit

Erit profecto , erit in pingendi facultate dux & imperator : at vero in humanioribus literis , in Philosophiæ castris vix erit inter calones , aut gregarios milites recensendus . Neminem vestrum latet , quod de Andrea Vesalio , viro cum Medicinæ , tum Anatomix peritia clarissimo , memoriæ traditum legimus : qui adhuc puer quotquot mures , talpæ , glires , vel etiam canes atque feles sibi in manus venissent , totidem disseccare & in singulorum membranas , omenta ac intestina penitus introspicere solebat : eo videlicet illum natura ducente , ut ætate maturus Anatomix scientiam jam pene intermortuam in lucem restitueret . Exploranda est itaque , & quidem sedulo , antequam disciplinis instituenta tradatur juvenus ; ut in re tam ardua uniuscujusque quid ferant humeri , ut ajunt , quid ferre recusent , probe

X x in-

internoscatur. Jure quidem merito per-
 mirum Diogeni videbatur, homines,
 qui neque ollam, neque operculum,
 emerent, nisi primo idem pulsu & tin-
 nitu satis exploratum habuissent, at
 vero in homine emendo uno aspectu
 esse contentos. Quid vero de adole-
 scente summæ spei atque egregiæ in-
 dolis, unde familiæ splendor omnis ac
 dignitas, in una vel altera disciplina
 collocando? Nullumne fieri debet ex-
 perimentum, nulla habenda naturæ
 ratio, nulla de ejus ingenio sollicitudo,
 perinde quasi mancipii alicujus em-
 ptio ageretur? Quid ergo miramur,
 juvenes navos & industrios in Aca-
 demia tempus non minus quam æta-
 tem terere; cum non sua, sed paren-
 tum voluntate iis studiis animum ap-
 pulerint, a quibus maxime abhorrent?
 Istis nimirum culpa parentum eorun-
 dem accidit, quod de Periandro quo-
 dam

dam medico Plutarchus memorat. Is enim cum medendi arte satis abunde præstaret, in eam dementiam venit, ut poeta fieri vehementer cuperet, & se se totum pangendis carminibus daret. Sed cum id musis adversis faceret, pro laude cachinnos & ludibria referebat. Quare Archidamus ejus necessarius ad sanandum tam mali poetæ furorem, eundem graviter objurgans, quid, inquit, tibi accidit Periander, quod pro eleganti medico malus poeta vocari appetas? Non dissimili plane ratione plerique homines, qui oratores, aut philosophi, aut geometræ præstantissimi evaderent, quod ad ejusmodi disciplinas ingenium longe omnium aptissimum a natura acceperint; ab aliis, in quibus invita Minerva occupantur studiis, summam referunt pro dignitate ac laude vituperationem. Hoc autem quanto & professorum incommo-

do & optimarum artium damno fiat ,
paucis quidem explicari non potest .

At enim a Quintiliano , cujus doctrinam & auctoritatem prædicas , illud accepimus , neminem reperiri , qui nihil studio sit consequutus . Præterea quot extiterunt hebeti tardoque ingenio viri , qui ad dicendi facultatem , vel ad Philosophiæ studia ineptissimi esse videbantur : qui nihilominus eam naturæ tarditatem sic pertinaci labore , vicerunt , ut oratores elegantissimi , & non barba ac pallio tantum , sed moribus quoque & doctrina philosophi illustres evaserint ; quemadmodum de Heracleide , de Cleante , de Xenocrate aliisque pluribus historiæ loquuntur ? Itane vero ? Si liberorum vestrorum voluntatem erga literarum studia ita cognitam habetis eamque non minus quam in Cleante & Xenocrate perpetuam atque constantem ; non repugno .

Quam-

Quamcunque ipsi fortuna dederit studiorum rationem, eam statim complētantur: utique laudem plurimam ex assiduo huiusmodi labore consequentur. Quod si in illis neque ingenii, neque industriæ par ratio fuerit; non est, cur aliquis sibi stulte blandiatur: nullum omnino fructum decerpent ex eo studiorum genere, in quo invito reluctantique animo detinentur. Quid si nec valetudine satis firma, nec ad diurnas vigilias gravissimosque labores perferendos satis apti? Huc accedit, austeram illam veterum disciplinam, qua ipsi ob incredibilem doctrinæ amorem ab omni prorsus voluptate, a ludis jocisque interdictum sibi esse volebant, ita jam in desuetudinem abiisse, ut quod aurei illius seculi virtus extitit, nunc fere vitium & rusticanæ vitæ genus esse videretur. Ego vero cum plerosque ætatis nostræ adolescen-

scientes intueor , cum eorum comas
molliter fluentes & ipsos sibi uno di-
gito scalpentes caput contemplor; vix
animum inducere possum , ut eosdem
tam gravi labori ferendo pares esse
concipiam. Minuatur igitur, quantum
fieri potest , studiorum labor . Mollis
& delicatulae nostrorum temporum,
juventutis ratio habeatur, ut nimirum
in literis minimo sudore proficiat. Hoc
autem tum commode fiet , cum explo-
ratis ingeniorum viribus, ad eam unus-
quisque liberalem artem aptabitur, ad
quam voluntate & suapte natura du-
citur : Non erunt tunc sane juvenes ad
scholas tanquam ad pistrinum metu
poenisque cogendi. Amabunt ipsi quo-
que literas, & expedito satis cursu do-
ctrinae metam attingent .

Arithmetica pueris, ut Laertius
refert, objiciebat Pythagoras , nihil
opportunius esse ratus ad aciem men-
tis

tis examinandam exacta computandi
 ratione: quod videlicet. ingenii diffi-
 cultas ab ipsa numerandi tarditate non
 ægrè dignoscatur. At Græci omnes,
 homines sapientes & peracuti, inge-
 niorum naturam & amplitudinem non
 alio fane modulo nisi Geometriæ stu-
 dio metiendam esse existimabant: ne-
 que ad Philosophiæ arcana quenquam
 recipiebant, cui non fuisset ingenium
 geometricis rationibus bene excultum
 atque limatum. Utinam ejusmodi con-
 suetudinem a Græcis traditam majores
 nostri tenuissent eamque ad nos fartam
 tectam deduxissent. Profecto aut ego
 fallor, aut incredibile jam nunc habuif-
 set rerum naturalium scientia, tum
 etiam ceteræ disciplinæ incrementum.
 Verum aliæ quoque sunt ab aliis sa-
 pienter excogitatae explorandorum in-
 geniorum rationes, quas ego minime
 reprehendo: quippe quæ si prudenter
 adhi-

adhibeantur, suum robur suamque vim sint habituræ . At ne longius rem prosequendo patientia vestra abuti velle videar , orationis filum abrumpo ; ea-que plura , quæ de ipso ingeniorum, delectu recte instituendo dici possent , sapientiæ judicioque vestro decernenda relinquo .



DE

DE LAUDIBUS LEONIS X.

In anniversariis ejus parentalibus.

ORATIO XI.

Habita 111. *Kal. Martii, anno*

M D C C X X V I.



I quis est, qui forte putet, hæc parentalium solennia, quæ Leoni X. Pont. Max. quotannis in hoc amplissimo loco & hac tanta celebritate fieri consueverunt, ad hanc unam Romanæ Sapientiæ sedem & ad vos tantummodo P. C. gratique animi vestri significationem pertinere, is certe fallitur atque in summa rerum ignorance versatur. Illustris enim ac sempiterna tanti Pontificis recordatio non his so-

Y y lis

lis parietum angustis , non uno hujus loci ambitu continetur ; sed ad totam , quantacunque est , Urbem Romam , ad Italiam universam , ad Germaniam & Galliam , imo ad omne genus hominum latissime pervagatur . Quis enim est hodie tam inaccessus , aut tam remotus in terris locus , quo sapientissimi hujus Principis fama , aut ejus regiae beneficentiae fructus aliquis non pervaserit ? Quæ gens , quæ hominum natio , cui vel minima bonarum artium disciplina accesserit , quam celebratissimum Leonis X. nomen divinaque virtus admiratione non compleverit ? Omnes profecto literæ , omnes Academiae quotquot sunt celeberrimæ Leonem X. ad cælum summis laudibus efferunt ; eumque optimarum artium , felicitati natum & communem literarum parentem omnes una mente atque uno ore conclamant . Quid igitur
ego

ego in hac mea mediocritate ingenii dicendique tenuitate potissimum afferre potero, quod neque a summa laudatissimi viri amplitudine alienum esse, neque a dignitate ornatissimi hujus loci, cujus ipse instaurator fuit beneficentissimus, abhorrere videatur? Satis mihi erit verbis paucissimis indicare, quibus tandem solidis fundamentis hæ tantæ Leonis X. laudes ubique excitatæ fuerint ad omnem posteritatis memoriam stabiles firmæque permanfuræ. Quod quidem me satis commode spero consequuturum, si ceteris quam plurimis & clarissimis ejus virtutibus hodierno die prætermittis, uno mihi argumento sumam amorem illum ingentem ac prorsus incredibilem, quo Leo X. literas literatosque omnes avidissime prosequabatur. Nam hinc facile erit intelligere, hoc uno nomine sapientissimum virum omnium gen-

tium sibi studia promeruisse & omnium ætatum prædicationem . Atque hoc ipso jure Romana hæc nostra Academia quotannis eum publice laudare ac solenni ritu gratias agere consuevit .

Fuerant sane superiori ætate complures Romani Pontifices , homines sapientissimi , qui optimarum artium studia promovere , tum etiam præmiis exornare operæ pretium duxerunt . Ejusmodi laudem assequutos fuisse Innocentium & Eugenium IV. Clementem & Nicolaum V. Pium II. aliosque plures ex annalium memoria accepimus . At vero, qui ardentiori studio , aut propensiori voluntate erga ingenuas disciplinas cum Leone X. comparari possit , neminem fuisse contendendo . Quod enim in summa reipublicæ tranquillitate atque otio, cum opes integræ atque ærarium opulentum literarum studia tutelam ac patrocinium in-

inveniant , non est valde mirandum ,
 neque à veteri consuetudine alienum .
 Tunc equidem Romana respublica
 rhetores ac poetas aliosque libera-
 lium artium professores ad hanc Ur-
 bem invitavit benigneque complexa
 est , cum jam Punico secundo bello
 confecto , & Chartagine illa Romani
 imperii æmula funditus everfa, in otio
 paululum respiravit . Ubi enim tuba-
 rum lituorumque clangor insonat at-
 que omnia late armorum strepitu per-
 turbantur, quis est, qui musarum can-
 tu delectetur , ac de eruditione magis
 quam de capite ac de salute civium so-
 llicitus esse possit? Jacet tunc omne stu-
 dium , ut inquit Tullius , & in pretio
 est horridus miles , non valde bonus
 ac disertus orator . Quæ cum ita se ha-
 beant , quis mirari satis possit , Leo-
 nem X. vix Pontificio diademate co-
 ronatum statim de optimis studiis in
 hac

hac Urbe restituendis potissimum cogitasse & nihil antiquius habuisse, quam hanc Romanam Academiam in summum splendorem atque amplitudinem excitare? Nemo vestrum ignorat, quibus ille temporibus turbulentissimis Vaticanam sedem conscenderit. Longum esset ac permolestum hoc loco singulas & miserrimas ejus temporis calamitates recordari. Prætereo itaque Italiam tunc fere omnem diurni ac periculosi belli incendio confluentem. Non loquor urbes atque oppida hostium cæde, aut civium sanguine redundantia. Taceo vastitatem in agris, in templis solitudinem; ac florentissimas civitates ex assiduis Germanorum, Hispanorum Gallo-
rumque incursionibus diutissime vexatas atque direptas. Satis sit ad memoriam vobis id unum revocare, Pontificium exercitum superiore anno ad

Ravennam cæsum fuisse atque deletum. Licet enim Julius II. Romanus Pontifex nihil impensius quam publicæ totius Italiæ tranquillitati studeret, non tamen illi defuit ad suscipienda plurima ac periculosa bella militaris animi virtus & nimia quædam gloriæ cupiditas. Hinc ærarium inops atque exhaustum : hinc vectigalis pecunia ad stipendia militum aliosque belli usus impensa atque distracta. Quamquam igitur Leo X. tam alieno reipublicæ tempore Romanus Pontifex renunciaretur, illico tamen bonarum artium studiis, quæ ubique foeda situ ac squalore jacebant, erigendis animum manumque præbuit : neque Pontificii ærarii calamitas atque inopia, neque bellorum per Italiam nondum sedati tumultus, neque gravissima alia, quibus initia principatus urgeri maxime solent, negotia retardarunt.

runt. Sed accersitis Romam profundioris literaturæ viris, amplissimum hoc Gymnasium, hoc musarum domicilium, hanc sempiternam bonarum artium sedem instauravit; atque ita instauravit, ut quemadmodum eorum, temporum annales loquuntur, Romanum Gymnasium neque Bononiensi, neque Patavino vel doctorum præstantia, vel auditorum concursu concederet.

Ex quibus sane faustissimis regni auspiciis quis non videt sapientissimi Principis voluntatem erga optimas disciplinas & contestatam jam præclare fatis erga literarum studia ingentis amoris sui significationem? Instabat Lateranense concilium, quod Julius II. jam inchoaverat, mature prosequendum perficiendumque. Urgebant Pontificis animum Carvajalis & Sanseverini cum Romana Ecclesia simul-

simultates inveteratæ atque odium, quod illos tanquam publicos hostes ipsemet Julius purpuræ dignitate ac bonis omnibus expoliaverat. Imminabat Italiæ cervicibus cum ingenti exercitu rex Gallorum Ludovicus XII. Neapolim ac Mediolanum, unde turpissime pulsus fuerat, repetendi desiderio ac furore inflammatus. At Leo quanquam nihil eorum, quæ ad Ecclesiæ dignitatem, vel ad Italiæ salutem pertinere videbantur, negligeret; ut proinde & Lateranense concilium summa animorum consensione plausuque confecerit, & foedus a Julio II. sancitum pro Italiæ libertate providentissime instauraverit, & Sfortianis militibus opem suam implorantibus viginti quinque millia aureorum per Hieronymum Moronum legatum statim persolverit; nihilo tamen unquam remissius egit in optimis studiis pro-

movendis amplissimeque exornandis;
 Nam præter ea clarissima ingenii lu-
 mina, Augustinum Suesarium, Chri-
 stoferum Aretinum, Hieronymum,
 Buttigellam, Parrhasium Cosentinum,
 Basilium Calchondylem aliosque do-
 ctissimos viros, quos ad hujus Acade-
 miæ famam longius proferendam, ma-
 gnis propositis præmiis, ad Urbem
 invitaverat; præter duos illos sum-
 mæ eruditionis ac doctrinæ principes,
 Bembum & Sadoletum, quos ab epi-
 stolis sibi esse voluit, nemo unus fuit
 alicujus ingenii colore tinctus, quem
 ipse quasi publicus, literarum parens
 peramanter non exciperet, & ad me-
 liora de se sperandum non inflamma-
 ret. Audite quæso luculentissimum
 Pauli Jovii testimonium, ad sempiter-
 nam tanti Pontificis laudationem me-
 moriæ posterorum demandatum. Sin-
 gulos, inquit, exquisitis nobilioribus
 arti-

artibus instructos, vel mediocriſ etiam
 nominiſ poetar tanta benignitate ſu-
 ſcipiebat, ut omnes jam excitatiſ ani-
 miſ ad excolenda literarum ſtudia ve-
 hementer accenderentur: cum a tanto
 armorum ſtrepitu, quo neglectiſ lite-
 riſ, Julii Pontificiſ aures magnopere
 gaudebant, tandem virtuti locus pa-
 teſ factuſ eſſe videretur. O laudem ſin-
 gularem! O prædicationem principi-
 buſ viriſ & regibuſ plane inviden-
 dam! Intelligebat equidem vir ſumma
 ſapientia prædituſ, Chriſtianæ rei pu-
 blicæ maxime intereſſe egregioſ & ex-
 quiſito ingenio viroſ ubique locorum
 haberi, qui tam Latinorum quam Græ-
 corum Patrum monumenta probe per-
 ciperent, & venerabilem divinarum,
 literarum auctoritatem qua ſcriptiſ,
 qua voce defenderent. Quamobrem
 etſi regiæ liberalitatiſ ac munificentiaſ
 ſplendore ceteroſ ejuſ ætatiſ principes

unus longe omnes multumquē superabat, utpote qui in ea domo fuerat splendide ac liberaliter educatus, cuius amplissimum patrimonium beneficentia semper fuit & gloria: ubi tamen de optimis studiis augendis consilium erat, non modo ceteros, at seipsum quoque liberalitate vincere videbatur. Nullus enim erat magistratus, nulla dignitas, nullum sacerdotium tam opulentum, quod literarum cultoribus libentissime non indulgeret. Ut proinde quemadmodum de Artaxerxe illo Persarum rege clarissimo, cui ob manum dexteram sinistra longiorem Longimani cognomen fuit, Plutarchus refert, eum gloriari solere, sibi tanquam optimo Principi naturam tribuisse, ut alteram manum haberet ad largiendum amplissimam atque longissimam, alteram vero ad accipiendum breviorē & contractam; ita quo-

quoque Leo X. merito gloriari posset ,
 se ampliorem , quam ceteri principes ,
 animum divinitus accepisse , ut erga
 homines literatos incredibilem suam
 beneficentiam expleret . Quam vero
 diligens , quam sedula , imo quam
 ingeniosa fuerit ejusmodi liberalitas ,
 quis oratione complecti valeat ? Non
 intra Urbis muros , vel intra angustos
 Italiæ fines sese continuit , sed remotis-
 simas quoque Europæ regiones præ-
 tervecta est ad novas & inusitatas ex-
 quirendas rationes , quibus tam literæ
 quam literati omnes promoverentur .
 Nihil artificiose , nihil amplificandi
 studio dicimus , cum singula per se fa-
 tis admiranda esse videantur . Quis
 enim non stupeat , a Leone X. missum
 fuisse ad inclytas nationes Germaniæ ,
 Daniæ , Svetiæ , Norvegiæ & Gothiæ
 Joannem Heytmers de Zonverben A-
 postolicæ Sedis nuncium , ut veteres
 li-

libros, qui temporum injuria periissent, diligenter accurateque perquiret? Eo vero præcipue consilio, ut literato cuique latissimus excolendi ingenii campus pateret. Extat Leonis ipsius epistola ad Albertum Archiepiscopum Moguntinum Principem Electorem & Germaniæ Primatem, in qua de comparandis ejusmodi voluminibus rationem causamque satis luculenter exponit. In hac re, inquit, nec sumptui, nec impensæ alicui parcimus solum ut, sicut usque a nostri Pontificatus initio proposuimus, quod Altissimo tantum sit honor & gloria, viros quovis virtutum genere insignitos, præsertim literatos, quantum cum Deo possumus, foveamus, extollamus ac juvemus. Quid est, Auditores, quod studiosissimus ingeniorum fautor ad laudem illustrius excogitare posset? Haud satis illi fuit in doctis hominibus exornan-

nandis majorum vestigiis insistere. Voluit quoque inusitata quadam ratione de illis longe omnium optime mereri; atque ipsis cum ad ingenii famam extendendam, tum ad opes sibi comparandas munire iter novum & expeditum. Ob quam sane præclaram liberalitatem Petrus Bælius, Romanorum Pontificum censor iniquus & obrectator maledicentissimus, sibi tamen temperare non potuit, quin posterorum memoriæ scriptum relinqueret, neminem esse literatorum ex quocunque genere, aut religione ille sit, qui Leonis X. nomen colere & ad cælum extollere non debeat, quod obsoleta, aut perita veterum scriptorum monumenta studiose conquiri ac typis elegantissimis evulgari curaverit. Et vero neminem vestrum latet, Leonis munificentiae deberi Cornelii Taciti Annalium libros quinque primos deperditos jam &

& omnium opinione desperatos, at revera in obscuro Germaniæ angulo latentes, quos ipse Leo e barbarorum manibus, ut Andreas Alciatus inquit, quingentorum aureorum summa redemit, ac Romæ primo typis edi iussit: unde immortalem sibi laudem peperit, quod historicum præstantissimum quasi ab inferis excitatum nova luce ac vita in hac Urbe donasset.

Ex hac autem tanta Leonis X. erga literas beneficentia factum est, ut per eadem fere tempora non modo in Italia viri principes, Sabaudi, Estenses, Cararienses & Vicecomites de eruditis hominibus complectendis mutuo inter se studio decertarent; verum etiam in Germania Maximilianus Cæsar, in Gallia rex Franciscus I. ad honestissima studia postliminio revocanda ac melioris fortunæ spe erigenda quasi uno eodemque tempore excitarentur.

Ille

Ille enim Viennensem Academiam, nunc quoque florentissimam erexit: hic Parisiensem a Carolo Magno præclarissime fundatam, sed jam vetustate collapsam, regia liberalitate restituit. Uterque vero literas plurimi deinde facere ac literarum studiosos, Leone ipso hortatore & duce, præmiis amplissimis cumulare sibi gloriæ duxit. Ut propterea si verum fateri velimus, incrementa illa scientiarum, quæ consequutis inde usque ad hæc nostra tempora ætatibus in Italia, in Galliis, in Germania aliisque nobilissimis regnis habita sunt maxima & admiranda, uni Leoni X. accepta referri potissimum debeant, qui barbarorum castra perfregit & scientiarum asseclis signum sustulit libertatis & gloriæ. Ipse enim fuit, qui clarissimis regibus documenta illustria dedit, quo tandem loco habenda sint doctrinæ studia, quæ id

A a a

tem-

temporis ubique neglecta erant ac prope deposita . Ipse fuit , qui bibliothecam Vaticanam conquestis per omnem Europam & ab Oriente usque exportatis voluminibus amplificavit , quam etiam publicæ utilitati patere voluit . Ipse Græcorum literis & disciplinis e patria sede miserrime deturbatis in hac Urbe omnium principe domicilium præbuit honestissimum : cum propterea Joannem Lascarem Byzantinum , hominem in primis nobilem & eruditum cum aliis multis Græcorum doctissimis Romam ab omni Græcia summa liberalitate advocasset . Dies me profecto deficeret , si dicendo numerare singula vellem , quæ Leo X. ad rem literariam augendam atque omni dignitate honestandam usque ad extremum spiritum constantissime gessit . At vero quicquid hætenus dixi ut ad unam summam referam , illud meo
ju-

judicio est omnium admiratione dignissimum, quod homo valetudine non satis prospera, frequentissimis suorum calamitatibus, tum etiam sæpe acerbo eorundem funere exulceratus, iniquissimis amicorum conjurationibus in vitæ pericula non semel adductus, ad multa & gravissima bella, tum ad tuendam Italiæ libertatem, tum ad exultantem Selymi Turcarum Imperatoris furorem reprimendum compulsus; acerbissimis præterea curis affectus ex perniciosis opinionibus a Luthero in Apostolicæ Sedis majestatem ac veterem religionem in Germania late diffeminatis, homo denique in ea rerum amplitudine atque imperio collocatus, ut maximis semper occupationibus eum detineri necesse esset; nunquam tamen literarum patrocinia intermisit, nunquam vel minimum in iis ornandis industria aut voluntate de-

fuerit perinde ac semper in summo otio ac vitæ tranquillitate vixisset . O incredibilem & inauditum literarum amorem ! O virum sapientissimum , omnium gentium vocibus , literis & prædicatione celebrandum ! Quinam progressus scientiarum , aut quantus gloriæ cumulus liberalibus artibus accessisset , si eum diutius vivere , aut tranquilliori cælo imperii clavum tenere contigisset ? At vero exiguum illud vivendi spatium a natura Leoni datum , & difficillima Christianæ reipublicæ , quibus ipse regnavit , tempora nonne loculentiora sunt argumenta ejus summi studii erga optimas disciplinas & beneficentissimæ indicia voluntatis ? Utinam Deus BENEDICTUM XIII. Pont. Max. diu nobis incolumen fervet ; ut quemadmodum sanctissimus senex regia liberalitate ceterisque virtutibus Romanorum Pontifi-

fi-

ficum nemini concedit, ita quoque ad literarum studia promovenda atque ornanda animum referat, ingenitamque sibi beneficentiam erga doctos & eruditos largiori manu convertat. Sic enim fiet, ut triste illud & acerbissimum desiderium sui, quod Leo X. moriens apud omnem literatorum memoriam reliquit, nunc tandem, BENEDICTO XIII. Pontifice, lenitum quodammodo esse lætemur.

F I N I S.



